



賜

餘

堂

鑿

十四

齋



氏	泰
墨	維
彭	盛

賜餘堂集序

蓋嘗稽諸唐陸贄敬輿之傳矣乎天植其忠蓋之心而授以匡濟之畧其爲代言奏議之文若天成也者自唐距今千有餘歲吾弟吳中行子道出焉將無似也與哉敬輿厯官侍從旋入平章中困於竇參竟尼於延齡而忠州之置終焉矣子道筮仕詞林雅稱侍從之職未得平章之任而旣涉其涯矣代言未之逮也而奏議再上具在集中視敬輿多寡懸殊官秩之崇卑職司之閒劇去位之蚤暮致然毋亦有困之尼之者乎乃其文之天成也誠似之矣古昔以文名世者未易更僕安得有盡似者莊宗乎列而列之朗潔莊之汪恣不似也固因乎遷而遷之奇峻固之整密不似也柳善乎韓而韓之綜脫柳之工刻不似也歐納乎曾而曾之簡委歐之爾雅不似也三蘇父子兄弟自相師友而明允之蒼鬱子瞻之條暢子由之紆折不似也彼皆有意於爲文而學之所詣各極其才之所至其不似宜也敬輿根柢乎忠蓋發越乎匡濟不得已而有

言不經意而言有文矣漢人稱文似者不曰揚雄之於相如矣乎相如稟趨捷之資揚雄好深湛之思烏在其相似耶殆未可與不知言者道也然猶以文而已敬輿忠盡之心匡濟之畧子道有焉詩云惟其有之是以似之雄與相如之所有未必盡同故其爲文亦未必盡似子道未嘗模擬敬輿之文而出其所有不覺其似之眞也且夫文之稱起衰者豈非變駢儷聲律之習而復先秦西漢之矩矱乎哉試讀敬輿之文間作駢儷而其氣愈昌或類聲律而其辭愈達卽爲先秦西漢者不能超乘而先之也子道疏正綱常振法紀及議郊廟諸篇比而同之其似與否豈不知言者所能辨哉集中詩歌凡若干章應試應酬之作凡若干首聊以當敬輿醫方之輯云爾藉以名世非子道之意尤非其所詣極之學也敬輿自謂上不負天子下不負所學偉哉志也子道從子也久稔其所志亦如之此文似之由也雖然敬輿揀一時之敝其文剴爽而深爲之慮子道重百世之典其文嚴切而大爲之坊相似之中微有

不似者焉敬輿謝客忠州踰五而歿弗克俾其傳之釋忌弗克待其主之召復而文之用未究也子道杜門故里年僅五十有五則又似之矣蘇子瞻氏今古號知言者劄獻敬輿奏議於朝于以自紓其忠盡之心而輔其匡濟之畧子道茲集行矣子安忍必他時無子瞻氏其人哉若夫易贄爲宣則更有所俟矣萬曆二十八年歲次庚子孟夏朔日期親兄可行撰

吾友晉陵吳學士子道初以植綱常第一疏觸權相江陵杖闕下幾斃削籍凡五稔而江陵敗乃詔復原官晉秩宮諭則又以讜論侵閣部大臣坐是引疾歸里者數年朝夕以圖書自娛而扁其堂曰賜餘謂重絕之餘年皆天所賜云子道蓋以不怨不尤自砥而屢推屢壅後拜南掌院之命不果行竟鬱鬱資志以歿歿後歲餘而其仲子孝廉亮哀其生前著述若干卷命曰賜餘堂集先次其在朝時所作奏疏講章閣試館課四卷來眎曰唯先生知吾父居官居鄉心迹又知吾父之所以爲不朽也請敘之余已久謝世文



而念子道立朝則其風波居里則同萋菲子道逝矣闡幽之責奚  
辭獨以未覩全集緩其請越一年其所善新安詹淑正持前後集  
一十四卷傳至因得其長公後菴先生所弁敘文擬子道於陸宣  
公敬輿爲之大暢蓋昔之論文者嘗擬韓子於孟子擬歐陽子於  
韓子愚心旨子道之文尙未得其所擬得敬輿之擬而爽然試玩  
集中諸作如奏疏講章則切直中深忠愛之悃閣試館課則典麗  
中饒通達之才鑿鑿乎蔚有敬輿風軌其諸詩敘頌記誌表碑銘  
等作大都斂蹇諤於和平藏英發於恭遜婉婉曲中事情絕無苛  
剋僞虛之態辭則信筆所流不求摹古而七襄之錦爛然所謂瞻  
而不穢詳而有體非乎後菴先生狀其未嘗模擬敬輿之文而出  
其所有不覺其似之眞眞知言已先生蓋不徒以其言之似而以  
其忠盡之心匡濟之畧相似也此則子道之所以爲不朽也夫敬  
輿不能使竇參之無困延齡之無厄忠州之無謫而能使七年不  
言之諫官伏闕門而苦諍至欲裂黃麻以殉之向微敬輿平日忠

誠貫天日何以感人至此奏議殆其芻狗歟維子道之所以不朽  
亦不在此十四卷中吾獨傷叔世之爲竇參延齡者何多而爲陽  
子野者何寡也世人亦但知子道不朽於植綱常正朝廷兩疏耳  
豈知不朽之實在陰隲不在顯名子道之生平蓋有忠竭於人所  
莫稱德施於人所莫報迹同甯武子之愚而心難與庸眾人道者  
其孰矜而孰白之子道師事吾婁王相國友執虞山趙少宰相國  
初起子道投以血誠有周公遷身之諷師旣振而身入山林矣少  
宰中齟子道殉以去就有虞卿棄印之風友旣安而骨銷積毀矣  
顧安得有以訟忠州別駕之冤訟子道者是子道之抱屈尤甚於  
敬輿也敬輿訖無怨言而子道不無微銜於此此子道之當遜敬  
輿處而隱德亦過人遠矣讀是集者其毋以語言文字索子道亦  
毋以氣節一端盡子道也萬曆庚子夏四月旣望執友年生古婁  
管志道識



賜餘堂集目錄

第一卷

奏疏

第二卷

講章

第三卷

閣試

第四卷

館課

第五卷

詩

第六卷

詩

第七卷

贈序

第八卷

壽序

第九卷

集序

第十卷

頌

記

贊

啟

書

第十一卷

神道碑

墓表

行狀

傳

第十二卷

墓誌銘

第十三卷

墓誌銘

第十四卷

祭文

賜餘堂集卷一

晉陵吳中行子道

奏疏

植綱常疏

萬曆五年十月十八日

奏爲因變陳言竭愚衷明大義以植綱常以隆治安事頃者天象示異星變非常聖心兢惕復戒諭大小臣工修省共圖消弭臣愚以草芥微軀荷蒙皇上作養洪造思效涓埃之報靡由也且政事所當興革有官守者能圖之臣寮所當刺舉有言責者能言之非臣所宜與亦非臣所敢及也第卽今日之大者要者爲皇上陳之書曰天視自我民視天聽自我民聽夫言天而必言民者蓋天人相通感召有自凡事必質諸人心而安始揆諸天意而順天意順然後天變可消也元輔張居正乞歸守制至再至三情辭俱窮矣而皇上眷倚則殷慰勉特至此豈惟明良相與稱帝王之盛節而已哉仰惟皇上以受遺顧命之臣而委心以任之大孝也爲社稷生靈以留之至仁也卽帝王念茲釋茲之盛心奚尚焉且事有輕



有重重於國則輕於家臣人匪躬之義也時有常有變通其變勿泥其常聖人達節之權也今皇上之意豈不責之以義而欲其通之以權哉然而舉也萬古之綱常所繫四方之觀聽攸關正宜深籌長顧必思所以處之當而求其安者臣聞之君之使臣也以禮人之愛人也以德謂之禮非特接遇之文也必以心相體焉謂之德非徒眷戀之私也必以道相成焉元輔夙夜在公勤勞最久謂父子相別十九年矣則子之由壯至強由強至艾與其父之從衰得白從白得老音容相睽彼此未覩而今長逝於數千里之外遂成永訣乃又不得匍匐苦塊一憑棺臨穴其情有弗堪者臣連日見其衰經之容擗踊之狀若以不得去為悲哀者人皆為之酸楚而皇上必欲其違心抑情銜哀茹痛於廟廊之上且責之以紆謨決策調元熙載焉或者非其情也臣聞之禮義由賢者出皇上之特眷元輔者不以其賢乎域中之共仰元輔者又不以其賢乎賢者禮義之宗也矧位當天下之重任則身繫海內之具瞻必正

已而後可以正百官而後可以正萬民其理有必然者今皇上之所以必畱與元輔之所以不容不畱者其微權深意非圓神通方者未可告語彼遐觀逖聽之夫拘曲守常之士人人然也或因其不去之迹而歸以不韙之疑安能家喻戶曉而使之無里譚巷議乎夫輿情未愜革面無庸而皇上尚欲其敷化施政端範移風於海寓之間且責人之趨令遵教用協丕式焉或者非其理也元輔之為賢輔弼也其自信而對揚之言惟曰聖賢道理祖宗法度斯二語兢兢守之勿之有墜焉耳宰予短喪孔子曰予有三年之愛於其父母乎王子請喪孟子曰雖加一日愈於已然則終喪者正聖賢之訓也而身自違之必其所不忍也國家令甲丁憂守制二十七箇月為滿雖庸人小吏匿喪有律惟武弁戎行則墨衰從事而未嘗以介冑之士處輔弼之臣卽有往例可稽亦三年未終而非一日不去之謂也且當時諍之後世譏之乃內閣二輔臣首題之疏方以訃聞遂以例請亦謬矣至臺省諸諫官乞畱之疏實為



贅辭尤味成憲抑又謬矣然則奪情者正非祖宗之法也而身自蹈之必其所不敢也以其所不忍所不敢而委婉迂遲不得已爲辭俸之請又不得已俟大婚之期臣竊有以諒其心焉君之於臣死生進退惟其命而無所逃也夫皇上無俞允之命而屢瀆不止則尤有所大不敢者禮意隆渥札諭諄懇相須甚殷誠千載一遇也夫皇上有殊絕之恩而求去必速則尤有所大不忍者然則所望以卹其私情全其大節者亦惟在皇上曲體而俯容之耳況卹一時之情正所以安其心而責效於他日全一人之節正所以端其身而錫極於兆民則皇上勉畱之者固所以爲社稷爲生靈而臣則謂皇上宜俯容之者亦所以爲社稷爲生靈也皇上誠虛懷親賢講學圖理日召見大臣益明習國家事不以嗜欲漸開而懈心生不以疆圉僅寧而侈心生怠荒是戒朝夕惟勤將見聖德日盛世道時雍凡元輔所深望者皇上能終慰之雖去猶不去也於是仍虛位以待則計日可還若有大政事大謀議或實封上奏或

遣使就咨不然則容其給假營葬竣事趨朝暫往邇來以副倚注斯君恩親誼子孝臣忠一舉兼得萬世有辭矣彝倫攸敘風化大行則人心安天意順或亦弭災消變之道也臣之進也元輔之所舉也有師弟子之分焉臣以爲苟有干慮一得之愚所當吐露而復以全軀保妻子之念奪之非事君不欺之忠亦非事師無隱之義也臣豈不知臣之言上違聖意必觸天威又豈不知臣之官典在筆札卽爲隱默亦匪瘵曠顧不優游清華而敢於干犯雷霆哉然昭是非垂勸戒亦史臣之職也與其記述於簡冊以彰穢示懲孰若披陳於君父之前求今日無過舉俾後世無遺議也伏惟皇上寬斧鉞之誅賜芻蕘之擇而垂神俯納焉元輔幸甚愚臣幸甚

正朝廷疏

萬曆十二年四月十二日

奏爲尊主權明臣義伏乞聖明永垂鑒戒以正朝廷事臣聞之惟辟作威惟辟作福蓋言君權不可一日移也又聞之忠臣不私私臣不忠蓋言臣義不容一念雜也今皇上乾剛離照勵精圖理百



察奉職四海嚮風真千載一時矣而猶有敝習相沿舉國莫知其非者二事臣謂借留賢之名而保輔臣此諂諛之極也甚可恥也臣謂借去讒之名而參言官此壅蔽之漸也不可長也科道風聞言事官有專責上言大臣德政律有明條令甲訓典森若日星輔臣者股肱也敷歷有年其人之邪正豈能逃聖鑒哉或因事乞歸或被言投劾宜去宜留聽之朝廷耳何邇年以來每遇輔臣辭位必羣然起而留之頌功贊德累牘聯章此其心何心哉蓋昔年保留故相之餘風可羞孰甚獨奈何至今存也但當責以大義私相勸勉其期協力贊襄如周公之告君奭可也未聞以留行瀆之君也況今輔臣申時行之賢久注聖衷本無纖芥見疑之意而必疏留以要君之從盜啻聚蟻之慕羶乎殆幾於以私比而作福矣即使其人必當留也而出於眾口揄揚以保之跡涉諂諛非臣義也言官者耳目也聰明所寄其言之是非豈能逃聖鑒哉或妄言無稽或持論未當宜竄宜罰聽之朝廷耳何近日所爲偶因言官論

事遂悍然起而攻之臆斷株求公言顯斥此其心何心哉蓋權臣鉗攝孤忠之故智殷鑒不遠獨奈何計出此也雖或奉有明旨令其查參猶冀婉辭掄解如潞公之容唐介可也不宜以拒諫導之君也況昨言官丁此呂之疏未蒙聖怒止令分別被論之人而忽參斥以成君之過盜啻畫蛇之添足乎殆幾於以私排而作威矣即使其言果可罪也而出於一人意見以逐之跡涉壅蔽非臣義也夫輔臣表率羣寮旣忻然借譽口於公卿他日或公卿之有辭避也則廟堂獨不當留之以報其德乎夫冢宰進退百官若公然可甘心於臺諫他日或臺諫而論冢宰也各部院獨不可參之以快其意乎其流之弊必至於大臣持祿養交雷同而附和言官畏罪容奸風靡而緘默甚非社稷之利熙明之世所宜有也臣以爲頃者邪正相攻彼此聚訟不足辨也道揆法守臣義君權自有綱維不容僭越者皇上試攷故籍羣相獎借而保大臣嘉靖四十五年以前所未聞至於不奉旨而參斥言官則本朝二百餘年以來



所創見何晚近世之爲臣者多私而不忠也豈其以弁髦視朝廷乎伏乞皇上總攬威福嚴加戒諭姑容既往申飭將來凡輔臣之留言官之斥惟君父之命是聽如有踵故習非羣留擅參者雖公亦私必罪無赦永絕偏黨之萌共成平明之理謂非正朝廷之要務哉臣知臣之言出大寮意必相左羣工目以爲狂盡觸忌諱未免顛隤然臣伏思臣之身萬死一生皇上再造之身也儻愛其身而趨時竊位隨世轉圜知之不言言之不盡且有愧於犬馬之銜結矣仰惟聖明垂神俯納焉臣不勝激切戰慄之至

太學條上疏

萬曆十二年

月

日

奏爲敬陳國學事宜以弘聖化以重賢關事竊惟京師爲首善之地而太學實賢士所關祖宗建學立師迪彝闡極崇飭弗替典制甚詳我皇上履洽乘熙親賢講學頃者更布功令蠲除煩苛駸駸乎菁莪樸棫之風賁人文而化成天下千載一時也臣等猥以凡庸過蒙推擇或還秩播遷之後或起家譴廢之中感遇酬知共圖

稱塞量才揣分深懼曠瘵惟夙夜黽勉思所以樹章程端型範庶幾乎少裨世教而無負於聖恩者除一意奉法悉心釐弊所有規條與合監師生相率遵行外謹摭一得摘陳六事言雖似迂而實切事非無益而可弛且屬臣職掌不敢不言亦藉以逭素餐之罪於萬一也伏望皇上垂神俯納敕下該部覆議施行斯世斯文幸甚一日修衢舍以飭學宮伏念辟雍之地不特教典攸司聖駕於此幸臨冠裳於此會集四方觀法萬代仰瞻乃今狹隘之規不及郡邑之制宮牆民屋逼窄喧囂溝渠弗治汙穢難除櫺星門之前樹塞無屏持敬門之內坎土漸窪驟雨成池巡簷由徑駿奔鶴立趑趄泥塗曷以肅園橋之觀而彰如砥之履也國家兩京竝建學宮宜同在南聖祖肇基規模宏敞在北郡庠舊址簡陋因循茲遇右文之朝咸起維新之想乞敕工部委官相地捐值質居稍拓街衢盡發磚石前開璧水外列屏牆斯稱清嚴可遠溷褻再照舊創號舍人多傾頽十存二三弗堪棲止併祈軫念通爲葺修庶卽次

可安而樂羣有所也雖大工屢作時詘舉羸但文廟費宮根本重地不爲小費之惜永垂太學之光是亦清時盛舉也伏乞聖裁二日優敘遷以重儒官伏念丞博諸臣多出科甲以昇清秩校官之薦必先六館而後有司故臺省之選部寺之遷多取本監之官實係屢朝之例及查近歲僅一二人若博士通判之升尤耳目罕見之事既用劣轉於後何取精進於先安在彰激勸之權而隆師儒之任也又訪得監屬上謁銓曹下與賞流爲伍夫論其品秩可視行人屬在師儒宜同部寺今都察院尚存此體相傳尚書汪鉉偶以小卻見抑遂成故事初非舊規但聞儒所當優未見士而可辱也乞敕吏部量其資序稍示優崇凡當考績之時加意章縫之輩上者仍入臺省次者亦畱京職必居下考方處外遷若其參謁部儀查照都察院見行之規改從部寺寮屬之後是亦崇儒盛事也伏乞聖裁三日簡生徒以需仕用夫太學爲育材之藪今生徒反不及一郡國也臣竊恥之舉人偷安亟須督遣迫試期而至者勿

聽貢生就教當爲限制四十五歲以下者勿聽至於援例雖爲濫途宜於揀誦之中陰寓羅才之意今入貲者俊秀居九學校居一至有不解習字無從施教者此輩他時或司民社殊玷冠裳臣謂學校生員進取旣已從寬輸納亦可示廣儻原數稍爲遞減則援例來者必多匪特澤宮所收皆出費士然不取盈於額而取盈於人亦司計者裕國之策也其由俊秀者務令考擇如係白丁徒冒青衿到監時臣得驗試遣歸則國費無匱乏之憂而雍庠亦可收造就之效矣伏乞聖裁四日儲經籍以備教典夫太學設典籍之官今無其實而徒存掌故也臣竊惑之經術爲教化之原辟雍乃圖書之府自昔辨謬證譌必以祕書及監本爲據蓋內府所藏者天祿之舊而太學所貯者則石經之遺也先臣邱濬童承敘等屢以爲請而因循至今遺缺如昨臣謂南監有十七史板而十三經注疏久無善本容臣等率屬訂校工部給資鏤梓於監可爲明經造士之助內府書凡有板者乞各賜一帙在京衙門條例等書盡



令刷送在外郡邑刊刻諸書責令入覲進表官員順便齎投俾四方來學者潛心稽古習務通今載籍既完教學有具則遺書無湮沒之虞而典籍亦非虛曠之官矣伏乞聖裁五日復科舉以廣試途夫科舉之制兩京監生中式者三十五名就試者一千餘名蓋合監與歷而有此數也各省原無監生中式之額故歷事挂選有志場屋者仍許起文赴部考送萬曆七年申明題准俱令完歷給引不妨科舉至九年議禁許於原籍聽考本省進場出令未信立法似苛臣謂貢生歷有歲年民生貲已輸納既升太學亦幸觀光而復令隨童儒之列試郡縣之庭至於督學收取亦爲僅見省闈獲雋更所未聞是獨使待選公車者終於自棄不無可矜合無照舊赴京入試爲便儻以濫取爲嫌乞查照先年舊例令各衙門歷事監生至期俱聽本監與在班監生合考并送庶乎負志者無向隅之悲悉自淬勵冀占一第而積學登庸者出也伏乞聖裁六日議考選以通銓法夫仕進之期監生正歷二十五年雜歷三十餘

年蓋必至日暮途窮而後入官也志氣衰遲職業隳廢壯有才力老亦消磨人既無聊仕將何裨今舉人有揀選之例吏員有考中之條獨至監生滯於銓法臣謂隨才授任不拘乎類爲官擇人當及其時宜比舉人吏員條例斟酌通融令監生完歷守選至十年以外者許每歲赴部聽試拔擢數名卽與注選或稍加優異其中試者仍令循格待年明隲公評務期精當毋爲私昵以開倖途庶乎負才者無過期之歎爭相踴躍勉修一職而乘時效用者也伏乞聖裁

議從祀疏

萬曆十二年

月

日

奏爲敬陳孔廟從祀末議以備聖明采擇事臣等竊惟諸儒從祀既以表章先賢亦以風示後學最重典也頃皇上因言官之請特下禮部命儒臣集議臣等待罪辟雍有關職掌請借箸而畢陳其說焉臣聞之聖人未生道在天地聖人既往道在六經是六經之傳與天地並也夫自古聖人多矣獨崇祀孔氏非謂其刪述之功



開羣蒙以垂憲萬世乎故崇祀者既以功則從祀者亦視其功何如耳或謂我明興二百年來右文之朝久道之化猗歟盛矣止祀一人不妨多議臣以爲無其人而取數之多者濫也有其人而責備之過者苛也肇舉儀章匪徒粉飾丕視功載自有權衡蓋羽翼六經之功有二焉曰宗源曰修踐宗源者道之體也修踐者學之方也夫道若大路然知宗源而昧修踐是識路而莫由者也知修踐而昧宗源是冥行而不察者也神化性命直窺帝則是爲宗源實體真精無歛躬行是爲修踐斯二者以言乎適道則均也先秦坑燔之後經術熄矣漢儒則傳經之義而六經賴以不亡叔世汨溺之餘理學晦矣宋儒則窮經之理而六經因之益顯至於昭代斯道如日中天經術旣備理學亦明卽有著述微言不出漢宋餘緒臣愚以爲今日議從祀者不宜專據著述但當夷考生平或於踐修無媿或於宗源有窺皆可稱羽翼之功而列俎豆之間者也夫道貫萬世而無敝者也凡言學者隨時所習因性所近也凡言

教者揀時之弊拯性之偏也尚宗源則其流或偏內而敝也虛尚踐修則其流或偏外而敝也腐天生豪傑起而振之但有禪風教卽有功聖門至其流遠枝分或失之玄虛者或失之迂腐者未可沿流而咎其源因枝而疵其根也今之儒有競虛華之談而闊略行檢者矣故若僻瑄若胡居仁踐履篤實足爲後學之模以修身爲教而有功於六經修踐者是可祀也今之儒有局支離之跡而茫昧本源者矣故若王守仁若陳獻章悟識通融能發先聖之奧以明心爲教而有功於六經宗源者是可祀也斯二者誠不可偏舉而獨遺矣况僻瑄之讀書錄胡居仁之居敬錄固未嘗無所發明而守仁之功行卓越獻章之孝義明彰亦未嘗有遺踐履臣以爲茲四人者同功一體所當竝議從祀者也臣又竊觀古之人心善成人之美而尚公今之人心善求人之過而多忌惟公則取其大而常略其細惟忌則摘其短而併棄其長富貴功利淪骨薰心伎嫉詆誹索瘢求垢悖理傷教者藉口以文其過講德譚學者設



詞而助之攻操戈之徒各有異喙盈庭之說竟無折衷卽令孔孟再生程朱復出難乎免於今之世矣是誠何心哉仰恃聖天子主張於上賢輔弼贊襄於下言路申請輿論大同此千載之一時而臣等蠡見管窺敷陳淺陋或亦千慮之一得也乞敕下禮部議覆舉行除辟瑄已從祀外將胡居仁王守仁陳獻章等一體從祀則祀功之論定崇儒之化彰而於表章風示之典未必無補萬一矣臣等不勝願望之至

乞休一疏

萬曆十二年四月二十日

奏爲殘病之軀不堪供職孤危之跡無所容身懇乞聖明俯賜休致事臣年四十五歲由隆慶五年進士改庶吉士授翰林院編修萬曆五年因故輔臣張居正奪情廢倫具疏建言被杖削籍闔門俟死者六七年矣仰惟皇上雷霆之斷城社忽清日月之明豐蔀畢照過采文章之薦拔臣編戶之中賜環晉秩超等踰涯是臣今日所遭皆皇上再造之賜也卽以此身蹈湯赴火惟皇上之命是

聽何忍無所因而言去乎緣臣在昔少時不善保蓄故今壯歲蚤見衰羸復以筆楚之餘血肉潰裂憂虞之久心志怔忡一股幾空兩日常眩人形雖具病態日增深懼曠瘵亟宜引避且臣追惟疇昔本屬昏愚卽死無辭雖悔何及今大臣持衡當舍舊圖新化枉爲直之日也而頃之搜摘似過疑慮未安因視臣等二三人者初爲故相之仇或作同舟之敵市虎可構旣窺當事之意向而深中狐疑杯蛇易驚復糾同類之猜防而相爲狼顧流言外布巧譖內攻臣本孤立寡援至坐爲黨而名之以號召也蒙此無辜之咎必有自取之由祇宜反躬省愆何敢復置喙哉第邪正混淆之說出自廟堂而幕客宵人之計得矣構煽方起機穽在前雖有戀主之心實無容身之地臣之情又有不得不去者伏乞皇上特賜矜憐放歸田里旣免素餐之恥以安己分尤遠赤幟之嫌以釋人疑儻糞土之息尚延草莽當朝夕焚香籲天祝聖壽之無疆戴皇恩於罔極臣無任激切懇祈之至

乞休二疏

萬曆十二年五月初九日

具會堂錄一

奏爲殘病漸增職業久曠再懇聖明亟賜休致事臣於四月二十日以前病軀危跡具奏乞休奉聖旨吳中行著照舊供職吏部知道欽此臣以一介微命五品下寮冒昧陳情干瀆聖聽不加重譴仍畱供職此希世之遇逾格之恩也卽草木且忻忻焉向榮而臣思所以自效者豈在狗馬下哉臣緣昔年受杖時筆楚旣傷竄逐更急冰雪就道皮骨空存不死者幸耳糞土之息方延而承風投石者起矣禍在旦夕憂怖講張與鬼爲鄰度日如歲遂致血氣耗鑠神魂蕩搖膚革不充齒髮旋脫年雖未艾體實不支頃者被詔賜環至伏讀誤聽失中之旨舉家感泣何忍偃蹇趨命是亟雖病不辭旣列班行勉圖稱塞復因勞瘁愈覺疲羸臣今所居者師儒之官所任者敦學之職此官此職不可一日曠者而杜門且久怠事已多不去則不安也夫君恩罔極臣念未酬而遽言去也亦竊自傷之但福徼非望力苦弗勝與其戀位以干冒進之嫌孰若乞身

而明易退之節庶審機量力維恥廉頑不貽名教之羞或亦涓埃之效爾伏乞皇上鑒臣果出悃誠別無規避特准致仕或容養病回籍則臣未盡之年皆皇上大造之賜矣臣無任激切隕越之至乞休一疏

萬曆十三年四月二十四日

奏爲殘軀陡病不堪任使懇恩致仕回籍調理事臣係直隸常州府武進縣人由隆慶五年進士改翰林院庶吉士授編修萬曆五年因故輔臣張居正不奔父喪具疏建言被罪編戶六七年矣幸存杖下之生甘作溝中之瘠至萬曆十一年恭遇皇上乾斷離明察臣無罪旣還舊職旋晉今官頃復備員講讀之後日侍天顏是臣以萬死再生之軀遭千載一時之遇卽捐糜此身豈足上酬而講讀微勞正可自效雖犬馬且知戀主臣誠至不肖顧不犬馬若哉遽乞骸骨遠離闕廷不惟不敢亦不忍但臣徼福旣過災悔自生受傷已深精血易耗於本月二十三日忽患痰火之證耳鳴眩暈齒腫呻吟中氣大虛外邪投閒自知疲羸積以歲月必不能療

易余堂集一



治於旦夕者不得不披咽乞哀於君父之前也伏望皇上俯垂鑒  
督特賜矜憐容令解職回籍獲就醫藥以便調理儻延糞土之息  
於蒿萊則自今未死之年又荷皇上更生之賜也臣無任激切祈  
懇之至

乞休二疏

萬曆十三年四月二十七日

奏爲病體危身審機量力再懇聖明亟賜罷免事臣於本月二十  
三日患痰火之證具疏乞休奉聖旨著在任調理吏部知道欽此  
臣伏思昔犯故相張居正赴廷受杖時飾巾攜櫬與妻子訣別而  
出曰出則人歸則鬼矣雖由血氣用罔自干刑憲亦緣意見偶激  
欲植綱常其時居正大權方張盛年未艾而謂臣以必死之身爲  
今日復用之地雖至神不能逆知雖至愚無此妄念恭惟皇上天  
啟聖衷操獨運之剛收下移之柄復召起臣等而用之豈非千萬  
載之一遇哉是臣之身父生之於未生之初而皇上復生之於既  
死之後臣之官先帝收之於未仕之始而皇上復收之於既廢之

餘則臣之在今日也惟圖黽勉職業矜奮名檢以忠勤報主以禮  
義持身庶幾上不負隆天厚地之恩下不貽正人君子之辱耳然  
臣福緣淺薄疚疾纏綿伏枕杜門有誤講讀是忠勤之不效也緘  
脣斂跡亦被猜嫌是禮義之或愆也蓋一節偶合之善難概生平  
而再造重創之軀易至羸憊臣之行履不肖宜去臣之體力不堪  
又宜去且講讀之役夙夜在公輪直到臣未免倩代而邪比之黨  
日夕甘心孤危若臣必遭捏陷故臣展轉於懷愈益其病一日弗  
去則一日弗安者是以不避煩瀆再乞恩慈原臣甚不得已之情  
憐臣必不易痊之疾容令致仕回籍儻延狗馬之息則歌詠聖德  
於田閒或填溝壑之身則銜結皇恩於地下臣骨雖朽而臣心則  
不朽也臣無任干冒隕越之至

乞休三疏

萬曆十三年五月十二日

奏爲病患漸篤調理不痊三懇聖明俯容休致事臣於四月二十  
四等日兩具疏陳請奉聖旨著在任調理吏部知道又奉聖旨吳

中行日侍講讀著遵前旨調理該部知道欽此夫臣七年編戶萬死無辭者而昔蒙賜召五品下寮一請宜去者而今蒙賜畱非望之遭逾格之恩也摩頂放踵皆君之身赴火蹈淵亦臣之願況皇上還之詞曹且置之講幄每從日直仰觀天顏莊嚴恭己清明在躬聽納垂神周旋中禮卽詩書所稱堯舜之聖何以加焉幸逢奇邁忍負明時又安敢爲私圖而萌去念哉臣自起家服官兩閱歲耳始而總校史館無裨編摩旣而佐教辟雍深慚模範及改銜坊署備數經帷撰衍講義則苦於學殖之疏習讀講章則苦於記問之鈍勤勞欲矢夙夜勉圖遂至交際都遺猶懼任使弗稱乃今疾病愈痼調攝難痊旬日以來醫藥罔效頃四月二十五日暨五月初二日二次進講俱臣輪直倩人代替若更遷延屢致曠誤則罪何可逃而死不足贖也且臣聞之獲上必先信友而陳力方能就列人言波及友不信矣病勢日增力不能矣天人交惡且夕將危情蹙詞窮言煩罪重伏惟皇上乾坤覆載日月鑒臨容返故邱苟

延殘喘若聖恩之已深益深與臣心之欲報未報者惟教訓子孫俾世世爲犬馬以圖之而已臣無任干瀆戰越之至

乞休四疏

萬曆十三年六月初三日

奏爲病篤機危萬死四懇罷免以重講筵以全臣節事臣病將兩月疏凡三乞矣皇上不加煩瀆之誅屢蒙調理之旨臣心口相語涕汗交流感懼俱深進退失據惟慎加調理日望痊可卽當趨闕謝恩隨班供事又何敢陳請數四而違天以干雷霆哉奈臣逢辰雖幸賦命實奇不忍去者臣心也而神不佑則病篤不遽棄者聖恩也而人不容則機危聞望旣輕就列有覲顏之恥講讀甚重受事當量力之能強曳疲軀苦耽華秩是何異於鳥傷弓而不舉蝸升壁以終枯也且避言省愆安可以口舌爭哉必亟辭朝市而後免名高徑捷之疑必遠遁山林而後免聲應氣求之累不去則人不見亮而臣亦無以自解者惟臣疾痛則呼天呼父母情愈急聲愈繁皇上儻憐迫切而賜歸休或罪煩瀆而加褫斥別選學行兼



優精力堪任者代臣之職斯講筵重而容臣之去也庶可以明數年甘死之志道今日冒進之譏延一息垂盡之生冀他時圖報之所而臣節全矣臣無任扣地顙天干冒戰兢之至

乞休五疏

四疏得請此草未上

奏爲病久不痊情迫無奈五懇天恩亟賜生還事臣惟獎忠進直君道也難進易退士節也至愚極不肖如臣者每自省循疇昔之事念在好名言爲出位而今借忠直之似以躡聲榮幸之幸也皇上獎之進之亦足以昭示德意風勵臣工矣然臣也材本不任望更未孚所守者硜硜之節耳既不揣能量力乞退於先幾又且履咎蒙疑冒進於今日不惟廉恥盡喪實恐患害將深且使臣之求去爲虛詞而以皇上之賜畱爲得計則往年廷杖眞爲苦肉之謀累歲里居果似捷足之徑士節若此物議謂何況臣憂危久積榮衛漸枯病在膏肓卒難醫藥夫清華之秩豈容負垢之人講讀之官更匪養疴之地伏乞皇上特賜殘骸俾還故里永爲編戶以俟

蓋棺雖不得效臣力之涓塵庶可維士節於草莽臣情詞俱窮席藁以俟

謝馳驛疏

萬曆十三年六月初十日

奏爲恭謝天恩并陳辭悃事臣以病篤機危三四陳乞於本月初六日奉聖旨吳中行准回籍調理著馳驛去該部知道欽此臣患不易痊之疾負不得已之情受不能報之恩冒不宜瀆之罪席藁以俟斧鉞何辭伏蒙皇上垂憫下忱旣俞回籍之請俯循舊例復賜給驛之恩臣竊念起家編戶僅歷二年供役講帷纔逾半載有辜任使方切兢慚未效微勞亦沾隆典揆之分義跼蹐靡寧卽日扶病就途違離闕廷又不能匍匐辭謝洪恩罔極仰報無由臣不勝感激瞻戀隕越屏營之至

謝銀幣疏

萬曆十三年六月十一日

奏爲感激天恩披陳謝悃事臣於本月初十日因蒙恩給驛遵例具疏謝辭於十一日奉聖旨吳中行係日講官賜路費銀二十兩

糾絲二表裏禮部知道欽此臣侍講讀未效涓埃遽違闕廷何勝  
隕越而皇上命之乘傳益以賜金更頒在筭之華仰荷如綸之重  
窮途沾寵下里誇榮自今草莽之生皆舉家銜結之日矣臣無任  
感戴兢慚瞻戀屏營之至

辨誣疏

萬曆十八年正月二十七日

奏爲懇乞聖明辨誣覈實仍賜特加顯斥以息人言以全臣節事  
臣自告病回籍屏迹杜門已六年矣殘喘僅延舊疾愈痼又自揣  
狂蒙絕意仕進臣固果於忘世世亦當久於忘臣矣不意姓名尚  
挂齒頰臣與吏部員外趙南星御史蔡系周俱無往來俱無德怨  
其稱臣爲君子也臣愧不敢當其詈臣爲小人也臣恥不忍受蓋  
邪正相指徒以口吻求勝則是非愈淆正不宜辨也系周謂臣與  
今南京禮部侍郎趙用賢抗疏受禍雖同而賢不肖相去若江山  
黑白此其藻鑑甚精品評甚當卽臣自知亦甚明實無容辨也系  
周謂臣自爲舉人時以至居家處鄉故爲隱詞猶存厚道又謂臣

欲藉寵力思躐公輔當是意想之語俱無可辨也系周謂臣補講  
讀爲紊資序夫講讀之補不論資序如今輔臣王錫爵科第官階  
在前未爲講官而許國爲之又如今戊辰辛未諸臣科第官階在  
前多未爲講官而馮琦余繼登爲之此則系周所未解者更無足  
辨也第以交通中宦求補講官一節行檢所關又以假託山人捏  
造揭帖一節禍患所關萬萬不得已輒不避斧鉞從畎畝中披肝  
瀝血一陳之君父之前臣爲講官與原任禮部侍郎張位同日奉  
旨門客樂新聲臣有生以來耳所未聞金絲盒等器臣有生以來  
目所未見無論臣與司禮影響不通若內閣曲徇私干之人又惟  
司禮之帖是聽則內閣何如人哉豈系周曾詢之內閣口授者乎  
筆示者乎抑系周道聽之乎意億之乎今內閣當時題補臣者申  
時行等俱在正望皇上召問有則必不故爲臣隱無則必不强爲  
系周證此其所當辨者一也原任少詹事黃洪憲與臣絕無纖芥  
同官攻擊遂致紛紜與臣耕釣之軀絕無干涉至今不知山人何



事不知鳴冤何語系周何所據而指臣臣茫然不知何故第恐下流之居易爲歸惡之所望風之輩借爲投石之謀從此告密可開大獄可起莫須有可坐萬一更有重大事情匿名奸政指而曰某曰某則林下之人皆几上之肉臣之身死亡何惜而黨禍若成世道攸繫此其所當辨者一也然臣竊思之臣旣跼伏山林跡同麋鹿而操戈挾矢者猶向之此無他止因餘生尚存虛銜未削謂臣爲賢者則疑其不用而稱之謂臣爲不肖者則疑其復用而詈之詈之者不過因人之稱而愈申其前論之憤稱之者不意重人之怒而適貽以不測之辜此臣雖在蒿萊如負芒刺所恨者不卽死而與世長辭也伏乞恩慈明示擯斥旣絕再起之望庶安一日之生賢不肖俱付之忘言以俟蓋棺而後定論臣之志願畢矣臣不勝激切懇祈之至

辭官一疏

萬曆二十一年正月初九日

奏爲沈疴尚痼寵命洊臨披悃懇恩仍容在籍調理事臣於萬曆

十三年六月患病乞歸疏凡四上奉旨予告歲已八更苟延未死之餘竊幸不才之棄返初服已甘終老望長安如隔前生忽於本年正月初六日接得邸報南京翰林院缺官掌印該內閣題補升臣翰林院侍讀學士掌南京翰林院印奉聖旨是吏部知道欽此臣自惟一介草茅廿年科第服官什一歸田什九雖曾供事史館直講經帷若稽以月成歲會之勞絲毫未效徒戴夫天施地生之德高厚難酬茲遇清時復塵華貫此何異寒灰受煖豐蔀生輝也葵藿且解傾心犬馬寧忘戀主豈不願努力自矢聞命卽趨忍以節詞敢於瀆奏哉緣臣賦質本弱受傷更深魄旣喪於嬰鱗精旋耗於銷骨調攝有日醫療罔功兩鬢漸星一目如霧心同髮短志隨氣衰怔忡健忘眩暈時作蓋桑榆雖云未迫而蒲柳自覺先摧弗任馳驅何堪鞭策實慚薄命虛負隆恩矧當眾正之茹連奚用微臣之竽濫伏乞皇上俯鑒下誠曲垂弘造或仍容在籍養病或遂以致仕賜休儻螻蟻之生鹿豕爲侶猶得秉耜以供賦稅授經



以訓子孫誓竭涓埃永圖報塞於世世也臣不勝隕越懇祈之至  
辭官二疏 萬曆二十一年正月十二日

奏為被命先已乞休聞言復當引咎懇賜罷免以保殘生以安愚  
分事臣於本年正月初六日接得邸報內閣題補南京翰林院印  
信事升臣翰林院侍讀學士掌管隨於初九日具疏告休齎行馳  
奏矣又於十二日接得邸報禮科給事中王嘉謨參論指臣為邪  
至謂用臣則時事可虞罷臣則亂萌可遏其出處所係若斯重也  
臣實愧之臣屢疏乞歸馳驛賜告特蒙休沐之恩何嘗廢斥臣哉  
今乃云仍從廢斥則臣之履歷猶未攷也夫邪正無形彼此有喙  
自古易淆矣十數年以來用舍惟其愛憎逢迎以為毀譽乍賢乍  
佞其邪正豈一時一人所可定者哉臣不敢辨也臣以孤忠矢日  
兩疏批鱗同里承風眾口銷骨覈實原無踪影傳訛頗足聽聞若  
科臣之於臣也未經識面何忍甘心必其采訪甚真衡鑑不爽辨  
材信知人之哲糾邪乃為國之公或匪妄加自當虛受臣尤不敢

辨也然臣聞命越二日即已具辭絕無嗜進之愚但有求退之勇  
不煩鷹擊已決鴻冥矧杖下之生摧殘更易而溝中之瘠拂拭實  
難伏望皇上俯賜矜憐特從擯斥削其仕籍斷此名根遂得無挂  
齒牙不至有覩面目臣當與耕傭釣侶戴恩祝壽鼓舞於堯天舜  
日之下也臣不勝悚懼激切之至

辭官三疏 萬曆二十一年四月初一日

奏為天鑒甫臨人言復至知幾安命懇恩賜罷事臣前以聞命請  
告既以被言乞休俱奉聖旨吏部知道欽此頃於三月二十日接  
到吏部劄付中閒備載題覆等因奉聖旨吳中行著遵新命供職  
欽此夫科疏糾彈銓評獎錄意指稍異予奪不同已蹈危機况嬰  
宿疾即圖勉赴力所不能更擬瀆陳義所不敢進退之計正在傍  
徨忽於二十八日見邸報復為吏科右給事中喬胤參論因得藉  
口乞身臣之幸也亦科臣之賜也第其漫訾汎訾累牘盈章而所  
坐者原任南京給事中徐常吉一事耳常吉之子與段氏子俱係



縉紳親戚之家偶爭成訟府縣官嚴拏詳鞫問徒申道士民共觀  
案卷具存與臣風馬牛不相及也蜚語何從訛言遂播必有創爲  
說者臣誠不知其故矣又謂臣吞謀田產占奪妻女把持官司干  
謁公事諸不法與臣之素所兢兢者更爲相反臣受先臣敝屋薄  
田安貧守拙自部使監司以至郡邑絕無片紙隻字此昭昭可查  
正不可謂之冥冥也儻有實跡甘伏重辜至於臣兄可行原任翰  
林院檢討長臣一十三歲致仕已二十八年臣以父事之而兄之  
愛臣亦甚篤迺謂以闕牆故爲臣所害則似夢寐中語耳竊惟知  
人實難則論人亦豈易哉臣以乙酉還里肩以己丑登科姓名不  
通音容未接卽肩之采訪亦云得於臣鄉里者頗詳且眞生今之  
時又居臣之地伎害之喙構造無稽且有口不忍道之言目未經  
見之事每加於臣更甚於科臣所指者若據風聞全憑月旦安知  
不爲人所假手也且臣一身耳自臘逾春又僅四月耳觀風之薦  
墨未乾而忽指爲邪矣覆疏之俞旨方下而復指爲穢矣朝黑暮

白甲雌乙黃俾廟堂用舍將誰從哉頃之六年式序評汰甚嚴兩  
京拾遺搜剔殆盡臣適被論停覆負咎待黜之時當此庶言何無  
一語而甫畢旬日復有人心未厭輿論共棄如臣者卽煩擊逐乎  
抑臣有所忌諱久爲囁嚅今請不避斧鉞之誅而畢其說焉當時  
同事者五人臣最下偶廁其閒然未有軒輊之者賜環之後推轂  
臣獨先而臣則盜負私恩復陳公議心本同舟之濟跡似入室之  
操四疏乞歸八年甘退所欠者一死耳臣又硜硜信果弗善脂韋  
言則多尤行則寡合咸謂豚魚未革虎兇難馴方欲援弓肯令出  
柙有聲可吠無影亦疑甚至虞臣之用而爲亂也雖有慈母盜免  
三至之投自匪聖人能加眾惡之察哉宜乎科臣之不相諒也此  
臣涼德所致薄命久安卽當可用之年必無見容之理今臣五十  
四歲矣肉消骨立齒敝髮疏一息僅存百念盡槁儻猶未填溝壑  
而身在世外老於田閒不啻幸矣伏乞皇上垂憐知足之念俯鑒  
由衷之辭特允科言遂削臣籍庶消猜忌因息譏評臣官雖罷臣

之志節則少伸也生蒙解網死效銜環臣不勝叩地籲天激切懇  
祈之至

賜餘堂集卷一

賜餘堂集卷二

講章

詩經

蠢爾蠻荆大邦爲讎方叔元老克壯其猷方叔率止執訊獲醜戎  
車嘽嘽嘽嘽焯焯如霆如雷顯允方叔征伐獫狁蠻荆來威

這是小雅采芑篇宣王命方叔南征詩人歌詠其成功的說話  
蠻荆楚地荆州之蠻是南夷嘽嘽是眾焯焯是盛雷霆是比喻  
迅疾的模樣獫狁是北狄詩人說我方叔出師征蠻軍容盛矣  
兵律嚴矣然其收克敵之勳而爲成功之本者豈無自哉良由  
威謀兼著聞望素隆耳彼蠢蠢然無知之荆蠻馮陵侵犯敢與  
大邦爲讎者意以中國之無人也不知我方叔齒先百辟本朝  
廷之元臣計出萬全爲封疆之名將問其年則老問其謀則壯  
以無敵之帥率有制之兵決成算於胷中揚神武於闔外執彼  
渠魁獲其醜類但見戎車徒御嘽嘽然其眾多焉焯焯然其殷



盛焉又見其威靈所加莫不震恐如霆如雷之迅疾焉夫大將以元老專征雄威與壯猷俱奮蠻荆不足平矣而我顯允之方叔則有不專恃乎此者昔也六月興師薄伐獫狁方叔嘗與有功焉已著之勳名既素孚於北狄常勝之威望自潛懾乎南夷惟先聲以奪人之氣故不戰而屈人之兵蠻荆且畏威效順之不遑矣孰敢爲讎於我大邦者乎夫方叔一出而平獫狁始因功以樹望再出而靖蠻荆乃因望以收功其稱全勝之兵而致中興之烈也有由然矣然非宣王之克知善任亦何以展其能而效之用哉臣因是而論之將兵者將之職也將將者君之事也未任則選擇必精試其才猷察其譽望而不忘拊髀之思既任則付託必重隆以恩禮假以便宜而不致掣肘之患又必遠讒閒之口安展布之心寬文法之誅重事權之任坐消反側平居則養望蓄威動中機宜臨敵則折衝禦侮斯克壯之猷獲施來威之績可觀矣今分閫則元戎挂印督府則重臣秉旄將帥

非不隆也塞北守降王之盟滇南奏獻俘之捷蠻夷非不威也第無虞既久積弊難除試以武科弓馬非萬人之敵取於世胄紈袴之一籌之能大將以干請而得在在倖門善地以賄賂而行人人債帥苞苴日盛介胄風靡寡謀啟侮則輕率而損國威巨猾營私則貪殘而剝軍餉嚴苛責之律勢不得不掩覆以稱功操中制之權情不得不夤緣以求庇養之不豫任之不專匪朝夕矣昔年浙撫遭脫巾之譁近日蜀兵鼓操戈之亂士卒驕悍綱紀陵夷安得如方叔者授以斧鉞之寄哉仰惟皇上文經武緯乾斷離明畱意防邊開誠馭下勳勞久著則爵之以通侯總制內遷則命之以久任閱視歲遣敕旨星馳既得將將之道矣然臣聞之上有推轂之君斯下有請纓之將內有羔羊素絲之士斯外有熊羆不二心之臣故曰其本不在疆圉而在朝廷也伏惟聖明於廟謨兵柄之地加之意焉則將帥得人蠻夷向化內治外寧之休與成周比隆矣臣等不勝惓惓



貞觀政要

貞觀二年隋通事舍人鄭仁基女年十六七容色絕姝當時莫及文德皇后訪求得之請備嬪御太宗乃聘爲充華詔書已出策使未發魏徵聞其已許嫁陸氏乃遽進而言曰陛下爲人父母撫愛百姓當憂其所憂樂其所樂自古有道之主以百姓之心爲心故君處臺榭則欲民有棟宇之安食膏粟則欲民無饑寒之患願嬪御則使民有室家之歡此人主之常道也今鄭氏之女久已許人陛下取之不疑無所顧問播之四海豈爲民父母之道乎臣傳聞雖或未的然恐虧損聖德情不敢隱君舉必書所願特畱神慮太宗聞之大驚手詔答之深自克責遂停策使乃令女還舊夫

姝是美文德皇后是太宗后充華是九嬪位號貞觀二年前隋時通事舍人鄭仁基有一女年方十六七歲容色絕美當時莫及文德皇后訪求得之請選入宮中以備嬪御之列太宗許之將聘爲充華旨意已下但未發冊遣官行禮魏徵聞知此女已

曾許嫁民間陸氏不宜奪取入宮恐事遂成難以改易急進諫說陛下爲人父母撫養愛憐百姓如己子一般百姓所憂當爲之捍禦以去其憂百姓所樂當爲之區處以就其樂自古有道之主莫不以百姓之心爲心故身處臺榭則思天下有穴居野處者必令其有上棟下宇之安口食膏粱則思天下有啼饑號寒者必令其遂飽食煖衣之願嬪御滿前則思天下有怨女曠夫之不得其所者必令其遂夫婦室家之樂此人主之常道當如此也今鄭氏女久已許人正當聽其婚嫁以遂室家之好陛下聞其美取之不疑全不顧問道理可否傳播四海必以爲陛下縱情妨義豈爲民父母之道乎臣得之傳聞雖或未的然萬一有之誠恐虧損聖德不小所以不敢隱默無言以誤陛下大凡人君舉動不論大小史官必書之簡冊以傳後世豈可不慎所願特畱神慮勿視以爲小事而忽之也太宗聞徵之諫始知此女已曾許嫁大爲驚駭乃手敕答徵深自克責遂停止冊封



使命令此女仍還舊夫夫情欲之閒人所易溺宮闈之事人所難言太宗之聘充華詔已出矣魏徵猶能切諫而太宗卽能省改不避嫌疑不存形迹進言納諫君臣相孚真可謂千載一時矣宜爲史冊之美譚也

貞觀三年詔關中免二年租稅關東給復一年尋有敕已役已納竝遣輸納明年總爲準折給事中魏徵上書曰伏見八月九日詔書率土皆給復一年老幼相歡或歌且舞又聞有敕丁已配役卽令役滿折造餘物亦遣輸了待明年總爲準折道路之人咸失所望此誠平分百姓均同七子但下民難與圖始日用不足皆以國家追悔前言二三其德

關中卽今陝西地方是唐時建都的去處給復是免其差役七子是詩經上說鳴鳩哺飼其子周徧均平的意思貞觀三年太宗詔關中免租稅二年關東更免差役一年蓋因畿甸之民賦役繁苦故特賜寬卹這是太宗的善政及詔下未久尋有敕令

已役未滿的差徭已納未完的租稅今年且都輸納了待明年總與他計算準折給事中魏徵見太宗詔令不一上書進諫說臣伏見八月初九日的詔書令率土皆給復一年百姓每感恩樂業若老若幼無不喜悅或歌詠歡呼且鼓舞踊躍忻然室家胥慶及又聞有敕戶丁配役卽令役滿折造餘物亦遣完納待明年總爲準折與前日優免之詔忽然相背道路之人皆說陛下旣與之復取之大失所望臣知陛下必以爲未滿未納的幸得蠲除那先滿先納的不受實惠且令完了今年總待明年通融計算要使百姓每普地沾恩如鳴鳩之於七子一般此誠平分百姓均同七子之意但下民至愚可與樂成不可與謀始只見目前貧乏用度不足便想早受一分之賜早濟一年之急今旣失其所望皆以爲國家追悔前言今日一令明日又一令二三其德民將何所遵守哉夫人君渙號旣出不可復反小民望澤旣免不可復徵太宗之詔旨先後不同大失民心亦非國



體此魏徵之諫所以不容已也

臣竊聞之天之所輔者仁人之所助者信今陛下初膺大寶億兆觀德始發大號便有二言生八表之疑心失四時之大信縱國家有倒懸之急猶必不可況以泰山之安而輒行此事爲陛下爲此計者於財利小益於德義大損臣誠智識淺短竊爲陛下惜之伏願少覽臣言詳擇利益冒昧之罪臣所甘心

大寶是天子所居九五之位魏徵因太宗詔令不一上書進諫又說臣嘗竊聞之天之所輔者仁人之所助者信這兩句是古語說惟仁可以格天天之所祐輔者必是恩惠及民的惟信可以服人人之所贊助者必是誠信待物的陛下受命登極初膺大寶之位爲億兆千萬人所觀瞻當令德孚八表遠邇咸服信若四時節序不爽纔可今始發號令旣蠲租役復有後詔自悖前言生八表之羣疑失四時之大信縱使國家一時空虛十分缺乏萬萬不得已欲取民財以濟國用就如解倒懸之急一般

猶且不可旣免復徵朝令夕改況今承平寧靜國家有泰山之安正宜與民休息而何故輒行此支吾苟且之事有爲陛下進此計策者不過聚斂積貯以充帑藏於財利或有小益於德義則爲大損旣虧惠下之仁又失馭民之信天人且交去之安望其輔與助哉臣智慧識見誠是淺短未能通達事理竊恐陛下舉動差失於初服新政不無虧損甚爲陛下惜之伏願少覽臣言俯垂聖聽詳擇利益之大者勿因小利致傷大德至於狂瞽之言不識忌諱縱當冒昧之罪亦臣所甘心不敢辭也夫太宗一詔令之失誠爲君德民心所關魏徵直言切諫反覆揀正眞可謂知無不言言無不盡者矣此所以彌成貞觀之盛治也

簡點使右僕射封德彝等竝欲中男十八已上簡點入軍敕三四出徵執奏以爲不可德彝重奏今見簡點者云次男內大有壯者太宗怒乃出敕中男已上雖未十八身形壯大亦取徵又不從不肯署敕太宗召徵及王珪作色而待之曰中男若實小自不點入



軍若實大亦可簡取於君何嫌過作如此固執朕不解公意徵正色曰臣聞竭澤取魚非不得魚明年無魚焚林而畋非不獲獸明年無獸若次男已上盡點入軍租賦雜徭將何取給且比年國家衛士不堪攻戰但爲禮遇失所遂使人無鬪心若多點取人還充雜使其數雖眾終是無用若精簡壯健遇之以禮人百其勇何必在多陛下每云我之爲君以誠信待物欲使官人百姓竝無矯僞之心自登極已來大事三數件皆是不信復何以取信於人簡點使是差遣選閱軍丁的使者右僕射是尚書省之長中男是未長大的男子唐時兵制民間戶下丁年二十二歲點充軍伍年六十歲放免其十八歲以上的中男聽其耕作以供租稅署敕卽如今僉押文書簡點使右僕射封德彝等並欲將民間中男十八歲以上簡點入軍太宗從之詔旨凡三四下獨魏徵執奏以爲必不可封德彝又奏說中男所以不簡點入軍者爲其幼弱不任干戈也今見簡點者云中男內甚有壯大正可選

用太宗聞此言遂怒徵之諫阻乃出敕令中男以上雖未十八歲若身形壯大也著點取入軍魏徵又堅持固執不從畢竟不肯署押文書時侍中王珪亦與徵同以爲不可太宗乃召徵及王珪先作色盛氣待其至詰責二臣說中男若果幼弱不堪選用自是不點入軍若實壯大正可簡選此事不爲過失於君亦何所嫌疑直如此堅執已見故違上命朕不曉解公等是何意也徵正色直言進說臣聞得古語有云魚潛於澤以網罟取之纔是若竭澤而取非不多得魚一取都盡明年便沒有魚了獸藏於林以畋獵取之纔是若焚林而取非不多得獸一取都盡明年便沒有獸了譬如國家取於民有制不盡其力不盡其財正所以畱有餘之意爲可繼之道耳若次男已上盡點入軍則民間還有租賦差徭誰爲耕作以供給輸將之事乎且比年以來國家所選禁衛之士有名無實不堪攻戰豈爲人之少但爲優養未至禮遇失宜遂使人無鬪心國無實用若今點取只求



其多不思愛養務令得所而徒充雜使則人數雖眾攻戰不堪終無益於用若精擇簡取壯健之丁恩養禮待自然人人奮勇出力尊君親上以一當百攻無不克戰無不勝何必人之多也且陛下嘗說我之爲君素以誠信待物欲令羣臣百姓每也都以誠信事主並不萌矯詐虛僞之心以相欺誑今陛下所行未必能如其所言自登極以來且無暇縷數細務只是大事三數件前後異同先自失信於已復何以取信於人哉孔子論爲政至於去食去兵獨曰民無信不立可見信者所以綱維治理聯屬人心不可一日去者也無信則民情攜貳國事動搖雖足食足兵奚補於治哉魏徵之諫太宗可謂深識治體善格君心者矣

太宗愕然曰所云不信是何等也徵曰陛下初卽位詔書曰逋私宿債欠負官物並悉原免卽令所司列爲事條秦府國司亦非官物陛下自秦王爲天子國司不爲官物其餘物復何所有又關中

免二年租調關外給復一年百姓蒙恩無不歡悅更有敕旨今年白丁多已役訖若從此放免並是虛荷國恩若已折已輸令總納取了所免者皆以來年爲始散還之後方更徵收百姓之心不能無怪已徵得物便點入軍以來年爲始何以取信又其理所寄在於刺史縣令常年貌稅並悉委之至於簡點卽疑其詐僞望下誠信不亦難乎太宗曰我見君固執不已疑君蔽此事今論國家不信乃人情不通我不尋思過亦深矣行事往往如此錯失若爲致理乃停中男賜金襴一口賜珪絹五十匹

愕然是驚駭的意思秦府國司是太宗未登極時始封之藩國刺史卽今知府縣令卽今知縣都是郡邑牧民官太宗聞魏徵之諫愕然驚駭問所云我不信者不知那幾件事可明白陳說徵答說陛下之不信非止一事而已初卽位下詔書曰凡百姓逋私宿債欠負官物的盡與原免以示寬卹又隨令所司開列條款分別事件其欠負秦府國司的不在應免官物之數徵督



如故陛下自秦王升爲天子正是官物此若不免他又有何可免者此一不信也又有詔令關中免租調二年關外給復一年百姓每蒙被恩澤無不歡悅旣而又有敕旨今年白丁多已役訖若從放免則役過納過者總是虛恩並無實惠若已折已輸今年且總令完納所免者一概以來年爲始散還之後方更徵收百姓之心見前後詔令朝四暮三不能不生疑怪已徵得物便點入軍財盡力疲不勝誅求之苦雖說待明年總折何以取信於今日哉此二不信也又君之所與其理四海牧養百姓的重寄全在於郡邑之長刺史縣令而已必須一意信任無所猜疑令得展布各效職業常年稽察年貌以覈戶丁計算租稅以定賦籍等事旣一切委任之矣至於簡點丁男便疑守令詐僞不肯付託他是陛下用人疑人先以猜防御下乃望人以誠信事上不亦難乎此三不信也太宗聞徵之言答說向者朕見君固執偏見疑君尚未通曉此事今論國家以誠信爲先不誠信

則民心疑貳人情窒礙朕偶未深思有此過舉若行事往往如此差失何以圖理致治乎乃停止簡點中男入軍克悔前非收回成命賜徵金襴一口并賜王珪絹五十匹以旌其忠直焉夫蠲租省役君之深仁出令任人君之大信太宗之詔徵租詔簡軍是盡人之財盡人之力而至於不任守令又似盡人之情者魏徵旣堅執不肯奉行又直諫不避忌諱指數而面折之卒成太宗改過遷善之美真可謂蓋臣弼士矣若爲臣者阿意順旨爲君者拒諫遂非始而差謬都不肯匡捄終而亂亡遂至不可收拾其幾甚微其所係者甚大誠萬世爲君臣者所當鑒也貞觀六年匈奴克平遠夷入貢符瑞日至年穀頻登岳牧等屢請封禪羣臣等又稱述功德以爲時不可失天不可違今行之臣等猶謂其晚惟魏徵以爲不可太宗曰朕欲得卿直言之勿有所隱朕功不高耶曰高矣德未厚耶曰厚矣華夏未安耶曰安矣遠夷未慕耶曰慕矣符瑞未至耶曰至矣年穀未登耶曰登矣然則何



爲不可對曰陛下功高矣民未懷惠德厚矣澤未旁流華夏安矣未足以供事遠夷慕矣無以供其求符瑞雖臻而尉羅猶密積歲豐稔而倉廩尚虛此臣所以切謂未可

山上培土叫做封山下設壇叫做禪秦漢以來人主既定天下或封禪泰山以祭天而告成功意在誇耀當世其實是無益不經之事唐太宗貞觀六年天下大治胡虜皆已蕩平遠夷都來朝貢符應祥瑞每日呈獻穀米收成連年豐熟外而方岳牧民如刺史等官見得太平如此因屢請舉行封禪其在內羣臣又眾口同詞稱述太宗功德以爲天意人心伫望封禪正在此時豈可失時而違天及今行之臣等猶道是遲了復何所待這是中外羣臣逢迎太宗的說話一時左右無敢阻者獨有魏徵以爲不可此時太宗心下也要封禪卻疑魏徵固執說道卿以封禪爲不可朕所未解要卿直言其故毋得隱諱因問以朕之功爲不高耶徵答說功已高矣又問以朕之德爲未厚耶徵答說

德已厚矣中國華夏尚未安生樂業耶答說安矣遠方夷狄尚未傾心向慕耶答說慕矣天應符瑞尚未至耶答說至矣民間年穀尚未登耶答說登矣太宗說旣如此何故不可封禪魏徵乃進說陛下功固高矣然民雖畏而未懷德固厚矣然澤雖流而未徧中國固已安矣而所入未足以供所出遠夷固已慕矣而所給未足以遂所求符瑞雖至而法網之設猶自嚴密年歲雖稔而倉廩之積猶自空虛凡此皆有治平之形而無治平之實正宜積功修德長願遠慮以無虞爲可戒毋以小康爲已足若遽萌侈大之心遂舉封禪之禮此臣所以切謂其未可也嘗觀自古帝王之世萬邦協和四夷重譯鳳凰儀庭龍馬負圖而君臣克艱上下交警兢兢業業常如未治未安的一般太宗號稱英明然偶見治平便志得意滿故一聞羣臣頌美獻諛且有樂受悅從之意可見開泰固難保泰尤難豐亨豫大之時易起驕侈怠荒之念此正治亂安危所係而後世人主所當深思也



臣未能遠譬且借近喻於人有人常患疼痛不能任持療理且愈皮骨僅存便欲負一石米日行百里必不可得隋氏之亂非止十年陛下爲之良醫除其疾苦雖已又安未甚充實告成天地臣竊有疑且陛下東封萬國咸萃要荒之外莫不奔馳今自伊洛之東暨乎海岱萑莽巨澤茫茫千里人煙斷絕雞犬不聞道路蕭條進退艱阻盜可引彼戎狄示以虛弱竭財以賞未厭遠人之望加年給復不償百姓之勞或遇水旱之災風雨之變庸夫邪議悔不可追豈獨臣之誠懇亦有與人之論太宗稱善於是乃止

魏徵諫阻太宗封禪又說目今時事臣未能遠引取譬只就人身上借喻比方便易通曉今有人疾病疼痛爲日已久卽持物於手尚不能勝賴醫療理纔得稍安皮骨僅存精力未復便不自揣量欲勉強負一石米日行百里以久病初愈之身肩重道遠此理勢所必不能者前日隋氏驕奢濁亂何止十年以至於今民生困敝瘡痍未起陛下爲之除殘去虐撥亂反正如良醫

用藥除其所患苦海內雖已又安未甚充實亦如疾病初愈尚未強壯正須休息調養乃遽欲舉封禪之禮告成功於天地此與強負一石而行百里者何異臣故竊疑其不可也且陛下欲行此禮必須東登泰山封土而祭乘輿所在萬國諸侯都來會集遠而要荒之外蠻貊之長無不奔馳朝貢者其經過道路自伊洛之東暨乎海岱河南山東之間連年災歉百姓流離土地荒蕪但見萑葦榛莽茫茫水澤一望千里人家煙火斷絕雞犬之聲不聞道路蕭條如此若車駕經行未免艱關阻滯進退兩難又豈可引彼戎狄入此境界示以中國之虛弱而敗其窺伺之心乎況遠人朝貢須有賞賜百姓供輸甚是艱難就使罄竭帑藏給發財帛那遠人的願望何能厭足每年賦役加倍蠲除那百姓的勞費何能取償若或更遇水旱之災風雨之變天意不順民心弗堪卽一庸妄人倡爲流言共相怨謗海內煽動盜賊並起陛下那時雖悔不可追救矣此不但臣一人私心誠懇



願陛下勿行下至百姓亦有公論皆知此舉爲不可故封禪之請斷斷乎不宜聽也太宗聞言而悟亟稱其善乃停止封禪之命焉先儒王通有言封禪非古也其秦漢之侈心乎蓋其事起於秦皇漢武矯誣上帝誇誕不經唐虞三代以來止聞有郊祀不聞有封禪也今魏徵之諫但以空虛勞費爲言亦就時事竦動之冀其停止耳尚未及據經援古上陳帝王之典章下洗秦漢之謬妄以拔本塞源而反之正也太宗他日有言天下又安家給人足雖不封禪庸何傷且漢文帝未嘗封禪豈其賢不如秦始皇人主深思此言亦可以消其侈心矣

徵乃拜而言曰臣以身許國直道而行必不敢有所欺負但願陛下使臣爲良臣勿使臣爲忠臣太宗曰忠良有異乎徵曰良臣使身獲美名君受顯號子孫傳世福祿無疆忠臣身受誅夷君陷大惡家國竝喪獨有其名以此而言相去遠矣太宗曰君但莫違此言我必不忘社稷之計乃賜絹二百匹

魏徵既諫太宗以君臣之間宜盡誠相與不當存形迹太宗悔悟於是魏徵乃再拜奏說臣幸蒙陛下委託以身許國凡事惟秉公持正直道而行必不敢有一毫欺隱上負聖恩但人臣遭際極難願陛下使臣做箇良臣莫使臣做忠臣太宗說忠臣良臣都是一般有何分別魏徵對說這兩樣臣本無二道只是所遇不同卻關係人主的昏明國家的治亂良臣遇著聖明之主上下同心可否相濟共致太平使身獲榮美之名君受明顯之號家國同其久遠子孫傳世福祿無窮如稷契臯陶便是那忠臣遭遇著昏暴之主面折廷諍觸犯逆鱗身受誅戮其君陷於大惡以至敗亡家國並喪只落得一箇芳名流傳後世如龍逢比干便是爲良臣的上下俱受其福爲忠臣的上下俱受其禍以此而言相去遠矣所以但願爲良臣不願爲忠臣也於是太宗答說此言甚是卿但始終一節莫違此言我必不忘社稷大計乃賜絹二百匹以示褒寵觀魏徵此言非不知忠良之一道



賜餘堂集卷二  
蓋其意主於警動人君使省身克己立於無過之地虛己受人不違諫諍之言使人臣無忠義之名國家無危亡之禍耳若人臣之義事不避難爲忠爲良隨所遇而安之又何擇焉然觀稷契臯陶身勤其職而利在國家名歸主上龍逢比干無補於國之亡益顯其君之過而身享其名則知爲良臣者乃其本心而爲忠臣者非其得已也又豈可以忠良過於分別議魏徵之言哉

賜餘堂集卷二

賜餘堂集卷三

閣試

知人安民說

辛未六月初九日  
選館第十一名

自昔稱臯陶謨爲絕德謂其仁智兼盡帝王之理道備是也及讀孔子告樊遲曰舜有天下選於眾舉臯陶不仁者遠矣迺知仁與智非二說也其理同原其用相須智者所以成其仁者也虞之世極治舜之聖至盛而其君臣相儆戒都俞者民不有康食咨之稷焉民不有恆性咨之契焉民之患在洪水咨之禹焉以至工虞禮樂夔龍垂益之屬所以惇德允元難壬人者惓惓也何也君人者能以心運天下而不能以身爲天下役舜亦豈能徧愛以成仁哉其所急者親賢也甚矣賢者難得亦難知也臯陶揭其要而復推其旨乃曰翕受曰敷施曰載采采言翕受者登庸之廣無隘也言敷施者器使之當無滯也言載采采者綜覈之精無惑也三者所以知人者也知人則哲能官人而安民之惠在其中矣若夫煦煦

焉沾沾焉徒問民疾苦憐民饑寒以爲惠則吾之勢有所及有所不及而民之生有所安必有所未安惠於是窮矣凡在甄陶覆被者林林總總焉得人人濟之是故安民在知人而求所以知人則有未易言者人之在天下也有全才有偏才有真才有似才而至若瑰偉卓犖又不在簿書詞賦閒苟以文學取以資格拘無乃失之隘乎弓旌四出爵賞數加明於明可也揚於側陋可也不避親仇不拘故常不徇毀譽而懷瑾握瑜者至矣然又取其長不責其短用其善不責其過隨才以使論定後官而凡智者志者勇者悉兼收而並納之彼是非易淆情僞叵測尤宜辨識甄別不得以魚目亂珠燕石疑玉也是非以情盡人而以術馭天下也卽舉陶所謂翕受敷施載采采雖治如虞君如舜不能舍此而別有道也自今觀之萬邦盭羣黎若百嘉忻暢其民有不安者乎而謂非急親賢致之不可也彼隘焉淆焉惑焉曰賢不易得也而顧屑屑然日求所以安民者無怪乎說愈長而治愈遠也雖然有本焉在君心

而已矣在相道而已矣舉陶陳知人安民而以敬哉終篇復以襄哉自勵良有以也夫

平古田奏捷 七言律

叢山箐谷久爲巢一旦雄師薄四郊白簡星馳飛露布蒼梧雲淨  
偃霜刀運策帷中良頗牧銘功闕外老嫖姚況逢封貢單于日好  
慰天王宵旰勞

述志論

辛未九月朔日  
閣試第一名

夫人之所以樹彝德垂休光足以稱於世曰聖賢豪傑者流豈偶然哉天之生才也難而才之遭時也尤難卽才具矣時遇矣而始之以根柢繼之以持循或辨不早而趨未正焉差以一念謬以千里將有不善其才而負厥時者是故志爲要定志爲先也譬之射然射者持弓握矢直容正體引滿者其力也貫革者其能也然而不遽發也有括焉括者射之機也必省括合度則釋釋則中彼的矣人之志固行之括也昔者夫子自述曰吾十有五而志於學及



其誘掖羣弟子則曰盍各言爾志夫聖門之學與教豈不欲躬行身迪以從事哉而必於志乎先之蓋志之所根柢者在是斯終身之所持循者在是若劍之於冶卒不出其範圍若木之有本未有本蹶而枝葉茂者也故有始志於正而且雜之以多岐之惑者矣而且繼之以中道之畫者矣固未有不正其志而能有所建立表著於世者今夫乘堅刺肥陟騰躋華與時相浮沈而徒以竊祿位謀身家者此鄙夫之志富貴者也無論也彼殫精研思琢肝鏤腑發朝華披夕秀操觚擗管纒纒然成一家言謂藉是可以垂不朽曰吾志於立言也不知自鴻鉅者視之末技耳若夫長趨緩步高論空譚各立宗旨互相標榜口周孔身程朱曰吾志於明道也及以之肩鉅任重濟艱應變蔑如矣於國家何賴焉卽有負器抱奇宣猷展采足以理煩劇解勞難制千里之命當一面之寄可裨益於國家者乎苟非先定之志卒亦幸成之功君子弗尚也然則奚志乎在純其心焉耳矣慎之於向往之初審之於幾微之際析之

於似是之間要之於始終之久以事君則忠也利於君亦利於身吾爲之非忠也其迹在君其志則身也有利於君不必其利於身也非心之純者弗能也以庇民則惠也益於民亦益於己吾爲之非惠也其澤在民其志則在己也有益於民不必其益於己也非心之純者弗能也以安社稷奠生靈則義也人之所知人之所見吾爲之非義也其事在社稷生靈其志則在知與見也有爲人之所不知所不見乎非心之純者弗能也其發也吾之所自覺也其辨也吾之所自決也其究也吾之所自持也以吾之純然不雜不息者爲之主而時可乘焉才足以施焉將出其所先定者研天下之幾發其所素蓄者成天下之業叢委紛綸賴以整齊辛甘燥溼賴以調劑震撼激撞賴以鎮定忠在君惠在民功烈在社稷生靈而於身於家於人之所知與見又奚遑恤哉噫勛著當時休垂後世績紀旂常光流簡冊遂與古聖賢豪傑媲美馳聲者亦不過自此心一念之純者始之也士方躡履業文爲諸生時稽古之往哲



前修則知慕之且從而仰止之矣睹時之明儒碩輔則知敬之且從而效之矣及見世之斗筭瑣尾脂韋齷齪則知惡之且從而相戒省之矣其義利公私從違取舍之辨非不籌之熟也洎其終鮮不以他念易斯志舉平生而盡弁髦之者干時之術起而巧宦之說投也苟且因循置其身於波蕩風靡中無所底止及當國家事且嘗試漫爲之鮮不償者猶之挾敝弓繳枉矢未嘗省其括之合於度乎否也而遽發焉吾見其百發而百不中矣雖然所謂心之純者眞見君臣上下之分爲吾性中物裁成輔相之責爲吾分內事吾盡吾性而已矣吾畢吾分而已矣固無所損益於中假借於外也使一念之有未純焉雖公亦私也而況於私乎故曰定志者純心之謂也嗚呼皋夔稷契周召畢散帝之臣王之佐也其上也丙魏房杜韓范富歐漢之傑唐之英宋之雋也其次也語有之取法乎上僅得乎中然則上焉者固愚生竊有志焉而未逮也

朔日早朝詩

五言律

清班趨鷺序僊仗列龍墀九月逢周朔千官擁漢儀旌旗秋氣肅閭闔曙光移身際唐虞會康哉祝聖禧

擬辛未進士題名記

辛未九月墾日  
閣試第二名

皇帝嗣統御極秉德綏猷五載於茲爲隆慶辛未維時四郊敕寧百嘉忻鬯方內士翔洽淳風涵泳彝訓會逢資適斌斌乎盛矣頃禮部大比士貢中式者四百人於廷皇帝清問策之以隆禮敦化教民成俗之道賜某等進士及第出身同出身有差已所司循故事請立石題名上命臣某爲之記臣謹拜手稽首言曰夫士之進也必重乎其始故朝廷於士之始進也亦必重乎其名名旣揚於王家藏於天府矣而又勒之貞珉樹之太學豈非欲藉以昭示無疆垂不朽哉然所謂不朽大都不出魯穆叔所論次日立德立功立言夫植節砥行由積斯崇建伐豎勳歷試乃著諸士屈首受書幸一旦離疏釋褐德與功且未有表見迺今日所敷陳固以言揚者也茲其言卽如古所稱可立之以不朽者乎其未耶記有之事



君先資其言拜自獻其身以成其信夫所尚乎言者將以飭行表世安眾軌物杼軸乎天人之理敘正乎經緯之宜繇之可以察時變觀化成也斯其爲迪德之徽音懋功之左券乎唐虞之隆九官十二牧在列德用彰功惟敘棐迪光施彪炳區寓及今觀典謨所載一都一俞必明試而求可底績卽漢代制策亦往往見之行事而隆中壇上籌畫數語迄於今照耀簡冊卒之程方矢能終所措注罔渝初指此豈虛中澤外言不蘄用用不要厥成者哉君子進德修業忠信所以進德也修辭立其誠所以居業也夫修辭立誠以存忠信則其爲言也孰尚焉今諸士之言具在述道義慨然慕古昔至談當世之務則又纏纏然中窾卻豈無一當於利害者藉令舉登對之語盟諸心持以終身次第譬焉毋庸違毋宦怠履素守貞自獻以成其先資之信則雖一言幾乎道而有裨於治亦可以不朽矧惟德與功於忠信乎基之異日者襄翊明昌表見於時以貽無疆之間茲石也俾後世有觀焉曰夫夫也其所爲不朽者

固在彼不在此也臣有厚望矣儻其枝葉之勝而本實漓也修飾藻績攀芳味腴必以藏山之旨爲立言計抑末爾至有嫵媚辭說包伏奸諛以遊徼榮利而又有懷珉襍瓊炫籠瞽之言回易視聽以售其恣睢塗外之術難窺席前之策自悖是士之敝者也且爲茲石羞臣於是乎有餘懼矣是故申告而終戒之如此云

駕幸西苑觀穫詩

七言律

深秋嘉穀滿西阡聖主勤民重所天翠浪翻時迴鶴馭黃雲合處度龍駟農祥正覩方升日史冊應書大有年竊愧素餐無以報豐穰擬進甫田篇

擬總督宣大山西太子太保兵部尚書兼都察院右都御史誥

二月朔日閣試第一名

制曰朕惟秉旄開府聿隆總帥之權推轂授師式重督戎之寄矧山西宣大爲千里要害之區迺塞北戶門實諸夷窺伺之所密邇俺答久肆憑陵每因嚮道以來侵未見追逐而大創蓋因循於積



習之弊悉偷惰為道罪之謀當斯任者難其人矣爾總督宣大山  
 西太子太保兵部尚書兼都察院右都御史某訐謨素定諳練亦  
 深才合於誠夙效馳驅之義文兼以武久推經略之猷試既歷於  
 諸艱知可屬以大事遂司北門鎖鑰允稱西域干城頃者酋虜乞  
 降邊陲息警既執俘以獻馘復率眾而款關雖云天誘其衷實乃  
 人戮之力隨機運策壯敵愾於師中懷遠招攜示誠信於閩外多  
 算而制以勝不戰而屈其心即費賜予之再三亦省輸將於什一  
 方盈廷發議豈暇身圖及為國奏勳遂當首敘茲特授爾某大夫  
 錫之誥命於戲建旌節以綏生靈烈先臣虜聽鼓鼙而思將帥典  
 重酬勞爰加殊簡之恩用著丕嘉之績爾尚克殫心力懋矢忠貞  
 勿以寵盛居功愈不遑於夙夜勿以宦成怠事思永奠夫疆隅遠  
 貽千載之圖上媿兩階之化宜承休命用贊弘基欽哉

聖壽無疆詩

七言排律

運開黃道昌期洽序屬青陽令節逢瑞氣鬱蔥浮帝座祥雲繚繞

護僊宮羣黎快覩方升日四海初回大順風純嘏駢臻應未艾遐  
 齡永駐更難窮南山共效無疆祝北塞新收不戰功世道已躋三  
 代盛皇釐還與萬方同

王道無偏黨論

壬申二月聖日  
閣試第三名

天之道無私者也王者奉天之道以立極本自有大公至順者而  
 己無與焉何則天下之事與物無窮然其理則隨事隨物而各具  
 者也以己處事事失其當矣以己應物物不得其平矣低昂輕重  
 一以己與之則其所設施所措注必有窒而不通偏而不舉者惡  
 能治國家故純王之道存之者公廓然其太虛也達之者順秩然  
 其各當也若執樞以運之持衡以平之調停均節裁度劑量惟其  
 理之所在而已矣不觀之天乎天之所覆育者至曠也雨露以潤  
 之雷霆以震之雪霜以摧之春夏以生之秋冬以斂之洪纖高下  
 動植飛潛有榮華者有枯瘁者有栽培者有傾覆者有長養者有  
 天折者是其所本具而各足者然也天無私也王者以純天之心



行憲天之治是烏容與之以已哉彼恃吾之名號威爽足以攝天下而喜怒順逆惟吾意者徇己者也若夫周旋顧瞻煦煦焉鰥鰥焉違道干譽而曰吾不敢已與之也是徇人者也徇己者私也徇人者亦私也惟一念涉於私而後生於心害於政倒置逆施邪思僻行其流弊當有不可勝言者是伯術也而於王道乎始病矣王之道何道也奉天之無私以立極於天下者也事事物物莫不有當然之理亦莫不有各得之所吾之所以處事應物者惟無悖於理而使其不失其所焉斯已矣名實不足顧也嫌疑不足避也恩怨不足論也毀譽不足卹也利害得失不足計也正大光明公平溥博一言動也己之所獨發亦必人之所共覩者也一舉措也己之所獨斷亦必人之所同然者也以事處事以物應物處之應之者我而其所以處之應之者非我也理之在事物者本如是也是故進退一人必賢之可進不肖之可退而後進且退焉己之親與仇不與也賞罰一人必其善之可賞惡之可罰而後賞且罰焉己之

好與惡不與也其興革必利之可興弊之可革而後興且革焉己之喜與怒弗與也然不但已也其進之賞之興之也理之所在雖千萬人非之弗顧也其退之罰之革之也理之所在雖千萬人是之弗顧也何者吾之心無私也吾以無私之道御天下則駢脮枝指與心腹腎腸同其愛也窮簷蔀屋與闕廷輦轂同其視也夷狄禽獸林總烝黎等其仁也星辰日月吾布運之山川草木吾奠安之陰陽氣序吾調變之卽有榮華枯瘁傾覆栽培長養夭折之不齊不能無遺憾於吾而吾固無忝於裁成輔相之責無歉於化育參贊之功也何也吾之心無私也是道也此之謂大公此之謂至順堯舜禹湯文武之所以建極於上者此也皋夔稷契伊傅周召之所以輔極於下者此也迨夫王降而伯焉功利之習興驩虞之術起有徇私而滅公者矣有假公而濟私者矣亦有似公而實則私者矣偏陂反側而日遠於蕩平正直之道無惑乎風日下而治愈以衰也噫是在建極輔極者挽斯世於二帝三王之盛



春雪詩 七言律

二月都城春色饒忽看微霰灑漉漉辭條尚憶梅花落捲幔俄驚  
柳絮飄玉屑隨風斜復整瑤塵避煖積還消長安應有號寒者誰  
軫民艱達聖朝

擬進世宗肅皇帝實錄表

壬申閏二月朔  
閣試第三名

伏以皇猷赫奕煥唐典於虞廷聖孝纘承光文謨以武烈乾坤並  
久日月重輝況當四海無虞之時式成萬世不刊之典燕翼之謀  
永垂後禩而鴻圖之紹克纂前修欽惟世宗肅皇帝剛健中正睿  
智聰明繼離照以大觀秉乾剛而獨運享國最久致治綦隆孝致  
尊親肇一王之典禮祀分郊社釐萬古之綱常玄默躬修誠能格  
帝農桑首重念切勤民雷厲風馳羣辟祇承於聖斷天覆地載歷  
年誕布其神功蓋誠上治之洪猷而中興之邁軌也茲蓋伏遇皇  
帝陛下執樞御極秉錄綏猷思繼述而罔愆儼羹牆於如在事惟  
師古當方策之具陳而孝在尊親必德業之備載乃命臣某等為

總裁副總裁纂修等官給筆札於尚方啟圖書於祕省條分類析  
綱舉目張十館分曹諸司列局偶搜遺而備述祇據實而直書凡  
典章文物之煩至因革建置之蹟無前曠典貽法守於將來不朽  
宏猷稽憲章於往昔編年以紀成寶冊而上陳何日可完煥綸音  
而下問仰見聖衷之塵慮敢糜官廩而廢時繫日繫年紀言紀動  
前後盡四十五年之行事鑒戒為億千萬載之成書謹襲雲函恭  
塵電鑒臣等才乏三長力窮一得仰巍巍之極盛知蕩蕩之難名  
伏願監於成憲率以舊章善繼善述熙洽而殫厥心不愆不忘幾  
康而安汝止廟謨恢遠永保不二心之臣國祚昌榮重光大一統  
之業

勸農詩

五言古

二月春已及農人事西疇陽和膏土滋嚶嚶有鳴鳩東作自此始  
驅犢向隴頭耕耘不辭苦相將所有秋生計良在茲當為卒歲謀  
豐歉不可期踪跡或飄流嗟彼逐末者齋輕好遠遊豈無逸居者



朝夕但悠悠饑寒迫身時窮困誰與調胼胝奚足惜數口藉一邱  
俯以實蓋藏仰給公家求禾黍既在場汗邪喜滿篝孰言黽作勞  
含哺何夷猶天子況明聖蠲租軫民憂艱難小人依王業且興周  
願爾務農者諦聽勸農謳

擬正士風疏

壬申三月望日  
閣試第七名

臣竊惟知禮義服教化窮而處也足以正己達而出也足以正人  
然後謂之士士者民之倡也士風之邪正世道之汗隆係焉昔者  
漢文帝襲承平之休際富庶之盛當其時賈誼稱通達國體而治  
安策所太息者乃謂俗流失世敗壞欲使天下移風易俗回心而  
嚮道夫誼之策豈無見而漫言者蓋承平既久法紀日弛而富庶  
之餘風俗世降其趨也有潰敗決裂而不可挽者是烏得不重爲  
之憂而亟反其漸哉臣學非用世識不通方戴高厚之恩而圖效  
涓埃之報無由也切見近世數十年閒政本未端士風漸壞或執  
樞秉鈞者運之稍有所偏斯沿流趨勢者習之遂踵其弊實意亡

而浮議作空譚侈而僞行興長慝蓄奸務爲容納殉名昧實互相  
比周遂使奔競者假恬退以干進險賊者事擊搏以沽名矯詐者  
飾言貌以惑世恣睢者逞氣力以陵人澆忍者務脂韋以取容側  
媚者揣意旨以希寵教化陵夷習俗頹敗甚者憑藉氣勢肆行胸  
臆蔑視綱常僭踰禮度下抗上賤陵貴疏閒親眾暴寡其流風積  
敝有不可勝言者而上之人猶煦煦于于茹納姑息計微長厚之  
稱循默涵容釀成夸詐之習且日將以養士氣也而不知正以壞  
士風也其由來者漸矣皇上御極以來圖惟治理敦尚化原而政  
府銓曹之臣秉公持正革故鼎新海宇回風衣冠生色爲士者幸  
值明盛固宜滌慮改絃服教興行矣然據臣所聽觀今縉紳之士  
列輦轂服職役貪墨者懲偷惰者汰矯僞者黜奸諛者息官常振  
飭吏治肅清卽其閒有一二未盡然者而處置之無難也但學校  
之士在郡邑者觀聽稍遠德意未孚申戒徒勤習染如故工文詞  
者皆口耳之資譚道學者鮮身心之實卑汗則競逐錐刀甘受屈



身會堂集三  
辱強悍則陵轍官府妄肆譏評恣無厭之謀而自圖便私造不根  
之謗而互爲擠傾卽其閒亦不無一二未盡然者而轉移釐正之  
固不易也況今日學校之士卽它時縉紳之士也有修之家而壞  
之廷者矣未有失義於窮而能不離道於達者也故曰有善俗斯  
有善治臣擊目概衷也久矣謹條列所以正士風者八事曰覈名  
實曰重德行曰肅綱紀曰禁驕奢曰遴師儒曰嚴去取曰興社學  
曰正文體夫名者實之賓也上以實求之下且有以名應之者矣  
而況於循名昧實乎干譽之念起斯違道之行多舍己之學趨時  
所好內懷躁競外示洵誠其始之矯節清聲無非爲取寵干時計  
及其後也且自矛盾而弁髦之或者曰三代而下惟恐士之不好  
名也亦妄矣此名實之所當覈者一也士方幼時稍有知識卽工  
爲文詞曰藉是以取科第躋華廡足矣而孝弟之行廉恥之節無  
聞焉今學校三等簿卽虞廷書以識之之意也愛憎毀譽之私安  
能當賞罰進退之宜哉況以優而蒙賞者恆多以劣而被黜者恆

少是劣者不終黜而賞者又未必優也市恩私而務姑息敝也久  
矣若夫遺逸山林不無砥礪行檢者弓旌聘幣閒一行焉可也此  
德行之所當重者二也孔子曰必也正名乎蓋名以分定心與分  
安綱紀所由立也今爲士者集儕類借衣巾十百爲羣挾持干請  
攘臂其閒卽有司莫敢誰何是陵上也又有心術奸詭體貌卑詔  
執贄通名伺候公門拜謁當道者爲師師之者將有以用之也此  
在各省尤爲積弊是援上也援也陵也豈士之分耶此綱紀之所  
當肅者三也書曰驕淫矜夸將由惡終蓋驕則不遜奢則不檢風  
俗所由敝也今爲士者身襲紉綺口厭膏粱競爲侈靡爭相馳騫  
而冠婚喪祭之儀鮮克由禮當刊行等殺嚴立科條士能守者是  
民望也獎之進之無後焉士有犯者是罪始也威之懲之無貸焉  
庶法令之行不爽而抑畏之風自成矣此驕奢之所當禁者四也  
師道立然後善人多師者所以傳道所以範俗職莫重焉今大學  
尊官簡授名碩無議已而郡邑師儒係一方表率不無齒暮途窮



竊升斗延歲月者而教之不行不問也乃謂歲有常貢貢有定職此優老卹貧之例也謬矣尸素殊多弛廢益甚此師儒之所當重者五也士羣居則行不及義人眾聚則勢不可撓今督學使者閒歲至進者什百而黜者僅二三焉月積歲累遂至一學幾千人者其閒賢者少不肖者多黨類漸盛約束愈難其初意以爲附學名目無廩餼之供且以市作養之恩也而不知容奸長亂實茲始矣此去取之所當嚴者六也古者鄉有序黨有庠閭胥族師養育教誨之俟成材然後以次升之學斯士無躐等之念有循序之教也今郡邑設社學卽鄉序黨庠遺制乃其名徒存其實盡廢士方童齟句讀時卽操觚挾冊應試而干進矣倖偶中焉遂成浮薄躁妄之習而於少儀弟子職諸事悉視爲迂緩夫安得士之知退讓謙和也此社學之所當興者七也辭尚體要斯言無枝葉科舉本意取說理近道之文而尤以時務終焉正欲因文以觀人庶可以掄真材而裨實用也然浮華日甚體要愈漓勦說侈譚沿迷襲瞽及

條答時務則又空虛不核庸腐無當主司者亦且收之夫安得士之盡洗舊習務臻實效也此文體之所當正者八也夫名實覈則誠者進而僞者無所售其欺矣德行重則善者有所恃不肖者有所畏而不敢爲矣綱紀肅則上下相安無渝分矣驕奢禁則禮法是循無越志矣師儒遴則職業舉而教化行矣去取嚴則簡核精而朋比息矣社學興則自少至長皆有以端其習矣文體正則以言取人不至於大相背矣如是而士風其有不正者哉雖然有本焉皇上者四方之則也萬邦之所效法伏望執機運化敷教綏猷端好尚以導之趨樹標準而建其極然後責成臣寮整齊法度勵明作之權毋爲姑息之政斯比屋有可封之俗羣黎皆待用之賢矣惟聖明畱意焉

待漏

七言律

銀漢微茫玉漏長層霄瑞靄鬱蒼蒼周廬曉列三千士華袞朝垂十二章東壁長庚猶帶月上方初曙欲生光明君勤政求衣早仁

聽傳呼出未央

飛龍在天頌

壬申八月朔日  
閣試第四名

臣惟帝由震出龍德正中后配乾行鴻休萃止位登九五事匪尋  
常蓋自天人交與舜華協於堯勳曆數攸歸文謨光以武烈赤符  
開受命之徵紫極煥握圖之瑞億萬世正統所屬五百年昌運方  
隆四海傾心利見一人首出百神受職共祈千載躬逢易曰飛龍  
在天夫德施覆載神變化於不測也有龍之象焉澤沛寰區乘風  
雲而有作也有飛之象焉位極崇隆撫輿圖而下濟也有在天之  
象焉出潛撫世秉錄當陽必以上聖之德履至尊之位際邳隆之  
運勵不息之行斯可以無忝名稱而大慰中外也羲皇以前遐哉  
邈矣唐虞而下猗歎盛哉若彼青雀黃龍之配瑤函玉版之藏炳  
炳烺烺照耀史冊殆自古則然於今爲烈者茲皇上泰道方熙離  
明繼作養蒙紫禁岐嶷夙成毓位青宮元良久繫迺者上遵憑几  
遺命下慰伏闕輿情大人造而庶物咸亨聖君作而萬物快覩乾

坤再闢十一葉而愈光日月重輝億兆年其伊始雲霄佳色祥光  
繚繞護僊宮海嶽效靈瑞氣鬱蔥浮帝座睠茲華夷罔不率俾凡  
有血氣均切尊親五運應符十齡御極蓋玄錫適當夫昌會而冲  
年更邁於前休者也矧惟卽位猶未逾時睿智絕倫神聖莫及恩  
覃涸轍惠浹黎元敕羣僚簡眾職與之更始諭以維新乃若表展  
臨朝平臺議政肇舉曠典率由舊章所以整齊海宇明示意向者  
仁聲蓋九有聞之而聖主可一見決矣是以僻壤窮陬黃童皓叟  
莫不忻忻喁喁矯首跂足易聽改觀荷霖雨之方溥慶陽和之始  
布也仰惟聖德俯繹易爰信哉六龍馭日萬曆永年哦大明澤下  
土謂不干載一覲哉臣竊誦說往昔受命有頌中興有頌亦以身  
際昌期躬親盛事乃託之詩歌風雅庶幾闡揚至美昭示無疆臣  
列職交戟極知愚陋靡由紀述宜播是懼謹拜手稽首以獻頌曰  
於惟皇王受命惟昌繼離出震濬發其祥天錫明祚昌熙邁古十  
有一傳運隆當午神聖敬承聲烈鏗鉤繼盛彰美文武允繩迨茲



中葉鴻休攸集曆數在躬方升擬日昔潛於淵旋躍在田前星炳  
耀龍德承乾風雲邁會翔騰五位握樞當陽汪澤始沛搏彼扶搖  
薄於九霄改觀肅視曾不崇朝紹國伊始有王元子令聞洪猷服  
哉惟旨黃雲赤符克戡簡孚布德覃化文命四敷嗣大厯服霖雨  
既霽眎彼飛龍茫洋陵谷精白迂衡下濟光明丕承丕顯履昌撫  
盈視遠聽德任委平格夙夜弗遑作明明辟惟臣惟鄰附翼攀鱗  
因之名世生也及辰神人川嶽莫不成若哲命自貽懿休卓鑠惟  
明則良業顯志章億千萬載惟休無疆

梓宮發引輓歌

五言律二首

九天攀去輦五嶽荷前驅縞素瞻僊仗淒其望鼎湖市喧知巷哭  
山靜咽嵩呼滿路饒秋色能令魂夢徂

正當持泰日豈是夢齡期玉嬰移金闕丹霄列素旂四方同玉帛  
六載馭華夷會見朝陵柏能生萬歲枝

郊廟祀典議

壬申八月望日  
閣試第一名

竊惟國之大事祀也而祀之大典郊與廟也蓋天施地生生成萬  
物而人主以一人參兩間是故郊以饗帝者所以明報本之義也  
祖功宗德本支百世而人主以一身承大統是故廟以饗親者所  
以明追始之義也義也者禮之所由起情之所由達者也協於義  
則宜因因非沿襲也因其所不可革者也是之謂述者之明拂於  
義則宜革革非紛更也革其所不當因者也是之謂作者之聖我  
國家定制垂法至善極備郊廟祀典二祖創之列祖承之而世宗  
肅皇帝復斟酌裁定於其間後之爲子孫臣庶者惟敬守之耳而  
何容輕議也然皇上握符御極厲精圖理陟雍熙之祚操制作之  
權而殫忠畢智之臣正本識微之士莫不思淬勵贊襄興禮樂而  
躋隆盛正更始維新之一會也乘時機定因革觀會通行典禮明  
聖竝隆述作兩盡不有望於今之時乎夫郊丘分祀周制也燔柴  
升禋瘞埋達氣則分祀之說尚矣顧自周而下繁言異喙至開元  
元豐而合祭之儀始定然以合祭爲非者范純仁劉安世之言可



考也世宗肅皇帝詢於僉謀裁以宸斷建壇分祀尊祖配天園丘  
方澤異其所冬至夏至殊其時誓戒必嚴致齋必恪省牲必躬裸  
獻必親蓋其欽天之敬享帝之仁誠與虞廷肆類之文周王禋祀  
之典曠世同揆者也至若廟之祀典有始祖有世室合昭穆之廟  
而爲九焉有百世不遷者有親盡則祧者亦周制也今內有奉先  
以藏神主而每月一薦外有太廟以藏袞冕而每歲五享洪武時  
以德祖殿爲始祖至英宗晏駕始備九廟迨憲宗祔廟之時奉祧  
懿祖及睿宗入饗奉祧德祖德祖不當爲始祖宜推太祖造基之  
烈全主廟南面之尊先臣倪岳楊守陳及嘉靖中諸臣之議具悉  
也夫二祖功德隆盛固百世不遷者懿祖而下宜以次祧祧主奉  
安於太廟寢室倣古夾室之意祫祭則出之茲穆宗莊皇帝山陵  
甫畢升祔有期矣據他時所已行今日所宜尊者言之則宣宗之  
主宜祧亦無議也乃愚聽瞽見猶有議請得而正言不諱可乎嘗  
聞之曰自仁率親自義率祖夫仁則歸於厚而義則近於斷也善

繼志述事夫繼述爲孝而尤必謂之善固有神明通變之權在焉  
不必循常經守故轍而後可以繼述者昔成周尊祀后稷於南郊  
以配天宗祀文王於明堂以配帝此盡制盡倫之典也魯之僖公  
兄也閔公弟也又均之爲國之君也特以先後之間猶謂不得論  
兄弟之序躋僖於閔之上以親親害尊尊春秋蓋譏之夫觀於周  
而知明堂之禮當備也鑒於魯而知祔廟之議當嚴也今南郊之  
祀尊祖以配天矣而明堂大饗之議猶有未備太廟之制祀先以  
崇孝矣而向時入祔之典或有未安世宗肇建明堂而其所宗祀  
者欲以獻皇帝媿周文王在廷咸難之其事暫寢暨其後也遂附  
主於太廟之中列位於武之上矣夫世皇繼統而不繼嗣者大義  
也獻皇帝稱廟而不稱宗者公論也追崇皇考爲帝者至孝也別  
立世廟以祀者令典也蓋未有北面臣之而可以並廟享者也不  
易之典偶以純孝之心而或移無窮之思不因有限之制而遂屈  
當時一二輔臣將順之是果獻皇帝之心之所安乎卽世宗之心



豈不欲獻皇帝血食萬世以慰其孝養之一念也卽四三傳焉而太廟之主不容於不祧者勢也乃世廟之祭則可以獨全其尊永享其祭而保啟佑之功於無疆者故議者謂乘穆宗入祔之時復世宗別祀之制則宣宗之主暫可不祧而獻皇帝之靈亦當永安矣是固一說也若明堂之饗與南郊之祀固相爲表裏者故議者則謂宜推穆宗尊稱之意正世宗配帝之尊及時修舉永世遵行是又一說也夫如是則因革適宜典禮咸正而於我皇上明聖之德爲兼隆繼述之孝當有光矣若謂斯言也非臣子之所敢言亦非君相今日之所欲聞者而議不出此則郊廟祀典當行之今日者不過具例陳數諷吉修儀一秩宗禮官職耳奚爲議

講筵初開紀事

七言律

翠華高接紫微平秋色方中御幄明繚繞奎文纏北極殷勤天語下西清諒陰方切商宗慕訪落仍深周主誠聖世崇儒從此始應知沃德屬元卿

重刻通鑑紀事本末序

壬申十月朔日  
閣試第二名

夫考古所以鏡今多聞藉之建事史之錄亦大矣蓋代遷者時運之流世變者經綸之迹治亂存亡邪正得失上下百千年間至紛紜轆轤矣然其原委纖悉卽事事有本末終始焉自始之末原始要終其幾甚微其究不測其來有漸其變靡常必會通之融貫之而其精神心術之運用善惡鑒戒之昭垂然後可以舉其全辨其詳因以求其故而得其意也此紀事本末所由作也噫史之學亦難言哉識達事幾道適世用才足以知難通之意文足以發難顯之情斯可語信今傳後耳自左氏國語以下卽遷固稱良史且不無遺議焉若彼范曄陳壽輩代各有紀人各有纂事詞尚誣冗而於道法也多悖戾矣有宋司馬氏探歷代諸史起自周威烈王迄於五代爲資治通鑑通鑑之所紀者以日繫時以事繫日是編也其於史之才姑未暇軒輊卽其舉類旁搜標題畢集周覽以致詳悉觀以盡蹟使事事若在目前而陳掌上者其有功於古昔而嘉



惠於將來者固甚鉅是豈特經生學士資之以侈譚說洽耳目哉  
願治之主矢忠之臣而能時時誦說所聞則於其治其存其盛其  
得隨事而識其本與末矣於其亂其亡其衰其失亦隨事而識其  
本與末矣以察事幾辨析至當以求理要從違不差是固龜鑑之  
所存而鴻烈之所由隆也其有裨於世也願不偉歟雖然亦存乎  
人耳愚不敏竊嘗謂讀史有術焉遇一事當有處一事之法古猶  
今也觀其震撼盤錯之衝與夫隱淵倏忽之際試以吾之身當其  
時處其地將何以也而後稽其事之本與末焉斯是非定取舍明  
而於家國天下也靡施弗周隨感輒效矣此固袁氏之旨也夫亦  
今日重刊以廣其傳之意也夫

送三司馬閱邊

七言歌行

塞外秋高草具腓烽煙久息塵不飛解甲弢戈休將吏封疆申畫  
固郊圻坐見皇風通宇宙行看旭日耀旌旂新王正履維新會一  
日猶云有萬幾昨降溫綸詔司馬爲予往閱防邊者推轂須知寄

重權矢忠報國應無假暇日優爲圖永寧長城屹自堅清野按籍  
程能別情勤稽功列狀誰多寡長安道傍祖帳開腰橫短劍光皚  
皚旄頭失色威靈布將星耿耿明中台輕裘緩帶巡行處先聲所  
至何雄哉呼韓稽顙方明盛會使梯航徧九垓君不見漢營細柳  
不馳蹕唐室巡邊饒張說嫖姚胷中饒甲兵司馬自是今三傑

忠清仁辨

癸酉二月朔日  
開試第五名

嘗讀魯論紀孔門答問之教陳文子曰清矣令尹子文曰忠矣而  
仁則皆不與焉夫二子之清也忠也亦惟據事而許之以迹也其  
不得爲仁固不足辨也或者曰忠以盡己清以潔身苟其心純乎  
理而不出乎私凡無所爲而爲者卽仁也是故比干之忠殷之仁  
也伯夷之清商之仁也夫子之不與二子者且謂其未得爲忠未  
得爲清耳烏有忠之至清之極而不得謂之仁者乎愚竊以爲不  
然蓋仁者并包萬善統括百行語其端則凡有一事之偶合者亦  
仁也舉其至則凡有一毫之未盡者亦非仁也仁固具於性者知



皆擴而充之則尤係於養矣惟其具於性也性之呈露或有見於忠而忠焉或有見於清而清焉卽忠之至矣清之極矣謂其得仁之一端可也而謂其盡仁之全體未可也惟其係於養也養之而至焉析天人之介嚴理欲之幾大公無我順應以時無將迎無意必循理而行不牽於應迹隨事而施不膠於成心朕兆未萌機緘未露淵然有獨知之慮灼然有先見之幾確然有不可易之守及夫事物旣交法象旣著其所以默成丕運於世者沛如也無勞功無智名無矜容無德色苟無歉於心已耳而不必於忠也苟無辱其身已耳而不必於清也卽忠在萬世而不見其忠也卽清嚴一介而不見其清也究而極之比干之忠伯夷之清且不可謂全體之仁矣而況其下者乎就而論之則雖管仲之功晏嬰之言夫子且以仁許之而況其上者乎故曰中心安仁天下一人而已矣何也就其資之所近而資之者爲易呈其性之所具而充之者爲難忠也清也凡資之近者能之卽忠至清極亦因此而致之者也若

夫仁則必係於養矣養豈易言者哉故仁則無不清無不忠而又不可以忠清名也苟謂忠之至矣清之極矣而卽可以概夫仁焉仁固不可若是其幾也嗚呼此忠清仁之辨也請質之以古聖賢之事伊尹有見於先覺之任在我而生民之昏墊宜拯也應湯聘而革夏正不卹也使以安常執諒者律之將不爲忠矣而顧無害其仁焉以道以義固無歉於其心也仲尼有見於斯文之責在我而天下之亂當與易也季氏可仕公山氏可往不辭也使以潔身避地者視之將不爲清矣而顧無害其仁焉不溜不磷固無辱乎其身也無辱其身無歉於心而亦烏病其忠與清哉愚故爲之說曰陳文子令尹子文有忠清之迹者也比干伯夷致忠清之極者也管仲晏嬰偶合仁之一端者也伊尹仲尼能具仁之全體者也若夫箕由之清清而矯者也豫讓之忠忠而過者也至於以兵諫爲忠以辟兄離母爲清是又忠清之賊而爲仁之害也是故不可以不辨



蒙賜御筆大書紀恩

七言律

侍從何堪補衮才親承聖藻自天裁雲龍嘉會逢昭代奎璧祥光  
出上台一德格天心正切十行賜札寵方來忠良願竭涓埃報萬  
曆恩輝徧九垓

擬御製思企顏會十六字箴頒賜輔臣謝表

癸酉二月望日  
閣試第一名

伏以道由心契仰聖學之淵宏文自天成渙皇謨之赫奕光昭道  
統榮溢儒紳既滂洙泗而濬其流遂頒綸綍以示之則忻承晉錫  
喜切豫鳴恭惟我皇上執樞御極秉籙綏猷繼離照以重明攬乾  
綱於獨斷明倫盡制釐萬古之常彝欽天有文闡百王之祕旨一  
敬已由於心解四箴務措之躬行希賢則賢謂宜敷求往哲既聖  
益聖尚圖克紹前修四勿求仁深惟克復之訓一貫悟道遠乎忠  
恕之傳謂二子之懿休爲羣賢之芳躅斯文有寄正學相承爰啟  
宸衷特紓睿藻羹牆如見學惟能自得師密勿先頒心欲與人爲  
善蓋匪游情翰墨實將注意表章卽虞廷十六字以來此其曠見

自孔門二千載之後果得真傳垂訓明徵詞不費而自足敷言體  
要理隨在而孔彰作聖述明文已昭乎雲漢經天緯地道尤煥如  
日星寶帙輝煌掖垣生色琅函璀璨闕里增光荷寵渥之自天懼  
對揚之無地允矣大猷之盛軌迺哉上聖之弘謨也臣等職叨補  
袞慚無啟沃之功教切書紳敬殫仰瞻之志躬逢堯舜誦典則以  
欽承心慕顏曾思步趨而矜式敢不揭諸左右見聖道於丹青奉  
以周旋竭臣忠於精白以不惰見於事敢冀回愚以勿欺盟諸心  
靈爲參魯恭捧十行之賜勉期一德之交伏願建皇極而敷猷觀  
人文以成化實踐於上酌禮樂以爲邦允執厥中公好惡而絜矩  
作明明后治統因道統而有光受丕丕基國運與文運而俱永臣  
等無任瞻天仰聖激切感戴之至

賦得日再中

五言十二句

陽德重熙候離明繼照時迴輪臨沆瀣駐景耀罕恩餘晷還三舍  
中天緩六螭昌期方炳鑠化國正舒遲未見應先慮當盈欲善持



願傾葵藿赤永奉皇禧

擬越裳獻雉賦

癸酉三月朔日  
閣試第五名

伊皇周之奕葉兮播太和以重熙嗣謨烈而式序兮方履盈其受  
釐元相惟德之勤兮輔明辟於垂衣錫羨卹膺寶錄而凝庥兮  
敷天命於時幾繼離保泰仰丹書以作則兮光帝德於華夷繫越  
裳氏之遐逝兮知中國之有聖繼緒者穆穆負展者明明迂衡一  
德綏猷四境波氛已恬休徵時應美矣復彰傳之益盛邛夔方遙  
裔奉王朔以爲正豈自阻於炎荒亦願覲夫文明之彪炳通鞮譯  
以來王叩疆關而請命絕域窮徼回面易聽編髮駢趾異飾詭覲  
望帝闈以咸賓兮欽皇綱之維競旣梯航而至止兮覩禮樂之續  
紛執方物以爲贄肆庭實其何所陳惟服食器用爲德之致兮迺  
弗產於粵濱雖火齊夜光之璀璨兮恐寶玉之不見珍鳴岐之鳳  
游藪之麟旣充致夫上瑞又奚假於遠人睠皞雉之純潔實羽族  
之靈馴必聖德之被物故天心之示禎遂底貢乎萬里庶輸款於

九宸華哉爲文曷乎其翼形迷夜月之光影借朝霜之色聿呈祥  
於素絲欲增輝夫赤舄彩移團扇之陸離用備武干之煒奕豈興  
歎於在梁匪解顏之可弋邁殷宗之鼎雉兮茲神休之申錫同禹  
甸之夏翟兮更來儀於重譯維時鸞輿御朝鵷序列行化覃海寓  
德洽泳翔集羽林而駿奔紛虎賁以鷹揚詔司賓陳懷遠之儀兮  
走玉帛之趨躄俯雕題而就位兮瞻鶴馭以欲颺隨鴻臚而稽顙  
兮獲上翊於明光豈異物之足貴兮亦誠享之所將惟來者之不  
拒兮庇我闈於八荒造指南之車以導其歸兮示綏柔之不忘旣  
命太史爰考舊章惟吾周之開國乃覆翼以爲祥嗣赤鳥之薦瑞  
肆蒼錄其寢昌覽茲白雉獻自南邦彰純休之方篤驗火德之當  
陽奄溥澤於鳥獸豈讓德於虞唐稱鴻名於罔極垂駿烈於無疆  
亂曰景運邳隆泰階平兮皇極懋建文教明兮鳥獸魚鼈罔不寧  
兮紹基嗣服撫盈成兮越裳遐陬暨聲名兮濯濯者雉獻於廷兮  
惟德致物鑒彼誠兮卷阿矢音此其鳴兮昭受帝眷永底民之生

兮

二月聞漕舟已過洪入閘志喜

七言律

春半風恬浪亦柔喜聞漕輓入安流漢庭足餉遵何約唐室輸財  
仗晏謀籌畫已爲邦國計經綸先慰廟堂憂大官素食慚無補應  
念東南力未休

本朝立國規模綱目如何論

癸酉三月望日  
閣試第一名

立國其猶作室乎作室者其經營之始必相度方隅諏咨廣狹鳩  
工庀材絜短計長爲大匠者迺引繩持墨枘址闢基卒之崇卑敞  
隘舉不出範圍疆理之中此其規模也垣墉必固藩衛必嚴棟梁  
必擇而凡所以維持措置於其閒者此其綱也若夫勤樸斲塗墍  
茨列榱桷通戶牖纖微曲折亦必綢繆修飭焉此其目也惟規模  
宏遠綱目具備斯可以稱巨麗矣立國之道何以異此蓋自昔英  
君誼辟創業垂統有一代之興必有一代之制惟其議法於初也  
至精至備故其貽謀於久也不愆不忘卽三代稱邇隆矣而以成

周爲獨盛焉亦以其規模綱目監夏殷而益之謨烈啟佑咸正罔  
缺使子孫千萬世守之雖至今存焉可也知成周卽可以論本朝  
矣太祖天挺神智躬擐甲冑提尺劍逐羣雄奮淮甸之閒掃胡元  
之穢及其得正統膺大寶經綸草昧講畫精詳而成祖興師靖難  
踐祚承乾運英睿之謀計靈長之策當其時名臣碩輔畢智殫忠  
相與考究贊襄於其下監歷代之流弊倣成周之遺規凡錫極敷  
猷體國經野設官分職立綱陳紀所以著之章程頒之法制者二  
祖之立國固卓越百王範圍千載矣今載在祖訓會典諸令甲等  
書方冊所陳科條至密固未易以更僕數也竊窺睹大者如削平  
僭僞肅清華夏嚴明迪亂威懷並流至於鼎新以革其敝資飾以  
釐其蠱者悉裁自淵衷出於獨斷如兩京並建形勝得矣十三省  
分列疆域理矣尊號未上而立宗社以定本也戎務方殷而設學  
校以崇文也改元之中書省而置六卿使政本有所歸去宋之樞  
密院而立五府使兵權有所統闔寺止給掃除之役后戚弗干政



事之權五刑不得復用欽卹之仁也四夷不得輕伐窮黷之戒也南郊饗帝而一歲一舉足以通幽明之故初服紀元而一世一改足以正曆數之傳祀典舉而四瀆五嶽之封號盡除經術明而諸子百家之偏駁無取春宮之屬不設專官杜巫蠱之禍也藩國之封不攝民事防淮齊之變也啟忠萌賢之篇昭臣度也存心省躬之錄示君範也臥碑監規之頒正士習也資世教民之訓淑民行也別善惡則有大誥以示勸懲詰奸慝則有大明律令以權輕重諸司有職掌而內外大小之相屬稽古有定制而尊卑貴賤之相安禮儀酌於牛諒履其中矣樂章定於陶凱宣其和矣此則舉其綱耳至若朝覲貢獻之儀章服品式之制爵祿等威之辨奢僭侈踰之防兵食屯鹽之法征輸稅役之務至煩委也亦莫不通變盡利經理適宜統紀相維纖悉具舉豈不燦然明秩然備哉蓋二祖創之列聖守之潤飾鴻猷昭垂燕翼培植既固締造惟勤將使後之嗣基紹服者卽委裘之主亦可以享垂衣之休也今夫守三尺

出一令於殿陛之間薄海內外朝發夕馳雷厲風颯無敢有攜心越志者威命靈爽侔乎造化而紀綱法守足以警服華夷固如此也不則土木啟戎閹權竊柄劉賊之亂盜藩之師何異於漢之王董宋之徽欽與夫黃巾淮南之變邪然皆不移時旋踵而轉危爲安易亂爲治者國威素著而皇猷易布也憲度肅將而人心易懾也繇斯以談其係於立國之規模綱目者非淺鮮矣何也周監夏殷而損益之本朝則懲漢唐宋之失而斟酌之是故可以獨超前代媲美成周也譬之作室者然公輸運巧班倕矢能其所以範圍疆理之者旣極其宏遠而所以維持措置綢繆修飭之者細微周折靡弗至焉固可以繫苞桑奠盤石也雖風雨之或侵局鑰之偶失苟一葺整而緘固之又奚損於室之巨麗乎噫舊章具在成憲可鑒也是在聖君賢相主持於上率作以省其成而已矣書曰有典有則貽厥子孫丕顯丕承光於謨烈愚何幸躬逢其盛

禁中春雨詩

七言十二句

鬣鬣輕雲覆禁城霏微膏雨潤宮旌煙凝柳色渾添弱霧浥花容  
覺倍明太液波融翻語燕上林枝溼坐流鶯九霄佳氣三春滿十  
里芳塵一日清湛露先沾周室澤爲霖應慰傳巖情侍臣最是承  
優渥涸轍從教沐太平

平嶺賊露布癸酉四月望日  
閣試第二名

臣惟王者奉無私而馭極威懷並流聖人懲不軌以綏民戎兵克  
詰故自作之孽罰所必加卽全盛之朝兵誰能去旣干國典難道  
天刑矧當四海無虞之時豈容一方不獲其所惟茲東粵屬彼南  
陬箐谷叢山久作逋逃淵藪瘴江炎海實爲險阻憑陵荷挺而呼  
朋濟漸熾揭竿以集巢窟滋多不安草莽之生大肆萑苻之毒擄  
掠我財帛虔劉我人民歲月旣深惠潮尤甚日惟依狐鼠之城社  
盤踞成羣時或借魚鳥之波濤聲勢相倚遂作綠林之寇每弄潢  
池之兵化赤子爲蜴虵陷蒼生於塗炭介冑之士欲其發大役以  
經始孰肯先登守命之官僅於堅清壁以苟完恆思自保惟因循

於已久竟延蔓而難圖乃使里巷爲墟在在荒蕪之象閭閻失業  
人人愁歎之聲擁眾而來計不出乎招撫得利以遁勢愈逞其凶  
頑蟻聚蜂屯雖係脅從之黨狼奔虎視已成負固之雄地止一隅  
害實貽於境內風聞千里化且阻於域中是聖世所不容王師之  
必誅者也恭惟我皇上躬上聖之資履邗隆之運體元伊始萬幾  
恆事於勤圖理方殷一念不忘乎遠因臺臣之建議下司馬以詢  
謀廟議旣詳皇猷乃布授之成算特隆闔外之權命以專征已決  
幄中之勝臣等仰承德意旣宵旰以靡寧俯矢忠猷敢夙夜之或  
懈軍需十萬得請給於尚方甲士百千聽調集於他省隨機順勦  
誓不與之俱生乘勝長驅滅此然後朝食於某月某日以總兵臣  
某統將吏則申令於畫戟瑠戈之中而氣增百倍以御史臣某核  
功罪則載筆於牙旗羽帳之下而公協眾心以某官某督糗糧則  
運籌輪輓之策而餉足三軍以某官某爲應援則陳師要害之衝  
而兵聯四伏前驅則萬騎俱馳而先鋒之銳莫禦旁翼則一鼓遂



合而犄角之勢斯成計道里而分地爲防相便宜而弁謀以助顧  
茲蕞爾之醜何當赫矣之威自用兵以來未逾三月卽班師而返  
大捷一時島穴窮搜若燎毛之易盡揮戈邁往果壓卵以無遺深  
塹填尸獻馘遂踰乎萬級長纓繫頸獲俘奚止於七禽始焉奮螳  
臂以當輪今也截鯨皮而製鼓轉羣黎於衽席蕩數世之妖氛罪  
久不悛自觸秋霜之憲殺多非暴何妨時雨之師海不揚波南土  
除腹心之害日無私照大明普覆冒之光老幼懽呼華夷震懼此  
皆由皇靈孔奕易收一戰之勳天討具嚴豫定萬全之略不然何  
乃如霆所擊勢有似於建瓴不日斯成功遂同於拉朽帝之德也  
永貽靈謐之休臣何力焉■戴靈長之祚

賜餘堂集卷三

賜餘堂集卷四

館課

擬陳東宮講學要務疏

臣竊惟東宮出閣屆期正睿德一新之初熙朝千載之會也凡講  
求儀文懋簡僚屬所以備國典隆儲教者稽之往牒參以時宜皇  
上固已先期畱意下閣部諸大臣會議酌行無容贅詞以瀆陳矣  
但帝王之學與韋布不同師保之教與序塾不同苟徒具其文而  
無端本澄源之道徒備其官而無潛移默喻之方是又非所望於  
今日講讀諸臣者臣請竭其愚而陳其要焉伏惟聖明俯賜裁察  
臣聞之天地之大德曰生蓋仁者人君育天下之本也故如天好  
生堯舜所以稱至德者以之今皇太子德雖性成習與智長正宜  
乘機迪德導以寬仁之教包涵覆育以爲量慈祥愷悌以存心寬  
裕有容斯惠愛無已所以培國家雍熙之盛者端在是矣帝王之  
盛節曰儉蓋儉者人君馭天下之道也故永圖慎德伊尹所以告

太甲者先之今皇太子年方鼎盛嗜欲漸生正宜去奢從儉杜其  
華靡之習敦朴尚簡以成德清心寡欲以養身德性既定斯好尚  
益端所以貽國家靖謐之休者端在是矣傳說曰學于古訓乃有  
獲又曰監于先王成憲其永無愆蓋言聞見知識之博而後可以  
措諸行也今於講讀之際當取典謨史籍及本朝所輯昭鑒錄文  
華大訓等書凡有關於身心化理之要治亂興衰之機者反覆開  
導使知孰爲可行孰爲可戒庶乎始終與治他日稱懋德之主者  
此也孟軻曰吾見亦罕矣吾退而寒之者至矣又曰一薛居州獨  
如宋王何蓋言薰陶漸染之久而後可以化於善也今於講讀之  
暇當選老成端慎爲皇太子所與朝夕起居出入燕游之人凡有  
違於保攝怡養之道少涉於嬉遊邪僻之私箴規匡直使所見皆  
正事所聞皆正言庶乎積久成德他日稱純心之聖者此也是皆  
輔養之大端講讀之急務也蓋所謂端本澄源則不貴於記誦口  
耳之粗所謂潛孚默喻則無取於儀文官屬之備若夫日晨授書

授畢而退日中進講講畢而退尊卑闊絕而上下之情不通禮數  
煩多而進修之益奚在又何裨哉此固臣愚竭一念惓切之衷效  
萬分涓埃之助者臣不勝祈懇惶懼之至

進春侍班有述

五言十二句

黃道開昌運青陽屆令辰迎祥來帝苑獻祉入皇宸臘盡星回紀  
寒消月建寅土牛呈稔歲綵燕進宜春萬物生機始千門淑氣新  
草茅叨侍從拜舞沐堯仁

反鑑索照

論曰人心未嘗無知也以有知之心而卒歸於無知者非其心之  
本體則然以其求知之過而適以蔽吾心之真知也故善用其智  
者惟任吾心之自然而反是則失之矣何者人性之初眾理具焉  
萬感涵焉至虛而明至靈而覺本與大虛同體者苟能得其體而  
不爲私意所牾則一真自如萬境俱徹而是非可否纖介不得而  
藩籬之障隔之奚以鑿爲使於本體之外求所謂人情物理之幻



昧者而強探之設機用智鉤潛索幽則私意起而本心亡晦塞昏  
昧適以自陷於至愚亦足悲矣此程夫子所以有反鑑索照之喻  
也夫鑑何以似吾心之知也鑑之體至空空則天下之妍媸以別  
非鑑之明因妍媸而後有也以其有自然之體在焉因妍媸而體  
自顯耳然則鑑之明不可反而鑑之照又奚待於索哉人之心亦  
然天地以一理而生萬物物之變態盤錯紛紜雜揉蓋有相十百  
倍蓰千萬之不齊者要不外於理而理又不外於心也心具萬物  
之理淵然深湛然明默然靜澹然其無欲是吾心之鑑也方其物  
感未交而是非曲直之不形非心之無知也以其無感則不可得  
而見而其體則固在也懸吾心之鑑本足以待物也及其物感一  
交而是非曲直之判然者非心之始有知也以其有感則通而其  
體非有加也出吾心之鑑自足以照物也用智者誠知心之智不  
可鑿也猶鑑之照不可反也任吾心以照天下事未至也而無將  
迎事既至也而無適莫是之謂無欲而靜靜則有以見天下之動

是之謂有主而虛虛則有以通天下之故近不越方寸而眡可周  
於天壤吾心之鑑又奚待反之而後照者奈世之用智者不求知  
於心而求知於外不求知於理而求知於物德性之知厭其卑近  
而求人情物理之不可曉者探索之揣度之本易也而求之難本  
近也而求之遠未至而億逆不能虛心以待物既至而適莫不能  
明覺爲自然未見其事之是非曲直而先以是非曲直之私橫於  
中則卽此億逆適莫之所在而吾心之明已爲其所障蔽是反吾  
心之鑑以求照於物也噫天下豈有反鑑而足以照物者哉吾知  
內私未融外觀必蔽其所是者或疑以爲非其所非者或疑以爲  
是其所曲直者亦未必其爲曲與直也何也所見不以心而以外  
也所見不以理而以物也舍昭曠之原而加以穿鑿之術其爲弊  
一至此哉此非程子之私言也赤子之心已具大人之體而未發  
之中大本藏焉然則智果可鑿乎不可鑿乎鑑果可反乎不可反  
乎古之以大智稱者行其無事而執一實以禦百虛其於知也思

過半矣雖然鑑之明以塵翳之垢染之則有時而昏心之知以物蔽之氣拘之則有時而塞欲鑑之常明欲心之常覺當何如哉拭其垢拂其塵而鑑之明以復去其蔽釋其拘而心之知已全聖人者何思何慮無知無不知常明之鑑也塵不待拂而自無垢不待拭而自去者也學者之格物致知因明通蔽滌濯之鑑也塵終不得而翳之垢終不得而染之者也吁鑑之明翳之染之且不可況從而反之乎用智者尚知所鑒云

武闡校士

七言律

詔下明光開武闡材官鱗集擁戎衣誰人羽箭輕楊葉何處龍韜起釣磯收駿競看臺尚在備胡應號將如飛生逢四海銷兵日莫訝轅門仗鉞稀

薛文清公從祀議

臣竊惟王者褒崇上聖秩祀諸賢所以昭民則垂世教輔德報功國家之鉅典也是故有功德於一時者一時祀之更代則已有功

德於一方者一方祀之踰境則已然尤不敢輕焉况先師有功德於萬世者將得人以列坐廟庭侑食俎豆豈可苟焉而已哉必文與行兼名與實副有裨於斯道而無疵於公議者庶足以稱輔德報功之意陛下執符御極秉德綏猷禮樂文教益彬彬盛矣茲者以薛瑄應否從祀下諸臣議臣請以歷代諸賢既從祀者質之漢儒蒐輯聖經者也唐儒疏注聖經者也宋儒則闡明聖經者也若董仲舒韓愈程顥歐陽修輩皆神會力行躬造篤詣行足法言足訓非區區於訓詁者也薛瑄生當治化休隆之時道學明彰之世雖不必蒐輯疏注闡明如漢唐宋諸儒然自童年迄沒齒無頃刻忘聖賢之教其所著讀書錄平易親切悉身心體驗語議者有謂瑄造詣不及董仲舒而篤實似之精微不及程顥而渾厚近之穎悟不及韓愈歐陽修而篤行過之出處不改其操禍患不易其節貧賤不移其介口不失言動可爲式非眞誠積累之素者弗能固希聖之流宗純儒之遺軌也紀本朝理學名臣以瑄爲稱首顧不



偉歟臣愚謂以薛瑄從祀允協輿情有光廟貌於禮樂文教非小補也惟聖明裁擇而采納焉幸甚

虜王貢馬恭上聖德無外詩

五言古

聖皇躬大寶執符垂衣裳敷文薄寰宇神武誓要荒邊塵久已息海波亦不揚威嚴邁周宣共球集成湯肆彼單于酋負嵎時跳梁一朝叩闕下稽首乞來王帝命曰俞哉臣服效氏羌何以充庭實驂驪貢其良遠自西戎來蹀躞馳康莊驅從八駿列矯矯時騰驤卻馬昔侈譚茲乃德所將舞干有苗格休茲比虞唐東西盡漸被南交暨朔方重山絕海外咸思會明堂仰頌聖天子萬年壽無疆

### 武舉錄序

隆慶辛未歲復當會試天下武舉士既較以步騎射矣其射之合武者復試以韜略也臣某承命典是役役竣臣宜序序曰臣竊惟文武殊用創守異資當經綸草昧暨陵夷割據時所以戡亂芟殘者匪武曷濟及夫承平熙洽卽弢弓偃甲歸馬韜戈若恐後焉何

也示帝王之世重用武也然臣嘗考成周之世自文武迄於成康禮樂備至宇宙太和誠繼治守文之令主也及周公之訓成王曰克詰戎兵召公之詰康王曰張皇六師其當時相儆戒者若謂觀耿光揚大烈舉在於是彼誠衣柳之戒桑土之謀也哉仰惟皇上稟神聖之資履明昌之運膏澤旁流靈爽丕振頌者北虜輸誠南徭授首邊無傳燧海不揚波其順治威嚴奚啻成康世哉且肇修彝典揆錄武士將以思封疆之臣儲將帥之材固不以承平熙洽而弛武也正克詰張皇意也乃茲所舉士其有能效忠竭才銘功樹績膺鎖鑰寄干城足以仰稱夫上之意者乎夫今之所舉者以步騎射則合式矣以韜略則既中肯綮矣然弓矢者一夫之敵非三軍之任也况操觚擗管與援桴仗鉞其緩急難易實不侔臣又烏敢以空言末技信之哉雖然志士惜時忠臣感遇爾諸士當承平熙洽時由武科進其遇也可謂幸矣行且受分閫之責當推轂之任以翊贊億萬載無虞之治無事則練卒整師揚威耀武先事

爲備以逸待勞稍有警則忘軀奮距俘名王執驍敵繫綴而獻之  
闕下卽成康時所稱熊羆不二心之士何讓焉臣不佞誠願爾諸  
士中有若人以無負我皇上克詰張皇意也語有之劍斷割然後  
知利士驅使然後知賢蓋用之斯辨之矣昔市有買珠者華櫝而  
亡珠也人悅之攜歸啟視喑然嗟焉臣懼爾諸士今所舉者櫝也  
非珠也助之哉助之哉

擬九日侍宴應制

七言律

清秋鶴馭啟嚴宸紫極鴻恩逮侍臣醴出上尊心共醉羹調元鼎  
味偏淳霏霏瑞霧鑪煙合片片卿雲扇羽新漫把茱萸沾雨露願  
教渥澤遍黎民

歷代名臣奏議序

嘗聞之學古入官議事以制夫古者鏡今之徵也制者立政之本  
也是故有一代之興必有一代之治有一代之治必有一代之猷  
上下數千載間凡殫智竭忠之臣識微正本之士所以輔翊聖謨

發揮理道藻飾國憲黼黻皇猷者世各有人人各有言固炳然存  
燦然備也已非所謂入官之典章議事之龜鑑歟我成祖文皇帝  
戡亂紹基崇文圖理神謀睿略旣屈用羣策鑒酌往代矣爰命儒  
臣首開史局蒐羅諸籍編集成書自周以迄元自君臣禮樂刑政  
以至華夷戎狄時異事殊條分類別凡爲三百五十卷其間訏謀  
淵慮讜論嘉猷久而無弊者則錄之達權處變持危扶傾典而有  
倫者則錄之深究時宜通達世務詳沿革之因備稽考之牒無忌  
諱而有所建明者則錄之若夫繁言泛辭崑瑣紛糾之語非關體  
要無裨經濟者皆略焉是豈徒資博洽而誇聞見哉今之臣苟有  
志於贊元化奏膚功則考眾言以紹徽度蓋莫有要於此者能因  
是而稽其損益之宜適夫變通之道以之入官以之議事將因事  
納忠隨時建策卽致君德於堯舜躋世運於昌明執此以往焉可  
也雖然紬繹敷陳言之可行者臣之職也采擇施行從之若流者  
君之責也有都俞之旨而後有弼直之忠有啟沃之詢而後有朝



夕之誨不然雖鳴鳳批龍絕裾折檻奚補於君而亦何有於臣哉然則是書也亦足以仰窺我成祖之淵衷微意有望於億萬世之聖子神孫以興起夫忠臣賢相者殆非淺鮮云

望昭陵

五言律

鼎湖攀逸駕僊仗掩玄宮劍舄空山裏松楸落照中遺哀猶喚鶴佳氣漸成龍尚憶臨軒日瞻依思不窮

心爲嚴師解

師者所以傳道解惑考德問業故負笈握衣遜志樂羣蓋有一步趨模範而不敢違者矣此師嚴則道尊道尊則教行是故人以師爲資而師以嚴爲貴也若夫心固吾之心也運於無形藏於至密其操縱出入固吾之所自由者而顧謂之嚴師何哉解曰師之教我與我之所受教於師者非他也卽此心而已矣苟能靜存勿穆動察幾微自一念之不敢放者純之以至於念念皆然自一時之不敢肆者推之以至於時時皆然恆加提撕使就規矩無逸思無

惰志目與色交而心攝之非禮弗得視也耳與聲接而心管之非禮弗得聽也口欲言身欲動而心能主持之非禮固弗得言且動也卽嚙笑食飲起居瞬息之際而吾心亦嘗惺惺焉業業焉夫然後愈約束則愈收檢愈矜持則愈瑩徹虛靈精爽之中皆齋莊敬畏之地恍然若與嚴師相周旋陟降者以此心而進善則見義必爲卽師之所以誘掖我也以此心而省愆則過必知知之未嘗復行卽師之所以督戒我也以此而變化氣質則高明柔克沈潛剛克抑其過引其不及卽師之所以薰陶鎔鑄我也孔子曰三人行必有我師焉其善者從之其不善者改之是師也豈師其人哉師吾之心而已矣蓋善不善在人而從之改之在吾之心也固未有不得之於心而可徒資之於人者也資之於人者口耳之粗聞見之習耳卽強勉於聲容體貌聞曰嚴師嚴師云者吾知師自師我自我授之無機斯傳而不遇雖朝夕相聚以形迹相聒以話言祇見其勞苦之不勝扞格而不相入也譬之草木然樗櫟朽腐其心

死則其生意絕矣。卽造物者春風時雨，亦何以吹噓之滋漑之哉。蓋心者一身之主也，百體之從令者也。故名之爲天君焉。名之爲天君，則其名之爲嚴師也，固宜。

夏至齋居有述 七言律

玉堂僊署漏聲沈，靜夜齋居樹色深。南陸迎長初馭日，西疇沾渥正爲霖。詩久熯大上台福祉君能集，方澤精誠帝欲歆。幸際昇平何以頌，還期作賦獻汾陰。

玉山講義述

愚讀朱子玉山講義，其反覆發明，無非原人性之善及示人盡性之全功。因慨夫後學以繁言惑世，多岐晦道之失其旨也。夫道一而已矣。原於天謂之命，付於人謂之性。性之生生不息者，謂之仁。而義禮智皆統之矣。以其無所偏倚而言，則曰中。以其無所虧欠而言，則曰極。其名雖異，而其理則未始有不同也。自孟軻氏倡性善之說，而羣喙競起，眾言淆亂。曰性惡者曰善惡混者曰善惡各

有定者曰無善無惡者，何若彼紛紛爲也。蓋孟軻氏之言性也，本之天命，徵之人情，但推其理之本善者言之耳。至程子乃更發明之曰：論性不論氣，不備論氣不論性，不明夫然後知善者性之理也。有昏明強弱清濁厚薄者，氣之稟也。能反其稟之少異以順其理之本，同由惻隱之端充之而仁在是矣。由羞惡辭讓是非充之而義禮智在是矣。事事物物各得其宜，咸造於無偏倚無虧欠而中與極在是矣。此之謂盡性而盡性之全功。固無外於尊德性道問學二者。通顯微貫動靜，該本末合內外存心致知，交相培養而全體大用各復本始。四端萬善五常百行，皆吾性中物，則皆吾盡性中事。能盡己之性，斯能盡人之性。能盡人之性，斯能盡物之性。贊化育參天地，亦不過此。朱子之言深切著明，無非使學者知所向往，黽勉於聖賢之道也。奈之何後之講學者，非堯舜周孔不譚，非性命道德不論，教無統宗詞有枝葉，各立宗旨，互相譏評，甚者竊名干進，假迹希榮，遂使舉世嘵嘵然率以此爲詬病，則過矣。吁。



性貴盡也不貴言也學貴行也亦不貴講也篤行實體視身飭躬以之修己則無忝於形色以之治人則有裨於國家此正士君子所當從事者也亦朱子教人意也

除夕書懷

不拘體

今歲惟留此夕餘虛堂鐙火共圖書夢隨雁影雲山外身綴鷓鴣行雨露初臘盡一宵移節序春回四海息兵車公家桃李栽培厚敢負清時在石渠

先王養育人材以濟天下之用論

天之生才不恆有而國家之需才不容一日無者也以不恆有之才而欲以濟不容無之用則凡所以長養涵育之者當蚤爲之計而曲盡其方矣譬之樹木者荆榛茨棘固不種而生不植而茂而松柏之挺秀桃李之華悅將欲掄其材食其實也則栽培蒔溉優游以俟之維持調護以需之無所不至乃若天生而人不能成之其不爲霜雪所摧折斧斤所戕壞者幾何哉嘗考諸先王之世矣

唐虞治之極也百僚相師九德咸事凡列岳牧而效臣鄰者皆亮工熙載之臣自古稱材之盛莫不稽唐虞之際矣然堯之命契也曰勞之來之匡之直之輔之翼之使自得之又從而振德之舜之命夔也曰典樂教胄子直而溫寬而栗剛而無虐簡而無傲二帝之所以養育之者何其至也降而夏商凡所以設之校序聯之師儒樹之表儀胥之教誨其貽典則戒風愆者諄諄焉固宜享純佑之休而收用乂之績矣至於成周則爲大備關雎麟趾之意旣足以端教化之原菁莪樸棫之風又足以盡振作之術而康而色則錫之福焉會極歸極則敷之言焉是彝是訓則導之行焉修六禮以節民性明七教以興民德齊八政以防民淫敦化綏猷移風易俗浹洽於心志者深而陶鎔於化育者漸也是故兔置之賢鷹揚之士爲疏附後先爲旬宣屏翰師師濟濟其英賢輩出豪傑羣興周之才遂與唐虞之際相比隆焉夫豈偶然者耶夫何世下風趨詞章之習興詩賦之科設選舉之法廢奔競之風滋其始之學也

學爲文而已其繼之進也進以文而已教之者曰操觚擗管搗藻  
敷華仕之階也熟此可以干進也舉之者曰明經取士糊名易書  
時之制也執此可以觀人也自其幼而家庭之素聞長而學校之  
羣習舉不外此而去先王閭胥族師道德行藝之意蓋遠矣若是  
而欲人之行完德備藝成器良濟世務而裨國用也胡可得耶何  
者蓋天之生人也鮮上智罕全德而中材偏材者多才之中者則  
必引而進之才之偏者則必曲而成之而後中者協於極矣偏者  
不罹於咎矣大則總百揆均四海小則效一官熙庶績莫不明當  
時之務習先聖之術凡論道弘化宣猷展采以爲天下用者真猶  
一元運於上而五行之吏四時之序佐其成也吁此先王養育之  
功也此唐虞夏商周所以詳作人之方而享任賢之逸也彼不養  
之於始而徒求於將用之時不儲於豫而徒責於既用之後因其  
用之不效也而曰天下固無材也是何異於樹本者未嘗盡其栽  
培蒔澆之方維持調護之法而顧以摧折戕壞咎諸木焉苟非梗

枿梓杞烏能備榱楹梁桷之用哉嗚呼是在司教化者加之意焉  
而已矣

登第後寄親友

不拘體

別君憶昨與計偕腰懸長劍拂塵埃光芒燦爛冲牛斗飛騰擬上  
黃金臺臨岐灑酒歌陽關相期意氣何雄哉春來射策明光裏羽  
林執戟夾階阨姓名偶廁賢雋間草茅掄拔恩無比此際親朋正  
延仁捷騎東馳慰知己因慚樛櫟非良材託根何幸向蓬萊雨露  
栽培豈無意廟廊梁棟須吾儕當年樹立丈夫事軒冕華榮亦儻  
來策名報國自茲始願矢忠貞獻天子勉旃不敢負生平登膺躋  
華何足齒欲慰親朋延仁情固知在彼不在此

擬經筵講章

子曰有德者必有言有言者不必有德仁者必有勇有勇者不必  
有仁這一章書是孔子教人以修己觀人之道及敦本尚實之意  
德是行道有得之謂德之所發秩然其可聽者曰言仁是全體不



息之謂仁之所發浩然其不撓者曰勇德仁是在內的根本言勇是在外的徵驗有於內必形於外而徒徇於外者又未必皆由於內其本末輕重之間不可不辨也孔子說我嘗見人之有德者造詣精深義理和順這等的人雖未聞其言然言是德之音也令德既全則嘉言自著固可必其能有言矣若那有言者說詞雖善或出於便佞之私則不可必其有德焉何也有君子之言有色莊之言如其言而已矣則議論之末何足以信其心術之微凡巧言以飾聽者是色莊也而非君子也故曰不必有德人之有仁者天理常存人欲盡息這等的人雖未見其勇然勇是仁之用也私意不累則正氣常伸固可必其能有勇矣若那有勇者奮發無懼或由於意氣之激則不可必其有仁焉何也有義理之勇有血氣之勇如其勇而已矣則剛果之行何足以信其涵養之素凡恃強以用壯者是血氣也而非義理也故曰不必有仁是可見德也仁也是本也所當重也言也勇也是末也所當輕也修己者固當於

有德有仁而盡其功觀人者不當以徒言徒勇而受其誣矣臣嘗稽古帝王如夏禹之祇德而昌言以敷治正是有德之言周文之施仁而一怒以安民正是有仁之勇至於靜言而庸違好勇而無禮雖虞廷孔門深以為戒也恭惟皇上德由天縱仁本性成由此而發為言百官承式萬民傾聽是惟不言言必當矣由此而發為勇庶事振舉四郊肅清是惟不勇勇必大矣臣更願緝熙無間進修益隆上追夏禹之大競遠邁周文之太和推此而用人圖治則聽其言必觀其德見其勇必考其仁藻鑑不爽舉措咸宜如此斯在位者皆篤實純正之人無浮華剛愎之輩所以挽人心之澆薄而還世風於淳朴者端不外此臣等不勝至願

賦得今日非昨日

五言古

今日非昨日景光無停隙玄令倏移序青陽已轉律薰風方炎蒸寒氣遂蕭瑟來者尤可追去者真如失及時當勉旃逸豫德乃滅試稽古聖賢緝熙修德業惜陰既已勤待旦何其急晏安非所懷

老大悲無及願言少壯時努力追先哲

中星解

中星之法昔議者各置喙焉蓋歷代之所紀不同故諸家之所辨不一然而天之高也星辰之遠也理以推之數以算之自幾微渺忽之間以至於積累久遠之際雖至精至密未始無至易至簡者在也粵自唐命羲和以欽若曆象既分時定方以春夏秋冬四仲月中星授作訛成易之事驗析因夷隩之宜術不違天政不失時此中星之所由起也春分日在胃十二度昏中鶉鳥夏至日在柳十四度昏中大火秋分日在氏十度昏中虛冬至日在虛七度昏中昴蓋四方皆有七宿自井至軫爲未鳥而鳥則其中也自角至箕爲蒼龍而火則其中也虛爲北方玄武斗牛女危室壁之中昴爲西方白虎奎婁胃畢觜參之中故於四時之仲七宿之內獨舉一星焉至月令所載仲春則日在奎昏弧中旦建星中仲夏則日在東并昏亢中旦危中仲秋則日在角昏牽牛中旦觜觶中仲冬

則日在斗昏東壁中旦軫中與堯典不合蓋呂氏之時歲差之名未有也然由堯至秦自不可強之合者天有三百六十五度四分度之一歲有三百六十五日四分日之一天與日與星偕運並行天平運而紆日星內轉而縮天漸差而西日星漸差而東其不可強之使合者勢也月令無歲差之名而呂不韋實暗合夫歲差之法矣乃說者謂書之中星常在後月令之中星常在前又謂書總舉月之仲月令獨舉月之初又謂書言分至之中月令言昏旦之中必欲牽合附會以求其合焉奚惑乎說之愈多而失之愈遠也自是而漢唐以至於宋元其度數運行舉可考而知者不必悉也朱氏謂古者冬至日在牽牛今在斗遡宋而上之以比於唐似差及四分之一歲不容以不差則中星自不容以不異矣今考我朝大統曆春分日在壁三度昏中畢夏至日在井初度昏中軫秋分日在翼十八度昏中箕冬至日在箕四度昏中室以之定歲時之運旋驗日月之朧胸無毫釐分秒爽焉蓋自許平仲明曆理郭守



敬推曆數已極精密而元統因之誠可謂考千古之謬而得其常  
持一定之法而握其中者固無俟更紛紜爲也大抵始則審中星  
而後得歲差之由今則明歲差而可定中星之度一占步推算焉  
足矣愚懼夫議者失之鑿也作中星解

題畫菊

七言古

半幅生綃數枝菊玉蕊金英爛相簇託根移植錦繡叢卻勝含香  
在巖谷僂姿綽約自天成更喜身承雨露榮勁氣貞操誰與比餘  
芳孤淑尤崢嶸霜天搖落羣芳歇惟此葳蕤堅晚節桃李娉婷春  
色饒繁華不耐秋風冽昔傍東籬五柳家今爲上苑雙林花餐英  
駐景躋上壽蓬島丹砂安足誇

試歲貢生策問一首

問學校之設所以養育人才以濟天下之用者成周之時閭有塾  
黨有庠州有序國有學司徒陳其藝極而教之卿大夫考其德行  
道義而賓興之是以當時之士自學校出者平居則足以善其身

效用則足以達其道豈上之所以待士者隆故士之所以自待其  
身者重歟我朝設學校於郡邑聯之師儒給之廩食申之戒諭其  
教之不可謂不素養之不可謂不厚矣每歲則拔其尤者貢之廷  
蓋與之以進身之階將責之以共理之效也乃今或徒取文詞不  
問其德行道義卽不然又計資循格而曰齒暮途窮姑疏淹滯而  
優衰老也是豈當時待士之道歟抑亦豈我朝設貢之意歟爾諸  
士抱藝而來其必不屑以淹滯衰老至者茲欲不變當今科貢詞  
章之法而又得成周德行道義之士焉必何施而後可

寒菊篇

七言歌行

庭有燦燦之黃英深秋佳色殿芳榮露蕊霜華宜晚景不與桃花  
李花鬪輕盈寂莫能自甘繁華豈足爭高雲淡日共紆采勁柏疏  
梅堪結盟自非夙抱後凋節安能獨向歲寒生所以采食之駐世  
宜千齡嗤彼桃李皆搖落孤標秀質方崢嶸瀛洲騷客若爲情對  
爾幽閒意共清恥隨炎炙競鮮妍忠貞培植期生平君不見自昔

東籬一入詠迄今千載垂芳名

孔子高子順子魚論

聖道者萬世之所共宗也豈特爲一人一家私哉然我爲之後者盛而傳焉亦足以無愧於其先而益見聖人之澤之所被者遠矣昔仲尼以大成之聖生末造之周其綏來動和之化不得見於當時而詩書禮樂之教尤得垂於後世及門者蓋三千人迨其沒也各以其授受淵源衍其流引其緒焉而況其子若孫乎宰子曰仲尼賢於堯舜謂其聖之根本同而聖之事功異也何也堯之後則丹朱矣舜之後則商均矣堯舜公天下以爲心固不計其後之賢不肖而其所處亦有大不幸者存焉故觀於仲尼之後數傳奕世而尤能竊緒餘以自淑其身是亦仲尼之幸也而於堯舜之所處則有間矣嘗考之傳紀所載趨庭而聞詩禮之訓憂世而作中庸之書鯉也伋也固不必言也至於子高子順子魚者漸遠仲尼之世又值列國紛爭之時彼縱橫捭闔者流日以功利詐力爲事苟

非見道明守義正鮮不爲時移習染之所浼者又安知聖賢之學出處之節哉子高爲客於平原子順作相於魏主子魚應聘於陳涉豈不知之三人者不足與有爲耶然而苟可以仕不必皆明君也苟可以與不必皆賢大夫也非仕季桓子往公山佛肸之遺意乎若夫包眾美統六藝所以論儒者有得於進德修業之方者也賢愚共貫眞僞相錯所以論張叔者有得於舉直錯枉之義者也見敬在德不在貌所以論簡穆者有得於以貌取人之戒也人主求欲異物不至所以對秦王者有得於欲而不貪之教者也除小忿全大好所以喻韓王者有得於睦鄰治國之道者也燕雀處堂禍將及己所以慮破趙者有得於知微見幾之哲者也作之不止乃成君子所以稱仲連者有得於與人爲善之公者也治則行道亂則持身所以曉尹曾者有得於求志行義之說者也修人和應天祥而恃吾之不可攻所以諫陳涉者有得於持危扶傾之術者也至於三辭不就五聘後行其所以重其出者又皆有得於難



進易退之操者也蓋其耳目之所習聞精神之所注措莫不願守家法而垂道脈者故其存心制行雖未免有純駁之疵而要之舉不違於聖賢之矩者矣孟軻氏謂君子之澤五世而斬亦謂君子云爾是烏可以概仲尼之子若孫哉意其澤之所被者不窮卽其功之所傳者不息也仲尼賢於堯舜觀於此亦一驗云

陽春曲

七言歌行

長安二月豔陽時東風裊裊飛游絲千門萬戶旌旗色九陌三衢雨露姿淑景韶華著桃李蔥蔥鬱鬱山澤麗峰輝林影競鮮妍雪晴日映皆羅綺羅綺郊園風物和香塵拂面游人多楊柳千條金作綫梨花百葉玉爲柯融和無限春光好況是昇平世熙皞誰爲絕調歌陽春陽春浩蕩難爲道

重刊十三經注疏序

聖人之道與造化相流通天地同悠久道固未嘗不在也而其寄於人者有明有晦有息有續則闡揚衍繹之功固不能不有所賴

矣蓋經者聖人之心之所寓也其微言奧義固不得易窺而厄於坑焚之後其殘簡賸篇尤無從盡考者當其時使考證之無由探索之無地又何以啟羣蒙而開絕學也而聖人之心之所寓或幾乎晦且息矣然則漢諸儒之有功於經也焉可誣哉漢諸儒窮經者易如田何以及施孟梁邱書如伏生以及歐陽夏侯詩如申公以及轅韓毛公禮如高唐生以及后倉二戴春秋如公羊穀梁以及劉氏嚴氏其諸若馬融劉歆鄭玄孔穎達何晏郭景純諸人轉相授受而十三經注疏作焉雖其人未必皆賢言未必皆當而當坑焚之後聖經幾於晦且息之餘不有人考證探索闡揚衍繹之則後將何所據哉乃宋鄭樵至謂秦火焚書而書存漢儒窮經而經絕斯言信也則是窮經之罪更浮於焚書之暴也自今觀之漢去古未遠而聖人之遺言祕旨猶或有得於面承口授者宋諸儒傳釋遂多因之而闕文疑義一以漢注疏爲正如九六世變孔穎達之說也三文三統馬融之說也河洛表裏之符宗廟昭穆之數

劉歆之說也五音六律還相爲宮鄭玄之說也其擇言之廣取善之要在明乎經而弗失聖賢之意耳豈得盡如鄭夾漈之論哉王通曰九師興而易道微三傳作而春秋散齊魯毛韓詩之末也大戴小戴禮之衰也蓋謂其詳於訓詁而略於旨義攻於考究而昧於會通耳而烏可以盡泯其功也竊嘗論之漢儒之學長於數若儀文節度之煩蟲魚草木之變皆極其詳其學也得聖人之博宋儒之學長於理若天地陰陽之奧道德性命之微皆究其極其學也得聖人之約譬之器以土礪誠不可與金玉爭輝濟以剝木誠不可與舟楫較利而不知所以開其金玉之端啟其舟楫之制者則土礪剝木爲之先也是故取十三經注疏重刊之以存其舊廣其傳焉亦使後學者不忘土礪剝木之遺意也

玉河春水曲

五言古

芳時淑景和春水澹煙波流漸出禁苑故繞鳳皇坡通津沾聖澤江漢達潛沱韶華浮翠激澄影瀉清荷瀛洲近太液游泳纖鱗多

願言報恩渥其如涓滴何

與友人論學書

自載籍以來論學者何詳也而吾夫子兩言以蔽之曰古之學者爲己今之學者爲人此義利之辨公私之分心術邪正之別聖之所以聖賢之所以賢而吾人所以皓首窮年役役於學卒與古不相及者皆此也不可以不察也竊觀今之學者稱詩書譚性命蓋人人能矣及原其所以學者爲己乎爲人乎各立宗旨互相標榜高論空言徐行趺坐曰超詣曰頓悟曰良知曰主命自謂聖賢之精意盡在是矣然而致之於實用索如也反之實踐扞如也夫知至至之可與幾也知終終之可與存義也而貴於徒言乎哉甚者假名干進賈譽文奸以講學爲身之便圖仕之捷徑者學之敝於今世也極矣噫古人以之爲踐履之常事而今之講學者以之爲議論之游辭古人以之爲進修之實功而今之講學者以之爲矯誣之巧術此有志者爲之扼腕痛心率以爲詬病而不屑爲亦不



忍聞也先正云學要近裏著己夫所謂近裏著己者何也不出乎  
吾身之素履庸行而已矣體身飭躬存誠去偽大而君臣父子夫  
婦兄弟朋友之倫小而辭受取與出處進退之節微而動靜作止  
語默食息之間無非實事無非實事則亦無非實理無非實理則  
亦無非實功苟能強勉循理則賢矣能從容中道則聖矣賢聖固  
不外乎素履庸行也而豈在於高論空譚徐行跌坐哉彼竊近似  
以惑人假言貌以誣世是亦一念爲人之私以啟之也此義利公  
私邪正之攸判正吾人所爲當辨之早而反之力也愚也目擊概  
衷也久矣遂冒世俗之諱言而發狂瞽之鄙見以就正於執事者  
執事者其亦謂然乎否也

雪霽早朝

七言律

瑤臺僊闕擁千官積素初融向曙寒色映蓬萊銀兔溼光搖宮殿  
玉龍蟠晴煙故入爐邊繞爽氣將從仗外看喜見農祥占歲稔擬  
賡郢曲奉宸懽

國朝館閣名臣考議

夫館閣奚昉乎自周官太史掌六典以辦法內史掌八柄以詔治  
其職重且大也久矣漢置太史令供奉承明待詔金馬其制相沿  
唐設弘文館延英召對集政揮毫厥儀始備至宋則又彬彬然盛  
焉我國朝法周制官倣宋建閣其始也典宸章代王言備顧問侍  
講讀而已其旣也乃參預機務平章政事所係蓋重且大矣然而  
鍾靈孕秀立德樹勳其綱常社稷之功文章事業之蹟炳炳烺烺  
垂竹帛勒彝鼎而終不可泯滅者則謂之名臣噫人無完懿士鮮  
全節其上不負君下不負學足以追前修而式後進者固未易數  
也又或有始終之迹稍異而瑕瑜之義不相掩者亦未盡無焉謹  
摭舊聞用備私考云竊嘗考解學士公縉負奇氣抱雋才歷踐清  
華力抗權幸早遇聖明晚罹讒毒殆弗究其用者歟或蘊之未深  
而銳者易折也君子蓋惜之矣楊文貞公士奇挺生偉奇左右密  
勿歷事四朝始終一節非所謂社稷之臣耶或者以周民修之死

子稷之獄少之則不敢知也楊文敏公榮通才博識抒華振英文武兼資身名無玷卓哉其相業矣而或謂其譎而不正者豈亦有所指哉楊文定公溥傳稱文定有相度繫獄不改其操秉鈞不渝其忠是固無愧醇儒者商文毅公輅三魁華名三孤崇秩處永壽昭德兩宮閒能順以濟險可謂難矣馬鈞陽有云我朝賢佐商文毅第一信哉李文達公賢恭莊端重練達政務得君未有如文達者海內皆奔走匍匐以干恩澤獨立正言僅見一羅倫耳而終不免於竄謫也何哉岳文肅公正文章氣節名滿海內直前任事仆而復起蓋矻矻不下人而竟不盡其用其磊落賢輔弼乎邱文莊公濬明體適用酌古準今足以華國名世褒然爲一代巨碩也而或乃以劉文泰之誣少病焉何哉徐武功伯有貞史稱武功之學自天官地理兵法河渠陰陽方術靡不通貫至論心術急嗜功利首倡南遷繼謀奪門比昵奸回屠毒忠良金齒之行或亦禍淫之理也薛文清公瑄直躬好古明道淑徒進不附麗退不慕戀允哉

聖賢之徒也從祀廟庭有光俎豆矣劉文靖公健耿耿大節侃侃正言力抵邪佞中扼權奸正所謂以道事君不可則止無愧於古之所謂大臣者也謝文正公遷守己無失持正不阿其與劉公同志而視東陽殊塗矣李文正公東陽高才絕學盛德嘉謨四世元老一代宗工也而或者以劉謝去位時公獨留爲議焉不無少愧於文正之謚乎王文恪公鏊高文清節守道見幾當權奸熾燄時能保身而又能潔身賢矣哉九原可作誠願爲執鞭欣慕之焉羅文毅公倫昌言正色直節高風順逆險夷不渝非有特稟之資素定之學弗能也惜乎年不逮而業未竟也

讀中祕書有述

七言律

闕館掄才典禮殷翠華清景屬秋分雲移花影祥光見風度芸香瑞靄聞緇帙朝窺金匱籍瑤編夜檢石渠文章茅竊幸逢明盛矢竭涓埃答聖君

慶成宴致語



伏以律應黃鍾四海慶履長之節祥開紫極萬年逢保泰之期大  
祇禮行代庶物報追乎本弘施恩溥與羣工共樂其成和氣溢乎  
兩間權聲遍於百辟恭惟皇帝陛下握符受命秉籙登樞承累洽  
之休於日中昭大明之治於天下民安物阜皇猷默運無爲時和  
歲豐帝德潛通罔閒邊無警燧玉關輸款塞之誠海不揚波銅柱  
樹銘功之績合華夷爲一統舞干羽於兩階旣峻德以配天遂至  
仁而饗帝南郊稱秩明禋上格乎鴻鈞北闕覃恩燕賜下周乎鵷  
列揚六鸞齊八駿聿觀玉步之和奏九樂陳四圭已薦金泥之潤  
萬靈咸萃鬱蔥佳氣繞彤闈眾瑞交馳煜燿祥光浮寶座簫韶聲  
裏覩鳳儀獸舞之容錦繡叢中見鷺序鷹揚之象節屆一陽來復  
時當四海無虞卿雲正麗乎中天湛露均霑於下土熙熙皞皞宣  
宇宙之至和穆穆明明仰君臣之胥慶臣等叨塵法部幸遇良辰  
戴一人爲禮樂之宗願萬世作神明之主恭陳俚句敬助清懽  
太乙壇前吐瑞煙朝來猶自繞華筵一陽律轉初長日四海人歌

大有年化洽鴻鈞乎庶尹班聯鵷侶列羣賢年年此際承忍澤擊  
壤呼嵩慶履端

紫驪馬

五言律

俠客辭家去青絲控紫驪雕鞍銀作勒錦轡玉爲鞅逐電來西宛  
嘶風向北州單于今款塞何處覓封侯

玉堂對雪

五言古

飛雪滿高林瑤光照玉樹撫景倍清幽蕭然絕塵慮卷幌理書帙  
皓夜偏疑曙太史占農祥皇心應悅豫願將挾纈恩衣被窮荒處  
南郊陪祀

七言律

萬隊旌旗繞上宮珊珊環珮步來同星辰近接玄都裏煙霧遙連  
紫極中恍若神祇相上下秩然簪笏立西東微臣奔走遭明盛共  
識天心鑒聖衷

賜餘堂集卷四

賜餘堂集卷五

詩

聖德中興詩十首應制

問寢承權

聖主繼天方午運慈闈愛日正春暉瞳矓瑞色傳清蹕道是承顏

問寢歸

宵衣勤政

未央辨色已求衣一日恆思有萬幾閭闔門開環珮集長庚猶傍

漢宮低

緝熙聖學

文華高敞倚天開昧爽傳催講讀來舜哲堯神猶聽納芻蕘無可

贊明哉

隆禮師臣

堯文舜哲已稱神一德交修藉四鄰晉接咸虛恩禮渥師儒何幸



際茲辰

面獎廉能

嘉爾臣勞膺帝簡循良異等在安民賜來金幣恩偏重頒出絲綸  
意更諄

詔蠲逋負

蠲租丹詔雲霄下待澤蒼生雨露饒寬卹恩深何以報祇聞三祝

萬年堯

澍霖應禱

九重一念重民依微旱深勞帝自祈最是天心通聖意隨將霖雨  
遍郊圻

植穀知艱

先知稼穡思無逸歷見寰區樂有年盛世不煩嘉穀頌微臣願進  
甫田篇

九塞清塵

塞北遼陽塵已清幾年四海報昇平華山秋草多歸馬滄海春波  
盡洗兵

百蠻歸款

初服新皇世若春萬邦寧謐四夷賓殊方盡願歸王會中國應知  
有聖人

侍班恭紀十首

鳴柝聲嚴夜未闌內家催放侍班官玉階縹緲金莖溼卻訝清游  
入廣寒

坐待微茫欲曙天將軍當直聽傳宣一聲聲自雲霄出知是宮門  
已啟乾

駕臨中極日初升金甲緋衣甲陛明臚贊未終趨已急繞來纔得  
殿前迎

九級三階御座高貔貅百萬列旌旄日華天表瞻依近簪筆深漸  
廟俊髦

晴輝曙色照樓臺遶殿鳴鞭忽訝雷黃表一函簾下過共看京兆進題來

新極初從祀聖儀臚傳天語下彤墀禮卿猶未聞承制膳寺應先奏省犧

捲簾引索勢如騫扇羽中分列兩邊只聽珮環聲隱隱不知身在幾重天

層層隊隊燦珠璣繡蟒蟠龍盡是緋傍鼎詞臣供奉處香煙裊裊故沾衣

每綴清班望紫宸此時應是見尤真天威咫尺頻瞻仰睿質英標迴絕倫

散朝回蹕更趨躡步輦傳呼複道長轉出殿來還到閣卻隨仗馬下東廊

補方正學君臣倫二首

君使臣以禮臣事君以忠君禮良不薄臣忠惟奉公耿耿先勿欺

蹇蹇故匪躬手足腹心如斯誼本由衷

君之尊如天臣之卑如地尊卑位以陳天地交相濟精白矢乃心烏容雜名利孔孟日皇皇仕以行其義

壽高相公

閒氣鍾名世乘時誕哲人商興天賚說周盛嶽生申平治機方啟明良德有鄰玄精聚角亢中極見星辰司馬曾居洛阿衡故起莘雄材真不偶偉業竟無倫磊落超凡表崢嶸輔世身孤忠貫金石勁節勵松筠正色原難悅溫顏更可親匡時謨預設報主志先純度量弘滄海文章爛紫擘片言罔攸伏羣策得俱陳帷幄青宮舊勳名黃閣新中流憑砥柱台望出平津載秉元臣軸兼持太宰鈞璿璣七政若衡鑑眾材掄翼翼丹衷顯平平王道均始終資啟沃左右運絲綸一介嚴辭受三台重笑噸趨朝承帝屢憂國問民頻公室推賢士私門謝雜賓垂衣宣禮樂供幣贊明禋丰采初新日華夷共樂春河源同潤澤崧嶽仰嶙峋繼述明當重綱常正已漣



訐謨酬素願經濟佐皇宸赦獄彰先德安商溥上仁法行民志定  
道直士風淳猶豫俄能決堅貞永不磷奸諛今屏迹窮僻盡亨屯  
恩怨奚須避嫌疑詎足論後生瞻帝輔先覺任天民振刷釐其蠱  
吹噓屈者伸仁風遍滌盪和氣已氤氳事建無前烈心勞獨運神  
指揮平粵醜談笑靖胡塵干羽陳階陛妖氛息海濱梯航咸享帝  
鞶鞞遠稱臣化洽豚魚革誠通虎豹馴居功仍几几誨士且諄諄  
吐握勤廊廟儀刑表縉紳百寮欽軌範四海荷陶甄房杜謀應合  
臯夔績可遵皇猷思共翼天語諭同寅純佑商家實弘敷禹甸勻  
金甌調麴蘖玉鉉和甘辛祐祉由天錫禎祥以善臻生之原有自  
福也豈無因縣算身猶鶴豐功像在麟莫時將改歲花甲正週旬  
懸矢逢初度添籌第幾巡稱觴走雕轂獻賦競華輪湛露垂閭闔  
卿雲繞禁闈宴同仙島會饌集上方珍寶錄長生籍瑤華不老椿  
其旋應坦坦駢駘會誥誥國士慚桃李封人薦芷蘋陶鎔恩至渥  
造就意何殷山斗依歸切岡陵頌祝勤但祈當此日相慶及茲晨

壽何封翁

元精鍾少室哲匠產中州漢代文章變唐家詞賦優鳳雛育丹穴  
龍種出靈湫簪組承鴻閣圖書拓燕謀善基還肯構良冶故爲裘  
枳棘賢寧止桑榆樂正悠身辭朱紱去心與白雲畱況有登瀛彥  
言從祕省游青宮常沃德黃幄復陳猷望重伊周侶才高董賈儔  
少微星彩動中極斗光浮共切儒風仰應知世澤流皇綸新下詔  
仙算始添籌恬與愉俱得名兼壽未休從茲駐光景安得計春秋  
送田鍾台使江藩奉親還閩中

詞臣銜命促征車將父從王樂有餘覽德正翔阿閣鳳承顏還饌  
浦江魚道傍柳色縈仙旆江右桐封捧制書作賦不煩頻授簡知  
君才是漢相如

送張玉陽使德藩

仙吏銜恩下玉堂彤廷曉簇羽林郎鳳翔雙闕雲霄迴鶴立千官  
雨露香共羨北門天子使況游東魯聖人鄉公餘岱嶽探奇去應

有輝光接建章

送范涵虛使楚藩范之翁與先人同舉進士

論交先世識韓荆喜見仙槎下玉京文擅瀛洲名久重調高郢曲  
賦初成過鄉草引王孫路除道花迎漢使旌元是大羅香案吏待  
君簪筆侍彤廷

送趙澱陽使吉藩便道還浙中

薰風晴日敞華筵帝命遙將下九天朱夏旆明燕趙上清秋節駐  
楚江邊過家暫作青霄夢入郢應傳白雪篇莫以行游淹歲月蚤  
歸簪筆待傳宣

送王龍州座師使事還里四首

太行秋色不禁寒六傳西征擁繡鞍使節再將仍問俗除書兩考  
不遷官內廷供奉含香侍故國馳驅負弩看清世台垣多氣象上  
卿早晚入長安

淵停嶽峙夙稱雄四海聲華久屬公盤錯盡嘗皆著績歷駁隨處

敢言功省中校士推衡鑑塞外降王藉折衝十九平原門下客慟  
予猶自處囊中

公車承詔沐恩偏桃李栽培漸有年教本河汾因啟後名高山斗  
若爲先正從絳帳看深雪忽見輶車隔遠天計日振衣承楷範師  
門應進舊彭宣

祖筵晴日照離觴客思秋容共渺茫勳著金華司馬署官猶銀艾  
列鷓行酬恩國士慚知己戀別羈人悵各方莫以鄉心淹使節熙  
朝明主正垂裳

送唐玄卿使陝藩四首

每憶同升日偏傷獨往時朱顏復已遠綠酒不堪持雙劍占星動  
孤帆望斗移茲行隔霄漢何以慰相思

北極郎官貴西藩典禮成春曹迴信節秋色動離情當路虛銜待  
前驅擁篲迎清時策高足好去樹勳名

邱壑仍吾病風塵復爾行才高須用世技短合逃名去住關情遠



華榮屬意輕相違各努力總不負生平

結綬逢明世聯珂愜素心浮蹤杳無定勝會慨難尋供奉還華省  
棲遲只遠林訐謨公等在梁甫可長吟

送蔣毅齋慮刑河南二首

選使平邦憲知君壯國猷星辰下北極雷雨遍南州欽卹將明命  
哀矜切隱憂盡紓冤抑者持以慰宸旒

漢署新持節文園舊負疴還憐行役去其奈別愁何法座瞻嵩嶽  
仁恩注洛波請看于定國遺澤至今多

送熊陸海謫浙中四首

直道非時好流言自物情能令慈母起忽作逐臣行薄譴恩原重  
清朝迹易明豈期緣貶謫因得見生平

祖帳燕臺北歸旌蜀道東才名真自許意氣竟誰同放逐仍仙吏  
行藏只塞翁臨歧奚以囑更莫辨雌雄

離情何激烈秋色正蕭條白壁知原少黃金鑠可銷西湖蘇子棹

南蜀馬卿橋榮悴當年事而今孰可招

頗訝爲郎屈何期謫籍新盍簪能有幾按劍且無因賈氏材堪並  
虞生枉已伸聖明饒雨露不必弔湘津

贈潘充菴督漕六首

藩省行騶憲節兼璽書特下玉螭前九重獨簡遭明聖弘濟如公  
孰與先

帝里雄圖據上游縣官仰給在南州軸轡百萬需公力幾載重銷

一夜憂

共說徵輸爲歲計誰能紆畫及秋毫先資列疏言何切靖獻奚嘗  
卹怨勞

足餉豈論唐室晏轉輸今屬漢廷何三春千里長隄畔聽徹舟人  
鼓柁歌

通津飛鷁擬游龍岸草汀花處處風秔稻來從吳越遠年年蚤入

大司農

大陸長川靜不波萬艘二月已經過可知汗馬論功日轉餉寧如相國多

送王師荆石掌南院

日含鷄舌侍鑾坡新綰仙符故里過玉署聲華今更少金陵桃李向來多閒情暫輟青藜火離緒應裁白苧歌最是成均門下士江雲山斗奈愁何

送胡蓮渠編戶還里二首

霜華風采重吾鄉鳴鳳惟君蚤向陽疏入西清臣念切生還南國聖恩長臺中骨鯁今焚草江右循良舊植棠爲德爲民俱不負單車此去姓名芳

祖道何禁送爾情燕臺黯黯暮雲橫丹心不逐江湖遠青鬢能令組綬輕此日挂冠隨豹隱中宵倚劍作龍鳴清時直道相須切漢席應看召賈生  
挽喻侍郎

清時正爾資英傑中土何期喪老成籌國僅輸經世略遺文夙著大方名鼎彝勳望應長在河洛英靈更若生最是聖明恩寵渥九原三錫有餘榮

壽王司徒疏菴二首

上卿崇望九重知翊贊忠勤退食遲籌國不遑勞吐握卜鄰何幸奉光儀正逢玄鶴呈祥日況值飛龍御極時最是瞻依山斗近爲翁一誦武公詩

犀文爲帶鶴爲衣曳履聲常傍紫微敷歷有年資黼黻縉紳無數仰容暉桓彝自昔推衡鑑杜預於今總事機白首丹衷恩寵渥請看勳烈勒常旂

黃年伯壽詩

橫金委珮正躡躡拂袖辭榮不待年報國豈能忘盛世承家原自屬多賢會看翔鳳雲中翼便結冥鴻物外緣從此遐齡駐流景更於何處覓壺天



送黃葵陽冊封汴藩

執戟頻年在石渠班楊詞賦幾人如展親舊重周封典奉使親承漢璽書燕市柳容明祖席梁園草色上華裾臨岐無限相違意一曲驪歌正慘予

贈曾陽白少參政還楚

拂袖辭榮不待年清時雅望許誰先關西旌節歸遺惠極北勳名屬後賢楚澤煙花千載地燕臺宮闕九重天少微台省遙相應有輝光動斗躔

送曾確菴撫蜀兼訊陽白

奕世承恩錫命優上卿綰印下皇州東山清節榮疏父西蜀蒼生得武侯曉渡湘江通遠夢秋來眉嶺愜豪游知公忠孝平生念好策勳勞答冕旒

送邵少野

東陵名士故賢哉春雨孤帆千里來移疾長卿方閉戶傳經韋氏

此登臺最憐綠鬢論文意還羨青雲獻賦才秋入山陰堪攬勝期君遲我鏡湖隈

送滎陽令

一劍雙鳧下帝畿中州近邑借開幃雄才舊數扶風彥茂宰新懸列宿輝燕市春容晴拂旆梁園曉色澹生衣應知佳績酬清世異

甲戌請告歸泊風雨中作

倦游恩許理歸橈南國春深路正遙漸遠雲霄思渺渺那堪風雨坐蕭蕭王陽蜀道情無限司馬文園渴未消到處逢迎惟自愧涓埃未裨聖明朝

金陵與吳幼安話舊

倦游移疾聖恩寬汗漫逢君意自安舊日虞生猶負枉當年范叔且憐寒羈人能醉金陵酒隱吏翻憎玉署冠良夜故人那更得中天華月好看

攜酌木末亭次韻

山樹蕭疏望眼寬，秋容病客兩相安。人情自昔隨時炙，友誼還誰見歲寒。十載相思纔把袂，二毛何事忽盈冠。詩神酒興今偏勝，賦就時從醉裏看。

送伍教官

片帆千里洞庭陰，明發依依思不禁。苜蓿頻年猶菜色，薜蘿何事忽蓬心。長裾恥向王門曳，函席忻承師範深。爲惜高蹤從此遠，驪歌一闋有餘音。

送張參藩

芳譽久馳青瑣裏，使輶忽下彩雲端。緣隄楊柳霜威重，夾道芙蓉月色寒。內省羣僚方把袂，中州多士已彈冠。秦階鼎席猶虛左，還向金門論治安。

送趙僉憲

芙蓉樓閣小春天，策馬前驅思渺然。待漏同時俱作客，攜舟此別

似登仙綵幡風捲，夷山月繡斧霜清。汴水煙回首更餘，廊廟意好紆經濟。達君前。

丁丑北上舟次清河書懷

日日東風水力微，孤琴雙劍自相依。風塵荏苒游應倦，道路艱難事更非。千里漫勞趨玉展，一官真愧負斑衣。蓬窗斗酒難成醉，悵望南天鴻雁飛。

過淮管比部放舟觴餞寄謝二首

清淮城裏白雲司，籍甚才名世所奇。結客已看多氣色，逢人誰許共襟期。春風帆外長征路，夜月尊前欲別時。行矣相思還自愛，好紆謨畫贊明熙。

微風斜日動牙檣，忽漫相逢喜欲狂。雙劍中宵橫渤海，一尊此夕渡清江。華名舊出西曹上，列宿新懸北斗傍。遲爾春明燕市裏，倚歌還共醉高陽。

潞河旅懷八首



倚市承恩我不如春明門外貴游疏新謠漫入詞人詠短疏寧勞  
史氏書天地一身真逆旅風塵千古只遺廬同儕煞有爲霖者  
洙能沾涸轍魚

倦游久已病相如何事憂危鬢欲疏載筆本無經世策拂衣今有  
絕交書一封狂謬聊酬國三徑蕭條可結廬此去已知霄漢隔長  
安那復寄雙魚

諸相皆空便晏如歸兮松菊未全疏豈因放逐能忘國不爲窮愁  
欲著書視草曾通仙吏籍結茅初返野人廬餘生再造君恩重清  
世何妨縱壑魚

金門結客昔驩如此日何期一紙疏筵羽漸忘朝委珮然藜寧憶  
夜編書浮名本似秋來葉生事都歸湖上廬自是陸沈予宦拙浩  
然應不爲鱸魚

漁水樵山縱所如不妨客與翟門疏燕臺漫擊尊前筑鴻寶深藏  
枕內書涉世風波驚往事側身天地寄吾廬微名已謝樊籠外萬

卷叢中老蠹魚

拂袖歸田意豁如故園生計豈應疏門前已少相過轍架上仍多  
未讀書暮雨苔痕封僻徑夕陽山色滿精廬隔湖二頃沮洳地築  
土疏泉學種魚

塞外年來已晏如甘泉烽火日應疏一時中國羈縻策數載降王  
款貢書邊將擁裘堅壁野胡兒弢矢醉穹廬無虞自古須爲戒恐  
有窮塚待澤魚

泲水於今任所如中原千里莽蕭疏縣官方下徵租詔郡守空馳  
發廩書天上星辰俄失度人間煙火久無廬昇平盡頌伊周盛可  
念吾民涸轍魚

贈毛山人次韻

大隱頻年意自如半生落魄故交疏問奇誰過揚雄宅混俗無庸  
叔夜書萍跡此生非彼岸菟裘何處是吾廬五湖遲子相爲侶我  
已新焚學士魚

謝顧使君體菴貽詩次韻

如椽綵筆許誰如揮塵清尊意不疏  
燦爛星文初出劍憑陵風色  
數裁書君饒白雪能華國我足青山可卜廬  
肯以新詩爲遠訊湖頭日日盼雙魚

去婦詞二首

誰云恩愛重糟糠肝膽纔傾忽下堂  
漫向玉樓含舊淚便從金屋罷新妝  
同心白首人之願薄命紅顏古所傷  
棄擲總緣儂有罪忍將路客比蕭郎

恩情寧不願綢繆矯冶爲容妾獨羞  
誰信投膠還易解自甘覆水竟難收  
畫圖爭獻千金貌紈扇何禁一夜秋  
寄語閨中諸姊妹好將膏沐事衾裯

次李明府沈狀元韻二首

事出非常慨自今書生迂見合銷沈  
廟廊自有經時策畎畝何妨避世心  
白晝浮雲陰黯黯玄冬飛霰莽森森  
逐臣猶作他鄉客有

酒寧紆此日襟

采薇稱說到於今河本難清陸易沈  
何幸再生明主德已甘萬死小臣心  
懷中白簡言奚補袖裏青萍氣尚森  
最是孤忠猶戀國可能回首不沾襟

東趙汝師汝師嘗夢謁古忠烈祠數所  
燈火煌煌獨睢陽者寂爾問之曰而不知之  
生睢陽之降乎乃今則爲徵兆云

嶽降賢生古復今睢陽祠裏夜沈沈  
還將危世攫城念不負明時伏闕心  
勳業丹衷常慷慨江湖青鬢未蕭森  
男兒事業應無限努力寧忘此日襟

次李明府韻答沈狀元狀元有奏記三章  
陳經權忠孝之說

不負科名早見今肯因温飽竟浮沈  
五臣已昧經權義三劄仍勞忠愛心  
葵藿誰人徒耿耿薜蘿何地不森森  
且須點檢漁樵業江北江南共此襟

丁丑冬紀事書內子扇



綱常天地閒所係應非小云胡明盛時而甘廢名教天象昭然垂  
人心忽爾槁衢巷且脣譏臺省以諛導公卿但持祿廉恥亦盡掃  
平生何所學學以明忠孝慚予縣弱資欲障狂瀾倒慷慨不成寐  
中宵恆悄悄子問將何爲有言第相告告以予所懷聞之心似擣  
矢念捐此軀然燈乃具草攬衣起裁布手自縫袴襖一針一淚漬  
寸寸肝腸攪明發扣帝闈服之往蓆橐茲去知不歸相捐何太蚤  
老親久牀蓐羣穉猶襁褓事育兩藉之諒子自分曉再拜永爲訣  
似彼分飛鳥嗚咽無容聲兒女泣相遶須臾成古今豈不縈懷抱  
丈夫自有志離別奚足悼子則以身代百叩籲天禱筆楚何以堪  
血肉盡如淖子體旣狼藉子魂亦縹緲雲日慘不舒神明鑒非杳  
旣絕幸復甦虛靈竟了了家室苦流離艱辛嘗已飽繫子殉臣節  
而子持婦道纔過死生關重結姻緣好願保再造身永諧百歲老  
用韻上大兄二首

吾兄高調竟誰如自是人閒和者疏虛席何年酬誼策空函無意

答溫書官同偶爾慚聯璧歸早居然慰倚廬正使陸沈稱宦達也  
應誤卻季鷹魚

孝友由來性自如愁深一夕鬢毛疏萱摧痛繫捐帷日草奏驚傳  
伏闕書妒自入宮辭玉署罪從編戶返茅廬聯飛鴻雁今垂翼可  
免人甘几上魚

借寓鄉居自嘲

嬾漫無家奈若何每攜妻子傍人過南陽敢謂猶龍臥北阮何妨  
可雀羅從宦已將兄產滅謀生不似季金多並湖小築今伊始卻  
悔風塵誤薛蘿

劇飲有作柬企雲頤素二兄

門前車轍有誰何最喜清狂二仲過聊共鯨吞惟玩世只因鷹擊  
已遭羅一從餘骨猶憐在百爾深杯莫厭多可怪獨醒猶未達江  
湖何地不煙蘿  
次江峰叔奉答

從容供奉在金鑾何事詞臣作諫官堪笑迂狂子宦拙縱甘放逐  
主恩寬解衣說向茅生慙折脇歸來范叔寒賴是吾宗饒碩德詩  
篇慰藉意難刊

又絕句二首

何須五嶽向平游三徑初開占一邱滿眼兼葭棲息好只今無夢  
到瀛洲

阮籍途窮世味輕阿咸亦許竹林盟清尊白眼惟宜醉莫向滄浪  
說獨醒

次子遜弟韻

一疏狂愚叩帝闈此生甘死不堪論歸兮自幸身猶在知者惟希  
道始尊歷盡世情牛可應譚來時務蟲堪捫棲遲共爾柴桑下何  
事須容駟馬門

贈董山人游嵩山

頻年大隱薊門煙此日逢君意更偏攜屐正饒丹壑興開函半是

白雲篇重關北望疑無地大華西尋到幾天五嶽已窮三島勝卽  
今猶買洛中船

庚辰歲旦與唐玄卿坐太平寺二首

獻歲春初發閒居意轉親支頤坐終日緩頰向何人爾息飛騰翼  
子甘放逐身相攜無一事差勝走風塵

爲厭塵緣擾因憐淨土幽言從祠部出來作遠公游雲宿松窗暮  
風生茗碗秋我真違世者緇鉢可淹畱

環堵初成次暉遠卿韻二首

郊坰卜築本尋幽清景偏宜屬素秋傲骨養成眞散木褊心消盡  
已虛舟但將叢桂供餘日不向長楊憶舊游榮境到來終畏路煙  
波是處可淹畱

一水斜通百雉隈蓬茆初結已莓苔家同仲蔚門常掩客有求羊  
徑始開峰影尊前將月度鳥聲樹裏帶風迴北山莫認終南路他  
日移文不受猜



送董用興會試

藝苑吾曹昔擅場翩翩麗藻更推良絕塵肯比尋常足照乘寧甘  
只尺光叢桂書傳金作帖長楊賦就錦爲裳請看雁塔君家事世  
有題名在上方

春日言懷二首

莫道名高身轉危身卑名辱更堪嗤驚心虎口時時畏舉足羊腸  
處處疑編戶君恩元不薄餘生天意竟何爲乘槎欲問支機石白  
日浮雲莽莽垂

冰雪春深尚劇寒疏梅瘦竹倦相看惠文柱後曾焚草神武門前  
早挂冠銷骨風塵堪自詫側身天地若爲寬此生已分溝中瘠未  
死人閒事事難

黃葵陽館兄過存卻贈二首

叔度汪汪千頃陂班揚材美更稱奇運斤獨羨成風手鬻紙爭傳  
製錦辭天北星文占劔動江南雲色傍帆移上林樹樹金莖露自

是偏沾向日枝

十年同調意誰如去國孤臣迹已疏華要正虛當路席殷勤尤枉  
故人書君銜新寵還蓬閣我厭餘生傍草廬但得蚤爲霖雨日可  
將洵沫潤枯魚

太宰劉應翁招登君山賦謝二首

樓臺新構與雲平杖履相攜是上卿千載豪華無復在五湖蕭散  
有誰爭衝波渺爾飛帆影登閣依然曳履聲西去浮雲垂莽莽不  
勝魏闕望中情

潮聲初定日華明復砌迴闌次第登千頃暮雲低遠樹一江夕照  
背孤城人如山立元稱柱談若河懸足解醒司馬只今爲社主可  
能居洛負蒼生

偕友重游西湖二首

西湖曾繫水滸舟忽逐高蹤理舊游酒力漸隨華月滿簫聲欲遏  
彩雲流餘生甘向人間老清樂宜從物外求信美谿山思卜築卽

非吾土亦堪畱

百頃平湖一葉舟  
乍晴乍雨總宜游  
憑虛山色嬌如沐  
入暝波光淨不流  
邱壑此生堪獨占  
姓名何事尚相求  
避人合返山陰棹  
不

是王猷興不畱

子以當路見訪先歸

宣城沈君典千里命駕一日即鼓柁去頗爲地主所慢二首

然藜曾共倚蓬萊  
此日孤帆千里迴  
剡北風流名士散  
江南星聚故人來  
物情鵬鷁皆堪適  
吾道龍蛇自可裁  
莫負漁樵珍重意  
相逢休說濟川才

翩翩俠節更仙才  
倚醉揮毫亦壯哉  
所至儀封誰欲請  
偶過關尹未須猜  
霞明水外驕相映  
雨歇尊前黯不開  
百念漸灰三徑在  
梵宮禪火照深杯

飲史太守禹門園亭次韻二首

卓蓋朱幡世所華  
不禁歸思到蒹葭  
門前且種先生柳  
梁上猶懸刺史瓜  
隨地琴尊臨水石  
任情歌吹入煙霞  
英賢半已專邱壑  
結

侶爲懽意自賒

小築非干大隱名  
肯將畏路傍人行  
稽生釣弋唯吾好  
翟相交游自世情  
檻外明霞翻夕照  
絃中流水咽溪聲  
一尊此日常宜醉  
莫遣醒來百感生

辛巳元旦四首

桑柘寒猶劇  
蓬蒿歲又更  
人情隨宦失  
世態逐年生  
病卻椒花飲  
閒翻貝葉名  
還期具瓢笠  
五嶽慰生平

倏爾逢除夕  
潯然感逐臣  
行藏心不改  
貶謫意難伸  
細雨消殘夜  
條風作好春  
江南煙水闊  
處處可垂綸

四十俄加二人閒  
百態紛物情  
終見惡吾意  
欲無聞隔臘  
雷霆起先冬  
桃李芬  
顧瞻靡所適  
鷗鷺足爲羣

年增因善病  
官罷易蒙譏  
我獨傷秦越  
人誰辨是非  
黃庭惟一榻  
白社自雙扉  
廬谷須臾事  
何如蚤息機

白光祿仰菴五十二首



霓裳舞隊乍成謳曲獻長春第一籌山色故從尊裏落月華常傍  
座中流九還煉鼎唯丹藥廿載休官尚黑頭珍重此身初度日耆  
英原自屬江州

久辭卿秩餌僊芝猶是人稱服政期檻外青山元舊業筵前金縷  
總新詞派分河洛中原色春入桑蓬上巳時乞得茅君駐顏術年  
年應見玉爲姿

趙汝師過小園次答二首

一度相過一愴然窮交惟爾更誰憐何堪路險難容足況是牆卑  
未及肩雙劍憑陵風色勁一尊牢落月華圓祇饒身在常爲伴莫  
放愁容到酒邊

滿徑蒿萊路欲迷久無車轍到門題芙蓉夾岸開教晚薜荔周垣  
長漸齊大夢總知來覆鹿清時那用起聞雞夜郎更有懷歸者何  
日傳聞烏夜啼

壽叔菊軒翁七十

吾宗稱善里稱仁愿樸如翁更可親軒外茱萸還灼灼階前蘭桂  
已萋萋綺黃獨擅山中老沮溺長爲隴上人記取年年初度日好  
將尊酒洽比鄰

顧太守體菴惲文學遠卿以禪寺原倡索和四首

棋引樵人入禪因郡守參瓊瑤酬彼此金錫自東南覺路誰先渡  
迷津眾所堪一枰成敗後此理亦嘗諳

棋引樵人入文同國士參卑棲猶拱北高舉卽圖南萬劫難須到  
諸天迴不堪願君登上界意味自今諳

棋引樵人入機忘衲子參慈雲垂塔下淨土出城南支遁空無相  
維摩病不堪祇應何所住此理竟誰諳

棋引樵人入門容漁父參風塵曾冀北煙水自江南頓挫人應慣  
飛騰我豈堪一從遭放逐沈寂頗能諳

送穆龍峰郡侯擢大名臬憲二首

持來使節是天雄百隊千旌引畫熊庖刃發劓藏更善郢斤隨手

運逾工五年雨露攀轅淚三輔河山保障功彈壓如公堪獨座幾  
時開府過江東

柳色津頭照別裾我懷沾戀更何如已令孺子常懸榻無奈文侯  
更式廬敞帝詎堪垂盼疎寒灰亦自借吹噓前驅此去雲霄迴那  
復春陽到草廬

送惲生遠卿赴壬午試登金山

雙屐相攜萬里秋煙霏銜日海西頭忽看大陸當窗斷不盡長江  
入檻流才子聲華初許國逐臣蹤跡幾登樓誰言汗漫渾無事件  
送雲霄亦壯游

兒子雍亮玄赴試金陵詩以送之

佳氣東南繞鳳皇聯翩鴻雁正堪翔飛揚並起風雲色放逐猶依  
日月光溫飽一生先矢念清華兩世更流芳而翁藉此安耕釣遮  
莫迂疏自不妨

畱雲亭次張羅山韻

偶泛銀河槎復上金山寺孤根植中流風波不須悸我來水如鏡  
譬彼平康治豈緣放逐身敢忘朝宗義未酬國士恩肯下窮途淚  
婁東遇趙汝師聯舟累日長歌見貽倚和奉答

婁江日暮春雲陰推蓬倚杖聽鳴禽長髯高步兩浮湛煙波何處  
不相尋干時計已左違世道則果所嗟非城坳馬牛呼亦可家徒  
壁立我不愁名可陸沈君且休今日種瓜當日侯古來寧少若而  
儔我有啟款辭請君試聽舉我卮中年無復豪舉思壯心豈似雄  
飛時雲霄不駐冰玉姿乃云山澤好山澤亦易老沈碑何代事亦  
小藏山之旨世不少神仙羽翰安可期丈夫事業誰能了君歸虞  
之麓我返湖之隩坐石垂綸發長嘯

贈余少府見桐

莘野元鍾聖伊流信產材梁園先授簡燕市獨登臺列宿分符重  
專城露冕來丰標渾玉立意氣可山摧霜挾威儀重風清棨戟開  
狐狸安足問桃李正須栽吏牘時多暇詩篇手自裁刑章推定國



辭賦屬鄒枚儒術真堪飾賢聲詎藉媒名期垂竹帛禮欲下蒿萊  
編戶還焚草衡門已長苔浮雲莽知已落日照銜杯光自窮簷入  
春從寒谷回寸心誠樂只半刺亦榮哉國士慚殊遇時流急異才  
夜來占劍氣蚤已射中台

九松圖爲周若齋題畫

瓊姿玉骨金石膚根盤輪菌枝旁敷可擬香山九逸老不受秦封  
五大夫生平磔硤誰與徒苓蕤雅著神仙籍蘚痕舊帶岨嶭色黯  
淡曾迴日月光扶疏更藉冰霜力微聞天籟聲蕭蕭高標勁節干  
雲霄林閒忽下千年鶴樹杪嘗飛六月濤靄翠欲流巖倒碧沆瀣  
凝華脂化赤儘容狐兔穴其傍區區斤斧奚能蝕卻訝泥蟠是龍  
種鱗甲成文勢飛踴歲寒飽歷窮且堅材大還須作梁棟君不見  
萬卉有時先披靡香飄色墮俱塵滓驕陽燔炙安在哉後凋之幹  
自伊始嗟嗟此圖得其神寶之者誰赤松子赤松子鬢髮方瞳坐  
松底落日浮雲相對閒清貞之尚正如此

和陶蘭亭韻

高價誰憐照乘光浮湛吾黨事尋常荆山落莫人人玉綵筆憑陵  
字字霜北闕且辭青鬢綬西曹曾檢白雲章相逢莫作風塵語縱  
老漁樵亦不傷

對菊小酌因憶家兄山居漫作

爛熳尊前錦作巒閑身儘可恣清懽不將媚色隨時豔獨抱幽芬  
殿歲寒淺白星星疑點鬢深紅鑠鑠欲披肝秋容病思殊相慰花  
萼堂前得幾看

次顧太守集史園韻

棲雲過雨溼林巒文酒相從自足懽龍臥漸知春日動鷗盟且共  
歲星寒微名忤世堪銷骨畏路逢人莫借肝最喜大夫能作賦翩  
翩白雪郢中看

坐雪又次韻

鋪瓊飛玉徧林巒高臥袁生且自懽入幕雀雛羣就暖臨谿鶴侶

獨凌寒慣甘澹泊窮途味合受辛酸烈士肝凍樹冰花景殊絕登樓恨不共君看

飲顧太守東園用韻

方塘小島結煙巒三徑能招二仲權入定身依禪榻靜常明心與佛燈寒酒尊到處堪交臂詩句工時欲琢肝澤畔歸來猶未醉漁人錯擬獨醒看

賜餘堂集卷五

賜餘堂集卷六

詩

癸未渡江逾淮舟次偶作

二月離鄉問去程最慚道路有逢迎風雲北極時時態花月東山日日情愚谷正堪安拙分聖朝猶自采虛名君恩特下臣身在敢向柴荆度此生

過彭城遇莫憲使紹亭年丈賦謝二首

華名早歲漢廷知三十橫金亦自奇風采獨持中土憲春陽猶繫魯人思才同河決寔堪禦心比冰清未許緇儻念東南根本重幾時開府慰瘡痍

春風首路賜環時知己逢君欲解鱗山閣論心重對酒河梁分手便徵詩扣閣寔忍談前事編戶無從寄遠思今日一尊渾大夢可堪相聚忽成離

予以丁丑上書被杖杜母舅小菴翁實與難而以身後事相託者



也迄癸未蒙恩賜環翁感疇昔又慶遭逢悲喜參并追隨道路  
至清源乃別出扇徵詩率爾爲贈翁老矣歸而卻掃一切事善  
頤養安子孫之養是囑

憶昔雷霆震撼時與公患難共相持六年贏得殘生在一日翻承  
聖主恩隄柳重攀渾似葢江梅遠折且停卮故園自有堪棲樹莫  
向他林更借枝

送馬校官

京華何幸遲儒官邂逅新知似夙懽岐伯方書曾徧閱劉生經術  
本堪觀清朝會見梗枏品絳帳何辭苜蓿餐此去廣陵應不滯辟  
雍虛席待登壇

偕李中翰赴蕭太守之宴於東昌郡樓樓雄麗甲天下足稱大觀  
偶成俚句兼寄懷趙常熟太守爲常熟門下士

雄城飛閣頰憑陵太守招攜試一登東海齊風今再表北宸虞日  
正如升誰能賦鷓思王粲獨喜登龍識李膺故國長安俱在望攀

躋直上最高層

韓趙二翰長內苑觀蓮次韻二首

待曙朝回蚤探奇步較遲瓊林涵旭日錦澤度香颺岸柳牽衣帶  
盤蔬薦縷絲雨來塵盡滌不獨爲催詩

睥睨周廬迴縈紆複道遲殘荷嬌晚色高樹傲涼颺帝樂歌魚麗  
民艱問蠶絲太平堪獻頌無逸且陳詩

癸未除夕徐支泉蔣思雲各有作漫和二首

此夕他鄉藉兩賢因憐駒隙駛如鞭長安酒可消殘夜故國書來  
說有年報主身同霜後柏逃禪心擬火中蓮遙知千里椒盤會應  
念游人隔遠天

虛名真是愧時賢強效驅馳不受鞭消盡憂虞憐往日從來感慨  
入中年君恩再熱青藜火朋好初違白社蓮耿耿宵分渾不寐涓  
埃何以答堯天

甲申元日早朝用韻二首

環珮叨隨侍從賢鄉心無計問歸鞭皇風休暢從茲日聖澤涵濡  
已有年燭影翩翩明玉署漏聲隱隱下金蓮仰知華袞原無闕安  
問絲綸欲補天

時逢主聖更臣賢此際忻忻願執鞭黎獻弓旌全盛日甘泉烽火  
太平年條風漸著金門柳瑞氣先占玉井蓮念有瘡痍多未起芻  
蕘何語可聞天

和蔣徐二兄元日詠雪二首

椒花方對酒瓊樹忽飄瑤積素鋪階淨流光入牖虛徑開因得蔣  
榻下爲延徐欲比袁安舍其如長者車

履端趨袞冕獻瑞散瑤琚余愧歌巴里君能賦子虛院梅凝玉潤  
宮柳著花徐白馬朱衣者衝寒奉屬車

送李仰城都督山西

漢家飛將李將軍三十專征出塞汾家給通侯懸鵠印陞承新詔  
煥龍文轅門朔月朱旂捲幕府秋風畫角聞干羽在庭封貢久可

煩鈴略靖塵氛

送丁侍御右武被謫還豫章

籍甚丁君豫章客白簡烏臺幟應赤鵬鶚聲高九塞雲驂驪氣壓  
千羣色余來闕下起田閒眉睫相看意莫逆誰道鯨鯢氛沴銷此  
時狐兔繁蹤跡孤忠目擊心彷徨手披霧障扣天閭讜言直欲明  
無將折檻何難借尚方一時巨寮盡芒刺羣攻舉國真如狂豸冠  
鷄肋便可挂是非胡乃終無當壯哉意氣何卓犖恭承嘉惠歸廬  
壑寧知大道須委蛇榮途共把諛風博昨餞鄒生今餞君悲歌起  
舞增離索易水縈迴忍別荆金臺巍峩更失郭洛陽少年入漢宮  
一忤絳灌難爲容明明在上者堯舜其身雖退言且庸乾坤去住  
亦偶耳丈夫豈必絀胸中我今已蠟東山屐長驅明發追芳蹤

送吳勉齋司訓任邱

相逢此日意何如爾我浮沈廿載餘編戶何期新寵秩拜官猶詫  
舊公車年華苜蓿還傾酒春色滹沱好著書儻有薦雄文似者上



林堪借一枝居

送秦汝立二首

相逢此日暫開顏往事重論涕欲潸肝膽從來能借客文章自是  
可藏山危身藉爾難酬璧清世慚予獨賜環儻得君王聞姓字弓  
旌早晚到田閒

長安春色問游鞭猶憶中書侍從年萬死虎鬚同我捋一官鷄肋  
爲君憐拚來薄宦風波失贏得虛名日月懸更挾敝裘還故國可  
能分手不淒然

乙酉夏發潞河四首

扣關四疏始回天乞得閒身脫屣然去國慣於輕似葉投時奈可  
直如弦漫誇漁長西湖畔忍負君恩北斗邊見說金門堪避世原  
知不是滑稽仙

頽來金幣上方珍詔許皇華帝命新宦拙祇畱歸去草名高敢作  
後來薪鄉山猿鶴仍依主澤國魚龍合避人此去亦知煙水闊可

能無愧再生身

重來十載此殘生匹馬依然出漢京不分清華多病色也因侍從  
更時名尊前新月供人醉蓬底涼颼送客征自是朝廷容汲黯其  
如嚴助厭承明

抗疏當年骨欲糜迂狂不改更違時空慚春色文園病敢學秋風  
張翰思何物堪疑秦地角無端偶忌漢宮眉湖濱萬柳開三徑蓑  
笠從吾處處宜

和韻贈蔣思雲

歸心一夕大江東與子相攜意更濃涉世愁看徒覆鹿逃名怕說  
是登龍壯懷堪寄燕臺上喜氣纔占故里中三徑初開須二仲文  
園秋色正丹楓

又用韻漫作

時違身合隱牆東匣裏芙蓉氣自濃軒上偶乘元是鶴人間堪豢  
便非龍宦情漸遠春明外暑氣全銷暮雨中賸有寸丹猶未效秋

來片片染霜楓

陳宮洗玉壘同在講筵賦詩為餞追貽前途次韻以謝

四牡恩從三殿迴一緘忽自五雲開橫經直進皇王略獻賦原推

供奉才白雪新詞誇下里青雲舊侶滿燕臺君家世掌絲綸事好

趁青年到上台

憚遠卿賦詩見送次答

清時那得獨醒人合向蒿萊寄此身萬死再生恩罔極兩年三錫

命方新忽從天上辭經幄好去津頭把釣綸自古投珠多按劍世

情澹卻士風淳

濟上贈曹侍御出守潤城二首

風采霜棱滿漢京只今三十已專城郡齋高傍青山色臺史長懸

白簡聲正怪汲生辭省闈卻逢嚴助厭承明片帆共爾江南去不

合同傳抗疏名

銅符新綰鐵城雄百隊干旌引畫熊到郡乍看迎竹馬過淮猶說

避花驄

公曾按

自慚引去虛推轂

曾特疏

見妒從來為入宮雙劍

偶逢河濟上莫教風雨暗芙蓉

過彭城簡莫憲使二首

汀花岸草席前過忽自金鑾散玉珂十日銜杯吾里近五雲回首

故人多漁藥宿雨桃花渡鷓鴣槩凌風瓠子河不是使君勤問訊可

將雲路向誰歌

幕府依然病客過只今無夢到鳴珂宦情合自風波減聖德元從

雨露多高枕尋常消白晝片帆信宿下黃河夕陽貰得新豐酒何

處逢君一醉歌

夜濟寶應次韻二首

扶搖來北極九萬徙南溟道路君恩重風波宦味輕樊中寧願畜

澤畔更誰醒此際燕臺曉稀微有幾星

濟世慚商楫乘槎入漢溟過鄉今日近去國此身輕月滿湖光淨

風生酒力醒台垣何處是且傍少微星



顧太守招集郊圃和韻

秋容客思澹相如文酒從容意不疏  
薛色媚將移片石蟬聲清借  
讀殘書甘棠蔚爾能爲郡修竹蕭然可結廬  
三徑未堪淹五馬蒼生何處不枯魚

有感次韻

江湖此日縱吾如回首浮雲業已疏  
門外雀羅無過轍枕中鴻寶  
有藏書逃禪欲問生公石倦宦仍甘處  
士廬聞道長安紛轉劇也  
知失馬是焚魚

送徐明府入覲二首

單父鳴琴不下堂明時循吏有輝光  
江波盡疊攀轅淚山月堪充  
上國裝喜怒不形千頃度褒嘉  
先賜五雲章烹鮮束溼年來事好  
把民艱達聖皇

冰蘖由來雅自持更勞撫字起瘡痍  
只今太宰當年令自昔芳猷

此日師

公與舊尹楊太宰同里

朝雨絃歌供帳處秋風桃李及門時

公曾爲京兆分

校官應知盛世翔威鳳直上高岡第一枝

乙酉除夕家宴示諸子二首

此夕今年得在家尊前次第頌椒花  
兩行兒女懽相聚再返漁樵  
漫自誇北極微名猶日月東山清樂足  
煙霞明朝未卜行藏事心  
赤雖存鬢欲華

乞得閒身下九重今宵眠可到高春  
大千世界生如寄半百年華  
宦已慵白霧山中隨隱豹紅雲天上繞  
飛龍儻然有子能酬國換  
卻而翁學老農

丙戌元日祝少府梁別駕過小園飲集二首

蕭然三徑背城幽五馬乘閒竟日畱  
懸榻故應慚孺子式廬猶喜  
見文侯松仍耐歲和風轉花已知春  
瑞靄浮最是桑麻沾雨露穎  
川渤海許誰優

獻歲呈祥雨乍晴柴扉並駐玉珂聲  
病當清世何妨久醉向知心  
亦易醒譽望已聞雙鳳闕謳歌應徧六  
龍城暫依猿鶴懽難別秉

燭纔驅小隊行

奉酬熊別駕二首

熊軾新憑攝宰年風流誰並使君賢政聲早播甘棠頌材美能紓  
麗藻篇紫氣西來星欲聚青陽東轉日初妍臨邛肯爲相如過病  
骨猶堪負弩先

出匣青萍色正寒時才屈指似君難聲華初試中吳郡詞賦先登  
大雅壇傾蓋識韓心欲折迴舟訪戴興曾闌蒿萊儻可容車馬願  
結平原十日懽

答祝南山貳守

兩載高眠嘉樹林蓬門終日雀羅深忽驚刺史新停轍猶憶成均  
舊盍簪自許煙霞堪寄跡相看容鬢轉關心年來鄙吝因離索何  
幸重聞大雅音

人日同顧太守惲文學集太平寺二首

東郊淨土正新春此歲登臨第一巡高會聚來星是客清游喜及

日爲人僧閒可結煙霞侶主聖能容草莽身太守名高文學雋驅  
馳未許厭風塵

福日慈雲護好春躋攀直上最高巡相邀把袂惟知己纔說彈冠  
便誤人出世本通經世法休官翻現宰官身諸緣消盡須平等千  
古看來一掬塵

次家兄山居韻六首

有身原是患無欲始堪娛叢桂聊開徑垂楊已蔭湖人情還爾爾  
天籟自于于儻得逍遙意行藏道豈殊

鴻雁曾聯翼漁樵且共娛蚤年辭禁闥輪日長江湖前席虛宣賈  
高門實愧于縱緣塵相在終與道心殊

茲歸羞宦拙昔悔釣名奇吾道饒千里人情隔九疑伊呂之間事  
羲皇以上時置身惟所遇此理竟誰知

漸覺年華改因經世態移不難家似屣獨愧念如絲一日閒方得  
千秋計已遲要知山澤裏亦自有驅馳



一千休沐澤久絕貴游書名位兼寧得江湖縱所如忌深不死後  
幸甚此生餘在年將艾予心日負初  
誰得超塵外那能不世閒歸田仍冀起從宦復思閒室窶因謀食  
心勞爲積餒何時如所願此理定須慳

丁亥元日試筆四首

十年又過再生軀劇飲高眠自足愉若是長安逢此夕衝寒待漏  
在周廬

春風獻歲到菰蘆贏得閒身一事無君闕親祠稽首畢便拚清興  
入屠蘇

陰霾凍霧已崇朝棣萼椒觴慰寂寥忽詫風雷天示變清時何處  
是東郊

碧山白社意蕭然對酒呼盧共卜年一擲梅花三十樹得安耕釣  
便神仙

王肩昌太史寄訊次答四首

爲聞芳訊喜因覺索居悲產減家徒壁年增鬢欲絲季鷹吳下日  
司馬洛中時且問漁樵業毋勞鍾鼎期

宦游都向倦世態總成悲宣室三湘詔桐江一縷絲邱園堪白首  
廊廟自清時若有山陰興能爲雪夜期

人自論工拙吾寧浪喜悲遺榮原若屣息念漸如絲怪爾能忘世  
慚予善忤時一區新卜築千里共襟期

畏路真堪避生涯未足悲田閒聊秉耜澤畔可垂絲九日登高處  
雙魚寄遠時遙聞饒竹石只此是安期

再寄王太史二首

已羨梁園萬頃花更移小島到君家草玄日對三生石蔬素時餐  
五色霞君書來病脾春雨漸滋蒼蘚媚夕暉長挂翠微斜徵書縱

下塵心少猿鶴相依莫浪譁

輦石疏泉伊洛閒忽從二室見三山藤蘿蔭護幡書靜麋鹿羣隨  
抱甕閒司馬可能終獨樂求羊還是共誰攀此中大有逍遙意傲

殺同儕供奉班

白光祿仰菴賦贈次答二首

弱齡登第壯年歸廿載高懸一少微綠野故傳裴相宅黃梁今授  
呂公衣階前芳桂嬌秋色巖下喬松駐晚輝只恐蒲輪徵宿德可  
能長掩薜蘿扉

名園每到便忘歸日日知君坐翠微蕪陋未堪酬綵筆慙懃其奈  
賦緇衣涼颼送夏將無暑明月逢秋倍有輝港出采菱剛十里扁  
舟正可扣雙扉

次韻自述二首

敢言名遂合身歸本爲材疏世念微未效臣勞徒拂袖卻逢主聖  
正垂衣黃金結客慚無計白璧投人恨有輝太傅香山爲社主肯  
容文酒共柴扉

浮雲倦鳥出還歸縱得飛揚意轉微豈藉高名垂竹帛不妨初服  
製荷衣自甘寂寞絃中調誰駐榮華鏡裏輝堪笑深源身旣隱素

函猶自到黃扉

胡簡菴六十

畫棟新開粉堞幽一尊初度爲君畱操觚才美原稱項總角交知  
漸到頭且共雲林招隱伴不妨經術老名流請看汗血能千里好  
嗣忠安竹帛猷

秋日行園放歌二首

再生一日亦已餘此身那更堪馳驅但鼓中流漁父楫久絕長安  
政府書朝侍嚴宸暮祕閣三徑荒兮空帶郭偶因請急淹歲時便  
擬辭榮占邱壑高名大業還誰兼手可炙時心如煖飯蔬飲水自  
有樂斗室蒲團足養恬西家得意盛賓客東鄰厚貲求田宅白眼  
滄浪總不聞電光石火須臾熄君不見繡縵當暑好威儀觀者嘖  
嘖皆羨之熱中沾背第自苦此苦語人人不知

卜居築室計已遲教舞徵歌力不支馬牛自苦應難了鳥獸爲羣  
何所之旣不求榮須遠辱雖不逃禪亦避俗楊柳圍成瀉水西藤



蘿蔭合郊扉北薄田二頃屋數椽高睡三商書幾編寒暄卒歲惟  
裘葛饗餐一日可百錢餘生所需僅若此此中儘得逍遙理心無  
他繫世無求萬計干營都已矣君不見七十趨朝官未休八十謀  
家夜握籌紫衣稱貴黃金富昨朝華屋今荒邱

戊子元旦作是日久陰初霽前三日生第三孫而余年四十九矣  
四首

偶因移疾久翻及服官期衰始今偏覺非多昨未知金莖含舊露  
玉樹長新枝晴旭回寒臘陶然且一卮

餘生方一紀去國又三年彝鼎慚先哲箕裘望後賢祇因焚草蠶  
不受積薪憐豈敢云知命諸緣已盡捐

伏臘眞虛度蒿萊亦帶人四辭朝請疏三閱里居春雞黍貧堪具  
鶯花久更親五旬明歲是珍重再生身

大齊將及半碌碌竟何爲宦拙安能達名高不易卑眼青先著柳  
心赤尚傾葵孫兒虎子跳歡笑日相隨

送諸門人應試二首

十五連城價未酬清時許借漢宮籌揚髻各挾龍門兩振翼誰橫  
鳳渚秋下乘豈堪都講席前期應作旣焚舟在門桃李公家事此  
日諸生一網收

多士如雲氣若雷聯翩結束上燕臺何當絳帳傳經客盡是緇衣  
授粲才劍氣直干雙鳳上文光今向六龍開藉君慰我相如渴分  
得金莖露一杯

送諸子應試二首

翠微高枕白雲秋欲效臣衷屬爾儔渥產寧無家驥出隋珠自有  
國工收三題雁塔名堪續兩直鸞坡志未酬好向修途爭努力而  
翁藉以老林邱

亦從藝苑占時名名下無虛士始成荀氏已知先澤厚竇家今見  
幾枝榮門容駟馬應非望壠集祥烏雅是禎幸值文風釐正日大  
方聯壁著先聲

顧太守體菴移尊過小園奉答

酒態文心老不如追陪容我一迂疏  
筵前窈窕名姬曲几上逍遙  
傲吏書金粟浮香初入座  
玉盤沈影未還廬  
後期須訂盤餐約  
隨分常供只菜魚

與毛叔丈復古飲菊下次韻二首

金谷偏宜貯玉妃  
翠紅隊裏意翻飛  
萬年枝賦長春調  
卻憶揮毫侍袞衣

參差共說錦爲岡  
酒色花容照麗妝  
最喜新詩裁豔句  
更誇座上有蘇黃

題梧竹鳳皇圖二首

棲梧鳴高岡  
食竹巢阿閣  
虞廷正垂衣  
何事在林壑  
有鳥千仞翔  
徘徊不肯下  
羞與雞鶩羣  
所以見者寡

祝公祖枉駕清言辱賜佳句依韻奉謝時有拂袖之意因爲之從  
史云

風波滿地戟如林  
一返蒿萊歲月深  
拙宦共君甘歷落  
殘生如我任浮沈  
輕雲閱世頻經眼  
涼月當空欲洗心  
自是清時多隱吏  
不妨抱膝且高吟

張太夫人八十排律

綺席歌傳壽母詩  
攀輿勝接浴賢池  
金陵酒借金莖露  
璧水媛如璧月姿  
孝友家聲梁苑最  
絲綸世掌曲江遺  
南雍壽域翔青鳥  
北海賓筵啟絳帷  
諷吐瑞霞看晝永  
葵傾福日駐春遲  
六朝麗景山同洛  
八表修齡鬢甫絲  
誥自鳳銜來碧落  
杖扶鳩處是青藜  
仙籌詎止稱人瑞  
女範還堪作后師  
麟玉正需調鼎業  
金緋剛及舞斑時  
願畱皓首千秋景  
好慰蒼生四海思  
愧我棲遲甘樂泌  
羨君聖善解含飴  
敢云鳳詔青雲侶  
聊和鴻都白雪詩

己丑元日試筆十首

五十稱衰始吾衰  
杖後偏詎云知命  
日休說服官年碩  
果安能剝寒灰  
豈必然春來登覽具  
雙屐五湖船



貝倉堂集卷之二  
未知今日是但覺昨年非羅雀交情淺焚魚宦與微逢人多按劍  
戀主正垂衣見說長安事孤臣淚暗揮  
再歸甘三黜畏路傍人難北極風雲變東山歲月寬休將斥鷃適  
猶作臥龍看一擲花如錦占年滿座驩  
漸覺風流減那驚月旦新衡門聊卒歲幽谷欲回春宦拙寧嗤我  
名高竟累人豈因甘腐鼠折節向平津  
居諸時序改寥廓夢魂清忤世因叢謗辭官更忌名人皆嗔不死  
我欲學無生誰道江湖適風波尚未平  
元朔遙瞻闕春風又掩關豈知休沐久猶在是非閒女亦供浮白  
孫尤解舞斑毋煩深點綴吾已習湖山  
尚憶垂髫日無端鬢欲絲恆言寧諱老爲樂未稱疲世事看棋局  
生涯付酒卮田園蕪已久翻怪乞身遲  
斑白年稱艾雌黃世似譖夷堪憎作盜蹠可譽爲廉天意原難問  
人心不易厭忠良皆所願自古幾曾兼

此地真堪避伊人未易求五年還許病四壁不須愁朱紱誰無恙  
青山自有傳剛曾經百鍊何計化爲柔

創楚身仍健風波歲屢更不因書咄咄終自守硜硜白髮無緣黑  
黃河有日清半生酬國念中夜倚青萍

送蕭中丞省母移疾二首

開府新彈執法冠抗章何事問征鞍一時喬嶽旂常重千里長江  
節鉞寒愧我從王仍去國羨君將母且辭官相違更隔天南北知  
已論交到處難

憶昔長楊獻賦初與君同讀祕中書宣恩海外持龍節總憲臺端  
建隼旗不以成功居寵利也應清世可樵漁承懽暫借垂天翼一  
日扶搖九萬餘

葉海亭七十

久甘蓬累避牆東陋巷蕭然一畝宮橐裏自饒鴻寶訣市中堪隱  
鹿門公官廉不藉先人業家範猶存大雅風我已焚魚盟野鶴可

容齋沐問參同

贈潘孝廉可大

之子居然大雅傳東來紫氣望中浮長卿偶向臨邛過孺子因爲  
下榻畱一夕雄譚千古快三生良遇兩心求網羅豪傑須公等努  
力他年社稷謀

郊園偶書

環堵依然帶郭開主恩珍重賜歸來崎嶇宦路無難避翻覆人情  
豈易猜憶侍龍顏趨玉佩慚將馬骨上燕臺新春料理幽居事芝  
木畦閒次第栽

徽士程孟明持其舅氏江太僕書詣予山中請執北面禮出卷徵

詩賦贈二首

抱病年來總陸沈雀羅久已謝招尋雄風忽起譚天口今雨何當  
立雪心名士一宵堪下榻故人十里共抽簪因君轉念江淹別碧  
草衡門思不禁

自向吳都賦遠游多君意氣爲淹畱名高好傍青雲起望遠應占  
紫氣浮已羨難兄推日下還因似舅識風流夜光在握殊堪寶儻  
是無因莫暗投

黃祠部移疾過此賦詩枉存次韻奉謝二首

弓旌纔下又林邱賈傅年來淚未收北極煙雲時自變東山花月  
意偏幽畏途久矣迴王馭空谷猶然訪戴舟傾蓋兩懷徒耿耿相  
逢無語夕陽流

羣公連袂賁園邱風雨芙蓉黯自收環堵卑棲僧夏結片帆高枕  
客星幽違時自有陶潛徑濟世寧無傅說舟今日延津雖乍合龍  
門那敢說名流

夏日集曹鳳亭竹下

舊榦新枝萬竹閒惟翁能共此君閒亭無俗轍原名鳳客有詞人  
不姓班移席屢隨斜日轉開簾因見片雲還漢陰自是忘機者聊  
爲吾儕一啟關



聞事志感二首

野服初裁竹籜冠王陽雖進不須彈新交可信黃金易晚節還愁  
白璧難河朔酒人宜縱飲文園病客且加餐蒼生繫望終難副何  
必東山有謝安

風雨虛堂入夏寒忽聞有客下長安未離漢掖眉終妬得脫秦廷  
璧始完屈指論文今去盡直躬行道古來難小亭箇箇添新竹料  
理漁磯選釣竿

為趙見田館丈題畫竹公孫並茂圖

誰為揮灑瀟湘雲何能一日無此君此君有子復有孫琅玕斐亶  
何繽紛老幹亭亭蔥菁色吐出三枝五枝碧疏影歷歷聲珊珊白  
日清流常與適新篁稚筍發平地解籜便有干霄勢嶰谷初裁鸞  
鳳音中山已滿龍蛇氣金昆玉季多堅貞柏府槐庭次第新本支  
日茂畱餘澤奕葉如苞植要津春容秋色易銷歇勁節高標厲冰  
雪朝霏暮靄秀可餐墨花筆底飛瓊屑即看雨露自天來千尋百

尺還栽培此君孫子麗不億茲圖好向華堂開

壽孫野亭借蔣孺人七表二首

翩翩杖屨日逍遙蚤向長安恥折腰翁曾需選銓曹恥屈膝即棄去遂終老云荀氏於

今承世澤翁子龐公自古擅人豪丹陽家近神仙井白社身宜獬

豸袍最是齊眉偕住世少微南極為君高

江干閱閱是名宗善慶於今正屬公不與人閒爭腐鼠卻於天外  
羨冥鴻籌從青鳥添無算酒向黃花釀更濃清潤相輝何限量百  
迴酬酢一尊同

秦企鳳壽詩

昔曾挾策重膠庠旋得分符轄海邦麗藻直追周宅俊甘棠猶說  
漢循良二千石後閒情早五十年來樂事長山中第二泉千尺歲  
釀長春進未央

贈聞菴梁別駕奏最

三載寒帷報政期璽書春日下彤墀徧聽父老謳歌語親領君王

慰寵詞祇願寇恂常得借應知何武不勝思他年更建中丞節肯  
損功名治郡時

壽近村毛翁六十二首

心遠無喧雜居廛亦近村克家兒嗣美授產弟銜恩晚徑芳蓀秀  
名門喬木存夜長堪秉燭釀熟已盈尊

城市身雖寄蓬蒿性所便居同大隱日壽屆小春天積善心常樂  
勤生政未傳願君加七筭稱祝自年年

張洪陽移疾在道寄訊二首

一鞭遙下五雲間翻覺聲華重斗山似我迂疏宜吏隱與君次第  
散仙班祇愁晚節難完璧不願清時更賜環莫道延津容易合東  
來紫氣隔江關

吾黨翩翩盡薜蘿津亭又報故人過那堪雲路知心少無奈霜痕  
上鬢多向後功名真孟浪只今邱壑已蹉跎也知去國非忘世遮  
莫雄心漸耗磨

紀會三首

五馬雙扉帶郭開翠微深處客重來行行並向穿雲去坐坐先拚  
待月回縱飲信宜河朔侶臨流疑在鏡湖隈一尊萬事都捐盡莫  
放弓旌到草萊廿七日集史園

小樓嘉樹綠雲平雨洗炎蒸思轉清好結平原逃暑社忍虛彭澤  
賦歸情登臨物外聊堪適寵辱年來自不驚童壯交游俱白髮相

逢莫惜酒杯傾廿八日集荒圃  
虛堂積雨暑全銷知己相攜不用招有客儘堪同杖屨此身況已

屬漁樵席移雲綺開金谷歌徹霓裳度玉簫浮白談玄興逾劇不  
辭深酌坐連宵廿九日集周第

送徐明府尊公歸山東

宮彩初裁鬢始華河陽新滿雨中花應知家有祥麟趾會見門容  
駟馬車秋色客槎還海岱春風仙杖倚煙霞徐卿種得藍田玉積  
慶全昌正未涯



贈王通府考績

列郡中吳重分符別駕崇循良今召父豈弟古文翁吏畏無遺寶  
民艱若在躬恩推伊水潤才毓汴都雄芻粟星輅入桑麻露冕通  
窮黎成就日下士亦承風春盜孚遐邇冰清徹始終催科堪比拙  
保障自紓忠惠績畱刀犢賢聲動鐵驄勞真異等上名豈眾人中  
一考初書烈三旌足表功扶筇來父老騎竹走兒童寇借今伊始  
何思正未窮抱疴身久遯折節禮猶隆夙誼藏丹悃俚詞達素衷  
亦知心未罄應愧賦難工

莊師楚園同憚生遠卿過負郭環堵中登樓看雪四首

出郭行蹤絕悠然似遠村邱園敦友誼歲月戴君恩賦雪徵詩簡  
談天佐酒尊立深時漸暝猶憶在程門  
寂寞袁生臥逍遙莊叟來相逢成塔爾小語亦雄哉玉屑人人吐  
冰花樹樹開明朝還有約乘興未須迴  
諸天渾入鏡促席且呼盧不謂傳經士猶堪作酒徒庭疑栽玉樹

人似坐冰壺試問飛來雪曾添兩鬢無

徑僻頻辭客朝來特啟扉一空成水觀諸相息塵機坐久天花亂  
歸遲月魄微雅知邱壑穩莫問市朝非

送梁聞菴擢京兆二首

幾年雨露徧柴荆遮道牽衣此日情豈爲帝鄉宜召父遂將京兆  
借張卿秣陵濤擁仙槎迴建業山當客署明畱滯周南應不久舍  
中竹馬待專城

鷓首遙從燕渚開離懷漫爾寄深杯吳中舊著循良績江左新需  
保障材疏拙亦蒙傾蓋好明清曾洗覆盃哀東南凋瘵今爲甚何  
日重瞻棨戟來

楊甥時建持筴索筆因成韻語以代訓辭

世業還誰振家聲屬爾賢絕塵調驥日照乘韞珠年學可三冬足  
身須百行先明經今邁迹原自有韋編

對雪懷沈純父二首

對此中林雪徘徊未闌卻憐千里共靈似一堂看折竹驚禽鳥  
飛花點藥闌悠然念安道誰謂放舟難

袁生蓬臥久邴氏宦情闌已辦青山計聊為白眼看思深惟隱几  
望遠更憑欄自詫窮途客山陰棹亦難

沈純父忽命扁舟并貽佳詠次答二首  
中散由來七不堪休文稱疾亦茆菴艱危世路俱應倦頓挫人情

久已諳狗監原知無尺一狙公何事有朝三相逢但可漁樵語儻  
及經綸未許談

為念文園病不堪衝炎一輦到茆菴風波天上曾同涉溝壑人閒  
亦共諳殘骨只今生是再直躬自古黜宜三恐煩太史占星聚安

得平原十日談  
送兒亮應辛卯試京兆沈先生放舟橋李下榻柴荆時兒亮領諸生將上公車矣贈之佳音叶以險韻首途伊始

生花入夢筆如江此渡應焚舊戰艦譽起行驄推爾一聲先鳴鹿

許誰雙飛黃並捷金為勒浮白齊傾玉作缸門可張羅時已久里  
中重樹錦標杠

畱別鄒爾瞻  
八年成一別容鬢各侵尋拙自求完璧窮誰問鑠金江湖今日色

冰雪舊時心我已甘雲臥君寧恨陸沈蒿萊空谷久荆棘畏途深  
徐孺常懸榻姜肱暫共衾逢人多按劍忤世少知音所以臨岐淚

潸然欲滿襟  
與劉司業

中天華月挂城隅古刹清尊暫與俱抗疏青萍原北斗傳經絳帳  
且東都偶依玉樹光相媚為映冰壺病欲蘇同調未須憐失路吳

山荆水自菰蘆  
與甘比部

邂逅招提馬首停蕭然鴻色遠冥冥一官怪向閒曹滯廿載疑從  
大夢醒叢桂月中當座白片山雨後為君青依依丙夜猶難別明



發分攜迹又萍

與蕭比部

漢傑時名雅屬公一尊傾蓋偶相同北門旌節新推轂西粵干城  
舊紀功出匣光芒原自壯當筵氣色爲誰雄祇林一夕三生話不  
讓談天碣石宮

贈蘭卿

相逢此日最堪憐一夢初回二十年肯爲當門誇大國願將紉佩  
託高賢霓裳夜舞風前柳露掌秋生火裏蓮邂逅旣難離更易中  
天華月好畱連

壬辰元日二首

窗竹平安枕自高弓旌寧用到蓬蒿最嫌矯矯猶龍性聊喜森森  
並鳳毛天意玉成良不薄人言金鑠總徒勞春來未卜行藏事且  
向條風試濁醪

年稱服政又逾三此日屠蘇飲未甘憶遠不妨思若繫悼亡其奈

念如惓

昨歲喪家兒

同儕盡起鴻儀漸孤抱猶蒙虎視眈爲謝故人推  
轂意菟裘湖畔柳毵毵

毛六舅二思少負雋才蚤馳佳譽視一第猶掇耳屢試不售而里

中胥有挾怨修卻者予以百口保之誣始白今應貢上公車矣

聊成韻言用壯行色二首

蚤曾工挾瑟老尚鮮知音冀野應無駿燕臺自有金一經惟素業  
三別尚雄心予己文園老誰爲頌上林

翩翩書劍客結束上皇州美玉終難韞明珠豈易投陽乎幾虎口

亮也竟龍頭題塔黃門在高名可續收

送毛二思司訓太平二首

談經國士舊名家雙鬢公車已漸華薄宦自甘盤出藉雄心猶夢  
筆生花百年道澤畱青瑣君爲黃門古一代儒林起絳紗最是宛

陵山色好廣文官舍帶煙霞

一片寒氈向敬亭相看還得眼誰青少年作賦推鸚鵡暇日裁詩

寄鶴鶴立雪諸生堪佐酒談天一夕半傳經磻溪自昔多名士應共毛萇入漢廷

太平尹周君毓所借其弟卒業太學有一日之知今既十年矣緘書寄訊猶然舊誼也而毛妻兄司訓更辱愛雅索詩爲贈遂成俚句用布積懷并爲次公望云

二首

拂衣違世只菰蘆西蜀東吳歲易徂忽見魚書傳澤國始聞鳧鳥領天都桑麻四境陽和徧桃李諸生化雨敷惟有敬亭山上月秋光清徹映冰壺

明珠寔肯暗中投曾記當年善價收入室無聞予自愧題橋有志爾能酬弦歌暫假專城綬簪笏應操佐國籌更羨小蘇名漸起聯飛共蹴五雲游

癸巳元日四首

塵世五旬逾四歲詞林二十又三年偃蹇一生因底事半爲編戶半歸田

棲息衡門仍召謗飛揚雲路更稱賢窮通豈但無憑也毀譽原來亦偶然

量擢新銜仍五品亟稱舊疾又三章報人索賞行人費賣卻今年卒歲糧

曾甘虎口彈權相既侍龍顏作近臣何事風波耽畏路不歸邱壑置閒身

題像吟書畫史李生扇效白太傅體

曾於八載前爲我圖小像時惟四旬餘已非疇昔相今乃半百逾益詫衰羸狀齒髮日蕭疏色澤若蒼莽眼翳精差炯肉瘦神猶王新移學士銜遄賈宵人謗因乞邱壑開始覺襟懷暢辭榮身果輕知足心無恙圖中所缺者豕兒傷既往圖中未載者諸孫添漸長孫添催我老兒缺令我悵于歸惟女一聯登有子兩女已宜室家且免睽攜想子卽未廟廊庶慰箕裘望授經尚五男雖愚匪佚蕩怡情弄羣穉堪憐多秀爽所遭皆倖福何事猶羈網種秫湖田中



結茆湖隄上葦薪足供炊魚羹可充餉盡灰經世思粗給卒歲養  
茲欲更爲圖當作何等樣將擬陶潛醉而無飲酒量將擬范蠡游  
而無載姬舫但畫釣耕身不受簪纓鞅直到龐皓年再倩丹青匠  
知命吟書星學顧生扇

富貴須在天與奪詎由人我生命值丑名曰磨蝎神況值字同宮  
卽此是荆榛月身喜當斗木難忌入秦韓蘇本相似彷彿恐未眞  
文章安可及偃蹇則有因土主化爲囚心事寧常伸而又度躔仇  
交知多不仁行直輒招疑言忠恆見嗔立朝好廷諍不能媚要津  
處家恥面從不能悅至親舉世奈諛佞而我獨斷斷天空守我命  
凡事合遭屯水宿剋我恩半生已沈淪辭官曾四疏去國將十春  
宦途猶下石官銜久積薪朋儕爲我嗤戚屬爲我顰嗤我懷骨鯁  
顰我披頰鱗何不鍊頑鐵且作繞指馴此豈我之罪皆緣生不辰  
高華良匪賤飽煖未全貧大齊稱百歲今幸逾五旬菟裘有邱壑  
漁笠無風塵東臯可秉耜西瀆且垂綸爲謝君平卜原非肉食倫

癸巳春以學士起家甫聞除目遄挂彈章賦此二首

一官慙落半生過何事弓旌到薜蘿市口構成那得虎宮眉如盡  
已非蛾盈庭孰不操前箸砥柱誰堪挽逝波最是冥鴻先矯翼縱  
施繒弋奈予何  
賜環復下漢宮泥班進高華亦量移匣裏芙蓉安肯試橐中薏苡  
不須疑焚魚心與年俱艾磨蝎辰逢命是箕久向枋榆棲漸穩可  
堪重借上林枝

自輓四首

生死旣歷炎涼備嘗而今而後孰短孰長脫假木偶丟臭皮囊北  
山之宅南山之陽  
節義之名聲溢其實高華之班位浮其德雖多顯過或鮮隱慝飾  
巾自省蓋棺亦得  
天道循環人理消息取精已多定算無易雖假數年總如一夕勿  
須過傷各思努力

氣升太清魄降下土乃反而真永無怖苦向兆先徵今識去路繫  
果青衣合歸丹府

見會集卷六

賜餘堂集卷六

賜餘堂集卷七

贈序

郡侯施龍岡陟粵東憲副序

郡侯秩倣古二千石君千里長萬夫位尊而責專所轄有縣縣各  
置令宣上之化以致之下其視郡若臂指股肱然今之探吏治理  
亂之幾究民生休戚之故者孰不云繫縣守令哉夫縣之所御之  
境郡之地也令之所長之民守之民也縣之理不能概之於郡而  
徵守之能其郡也則視其縣之令而知之彼爲郡者多養尊以示  
重隆體貌以圖自逸恆未嘗事事而形勢之所格禦法例之所拘  
攀彼此乖越志意齟齬飾情具文以修其外關白期會縣一切以  
遁心應之而郡復以喜怒好惡之私從違予奪之權睽拂牴闕於  
其閒至叢脞刻深則下兼而中撓或有意督過之如束溼而操急  
也縣雖良其能以自理乎然則縣之理不理之係於郡也信矣歲  
辛未龍岡施公守常郡迄今五越載而屬邑令茹君某輩亦是歲

賜餘堂集七

一



縮符試邑後公下車時無幾也公博大膚敏有殊采絕資卽人人情實不俟徵發而底裏洞徹無毫髮能自匿者公顧持體要條紀綱以身爲諸邑倡斟酌盈縮務同心協衷虛懷屈策未嘗絀胥町畦精白奮揚明示意嚮俾諸屬邑各展其能舉其職以佐百姓之急凡所質請朝入而夕下也兩造辭具於縣以上之郡而聽剴裁可可否否或允讞駁期情法之平乃已同非比卽異無所猜嫌胥吏蝟集案牘隆隆山起公握管而散之如馳庭中虛無人卽大猾宿究罔不闕口失聲稽首稱神明焉適銓衡復久任之策以贊維新郡縣長不得數遷易故公之率屬邑以守郡也爲最久頃時部使者將指追逋貫嚴綜覈倚辦切責於郡縣者旁午至奉令或重困民殉民情則無以當飭法申令者之意而追已之罪公乃塵身悉慮與諸屬邑議去泰去甚擇其宜者急者先之卒之下無怨讟而上亦無所忤不者紛更摘抉遞起繁興縣之令分卑職瑣將安所措矣每聞部使者薦剡列上諸屬邑罔有遺焉而且褒然首他

郡是故觀於縣之令而知公之能其郡也不啻古所傳循吏已爾茲者晉厥官往副廣東臬憲都要肩鉅將次第陟矣茹君謂子曰吾儕久在事始終黽勉庶幾無崇愆大戾於茲土寧詎自能哉扞揚小善而彌縫其闕失郡大人之德之教覆露成全之賜也今行矣子郡人又史氏盍修一言以紓眾款予曰唯唯夫公之行士失師民失父母操觚陳詞者言當人人殊蓋紀公守郡之績更僕未易縷數而憲司要職粵地遐壤時方緩急當亡付託之重夫人而知之若文武爲憲折衝尊俎舉戈鋌之民而衽席之此又公之壯猷餘緒耳以故不具論第論公之率諸屬邑與諸屬邑之所藉於公者侈一時之盛而因以諗於公亦諸屬邑之所願言者也

邑侯茹歷山入覲序

今之仕者惟縣爲難縣之附郡而當津塗者爲尤難武進故劇邑生齒繁夥訟獄填委奸人猾胥閒發巧伺里賦官租歲逋日積以千萬計而追呼供億自郡下者卽毛舉萌生匪縣莫與承按史臺



司督察於其間則以繩墨相要束操予奪譴舉之權無敢抗者而  
貴人信使車蓋往來趾相錯於道句稽期會之煩與夫廚傳候謁  
尙辦應接之勞恆宵衣而旰不遑食也可不謂難乎若茹侯之令  
武進則又難之難者異時爲縣不二三載卽以遷召行匪獨徼榮  
無也亦日夜跂徙官而釋負焉侯自縮符蒞邑新天子加惠元元  
與海內更始則令郡縣長久任以佐新理故侯之在事也閱五年  
於茲旣歷兩考矣時方飭法申令嚴綜覈之條宿貫積勞取給責  
成於旦夕而建議圖新承風雅化詭隨者從與磯激者蹠盪不拂  
下情則無以當上指夫在事之久而又遭時之艱如此侯則出其  
惇大和平者奉職循理慈祥懇惻周浹旁皇於四境不匿械畜機  
爲撻挾之術亦不持嚴勵威與民相角逐博赫顯之稱聽讞論報  
靡由窺喜怒而兩造之情具得咸心服神解以去上所切責而操  
之急則不激不隨酌興革之便稽經常之則惟去泰甚與民宜之  
爾不者卽以去就守吾官於毀譽利害寵辱之虞它人所圍轉波

靡者視之漠如也興學修文課菽端軌子弟咸知所嚮方至其兢  
兢節愛一絲粟之微不妄費而躬所御暨室家服食無殊韋布時  
自初服以迄於今日較若一也部使者列剡交譽於朝凡數十牘  
而邑之士若民喁喁焉稱怙恃於侯云茲行也入覲上計敘功程  
能必且舉治平第一當內畱而崇陟矣校官某君諸文學某生輩  
謂故事有餞言授簡徵詞於予予則知侯之深竊慕侯之政之成  
也因得與校官諸文學論敘而揚厲之輓近世以來吏之以最聞  
者大較多著於材指而不必出於誠干譽而譎飾僞而勞徇上而  
靡眩民而厲卽兩漢而下如潁川渤海輩亦往往以材指樹功名  
之幟或以漑田書或以種樹書或以擊盜治獄書其績固班班可  
考乃孔氏之徒若宓單父者嘗按之絕無他表見然流風遺意歷  
數千百載而俎豆之不衰特鳴琴不下堂焉耳是烏可以丰容色  
澤爲哉侯西北產也西北多慷慨自喜武健以相高而侯顧循循  
穆穆獨以愷悌樂易之誠與邑之士民相撫摩而陶育之未嘗有



可驚可愕之績移人之耳目而膏澤下流則淪肌浹髓里談輿誦莫不曰子產者眾人之母也若侯者非誠之入人深而流風遺意俎豆於數千百載之下者耶孔氏之論政舉經綸道德之屬皆統之於誠誠則可以獲上可以治民彼特以材指相矜者自以爲易卒見其難能勉於暫未必善其後也然則在事之久與遭時之艱又非侯之所以永終譽者耶校官諸文學習孔氏之業者誠身動物之旨素所聞而於侯之政之成也益得所驗矣請以斯言爲侯頌

郡侯譚韋菴入覲考績序

南昌譚侯守晉陵既三年當奏最上計於司功者適朝會之期且爲述職式序之行也上方開明堂執大象照臨四海綜覈羣吏治行賢績若侯者不畱爲三事九列如漢潁川渤海故吏則賜黃金璽書褒嘉而返以終惠我桑梓亦不過效河內民借寇君一年耳諸寮宋少府祝公別駕梁公熊公司理張公造不佞徵祖道之詞

不佞辭不獲因諭於諸公曰侯之師帥吾子弟也士鼓於宮者能言之侯之父母吾黎庶也民歌於野者能言之侯之名實久而愈益孚也監司部使臨於上者能言之不佞何言無已請言諸寮宋所欲言者乎夫語吏之循徵諸士民語吏之賢徵諸寮宋循吏易賢吏難得士民之心易得寮宋之心難蓋今天下不無砥節樹閑趨繩履檢之人矣聲聞所流精光所注每見慕於遐方或尚論於曠世而生同時居同里恆弗與也匪直弗與色於怒言於訾朝譽夷暮毀蹠何也溺其相邇也而狎侮之嫉其相形也而伎媚之語云同枝則啄同宮則妒世愈趨而風之愈漓也矧寮宋之閒乎列廡而居聚堂而處其迹至相邇也其賢否最易於相形也爲之長者晨夕率乎其佐而爲之佐者煦煦起起晨夕受成乎其長鑒貌於眉睫之外警情於色笑之中讚許推讓或示恩或徵於至念許謀商確或飾僞或發於純誠猜嫌或萌幾微莫掩是烏能強合私徼輕投驟中者哉今侯爲之長軒夷洞徹有廩廩德讓之風推心



置腹由衷達表絕不爲纖妮旋紆町畦城府凡所稟仰輒披情愫善則揚之闕則彌縫之惟恐其令德弗崇修名之不著也至念所徵純誠所發能使與偕者乎意於接席之久嗣至者委心於傾蓋之初靡不人人感服者斯所謂斷斷休休具大臣之度而爲賢乎漢吏循者未必皆賢果賢矣則未有不能爲循也黃次公善助廉吏毋失賢者心鄭當時推轂其官屬丞史常引以爲賢於己侯蓋次公當時之傳歟故緣儒飾吏學道愛人明徹部屋而不欲智自己專法行梟獍而不欲威自己出籌策計及於桑土而不欲功自己成奉職循理開誠布公夫是以甚相邇而相信且忘乎其相形而式相好也茲其所繇豈易哉侯旣易於寮案而顧難於士民乎頃不免挾微卻修單辭以行齟齬之私者信乎人心世習波流茅靡之敝滋甚也侯之所易者居之歟如至於侯之所不能強者視之蔑如第曰吾不忍以三尺法媚人耳無愧於心無忤於晉陵之士民則於去就進退乎何有侯之茲行也凡綰符專城而爲守者

莫不以侯嘗上之意嚮且視以爲趨舍也若廟堂持衡拭鑑勿淆於毀譽是非列侯爲異等而蒙上賞誠先顯異之則凡爲守者人恃侯而無恐矣則凡毀譽是非人者又人人因侯而知其無所庸矣不佞伏在蒿萊竊於侯之行覘廟堂之程墨焉盍詎言諸寮案之所欲言者而已

又

不佞侍經幄竊聞廟謨嘗謬爲之語云吏治民生屬守令守令之譴舉屬監司部使然監司部使各操其權自外而入廟堂審而覈焉治也或廟堂先受其指自內而出監司部使揣而承焉亂也至於守令臨長之域生靈蓋以千萬計矣貴宜恭賤宜拊貧宜卹富宜安強宜抑弱宜植幽隱宜燭冤誣宜伸恣睢暴戾宜戢安得羣口調而眾意之俱厭乎欲盈溪壑情險山川聽溢風聞見滄月旦卽監司部使自操其權而毀譽愛憎之移惑什猶失二三況以亂之道求之此吏治不與民生之所繇以不安也鄭受政於大夫



僑僑曰族大寵多不可爲也及一年輿人謗之以爲厲僑曰苟利社稷死生以之禮義不愆何卹乎人言且聞爲治者不改其度乃能有濟吾不遷矣卒之政成民孚稱遺愛焉南昌譚公以比曹郎積資著績主爵者推擇爲晉陵守予以林沐居覆露之下越在蓬藿室邇迹遠終歲不一再見乃於里父老所稱說者則甚習也公宅心醞粹奉職廉平有廩廩德讓之風焉下車旣三載矣飭已於箴登民於理不務丰容色澤而利病裒益之宜華離謠習之異陳施本末蘇援之故熟計便宜悉見施行若凝神而承蜩也若導卻而游刃也監司部使業已廉公治行爲三吳守第一尉薦之章凡數矣歲屢稔曠溢閒作穀菽不登羣黎子遺幾爲魚鼈公晝夜焦勞設方略以振卹之誠有切於惻癘慈於鞠育者饑與糜病與藥死與給樁掩骼噓枯振槁皆取諸肺石之羨庾積之贏未嘗損彼益此也貴者賤者貧者富者強者弱者各安其位分毋相踰越而明徹幽隱公聽冤誣威行於恣睢暴戾秉憲貞度恥於骯髒脂韋

奉三尺以爲式無敢一毫徇焉頃者盈篋之謗投杼之疑自內出而監司部使遂不得露章尉薦至扼腕緩頰以明之里父老則旁皇奔走以千萬口保公公稱疾杜門牒凡四三上弗得去公何難於去乎而監司部使則難於公之去矣郡之生靈千萬則又甚難於公之去矣久之事益白聲聞愈益彰茲且述職上計於朝綜覈功敘辨論官材於毀譽愛憎之外是在主爵者矣夫齊積弱之國也威王一旦召卽墨大夫而封之召阿大夫而烹之曰是不事吾左右以致毀者也是媚吾左右以致譽者也并譴其左右所嘗毀譽者國因以大治聖天子神明在御威靈旁敷詎敢稱引齊威事然公之臨長茲郡民有田疇公其殖之民有子弟公其誨之觀治於四境庶幾哉今之遺愛歟又何啻卽墨大夫之賢則安知考績而修黜陟之時毀者之不封毀人者之不受譴也公第云苟利社稷耳無改吾度無卹人言以終惠我桑梓之邦而已子產而去誰其嗣之輿人之頌者且交口載道計日引領於公之還矣武進邑



博士弟子被公教育最深於公之行也授簡丐言於不佞不佞即不肖必不敢阿其所好矧不佞於公見且不得亟何所好而阿之夫守令之賢徵諸士民而士則民之秀也公論所從出也今里父老之頌於野者與不佞同士之頌於學宮者與里父老同是烏可以強徼私結者哉不佞則因公而有感於疇昔之語實係治亂之機也故不忍囁嚅以避忌諱而爲之論著焉

錫邑李侯元冲入覲序

甚矣政之原於學也先師之言曰君子學道則愛人學始於幾微道極於參贊盡民盡物無非己也而匹夫匹婦之不獲則引之以爲辜本原貫徹無所矯揉真機流行無所壅闕澹泊寧靜之志敦易直豈弟之仁而敝屣浮雲於窮通得喪是非毀譽之境嗟乎此豈可與離誠飾僞干榮躋膺者較長絜短策旦夕之足哉今之爲政者簞簋損名鞭箠叢戾無論已卽治行赫彰聲光丕著者必其喜名者也不然則其矯節者也匪由於仁心爲質學術所通徒

丰容色澤爲耳是故拊循煦育見謂不虐熒獨而恫瘝之痛或解體矣精悍搏擊見謂不畏強禦而權力之津或曲跽矣懸魚拔葵嚼冰餐蕖見謂不汙苞苴而暮夜之餽或染指矣惟能盈橐而歸斯亦能擇官而進惟能相機而媚斯亦能爭途而趨宦以賄成身以財發富貴兩無失焉波流茅靡敝也極矣昔謂廉吏守職妻子貧困而貪吏受賕則觸法罹罪今則貧困者必廉吏而法之所中罪之所加又未必在貪吏人孰不欲富貴安見夫廉吏之可爲與貪吏之不可爲乎不佞蓋傷之而因有感於錫邑侯元冲李公之爲政也公學本聖修動由天則宅心醇粹奉職廉平綰符蒞事閱歲者五當覲者再矣饑饉落臻瘡痍日甚公晝夜憂勞手足胼胝出溝壑之瘠而衽席之其砥節樹閑飲第二泉一勺耳若貞女之不有金夫也巡行阡陌問民疾苦務與之休養生息若慈母之保赤子也時時臨學宮郡邑之父老子弟咨闕遺考故實相與切磨啟迪固非標門別軌虛託於天精天粹神鬼神帝之談者初無鬻



長伐異之圖終無怠成歧徙之念內有約己束身之守外有持平導和之風不爲大聲馮氣以喜名亦不爲程能亟功以矯節第云毋歎吾萬物一體之懷毋負吾所學而已至於依勢處顯之人力足以操頤頰移白黑世之所輻輳奔走奉若神明承其眉睫者公視之則蔑如也夫霍子孟之受遺寇平仲之勘難崇勳懋績照耀簡冊而子孟辨男女之序平仲篇章藻績俱稱博雅矣皆蒙不學之誚然則政之所以原於學者固自有在也公之學方精存神注日造月將由一邑而推之四海此其權輿爾蓋貫徹於本原流行於真機道無窮而已之心與之俱無窮者又何計人之知不知哉雖然此公之心也匪宗社生靈之策也世升則公法行於上而野無異議世降則公論明於下而朝無定衡今聖君賢相握樞秉鈞當稽功考績之會必列公爲異等蒙上賞以風示四方而式羣吏矣不佞在野正拙於宦而違時者也又不文何足爲公重第願公益勉於學淵淳邃蓄潛運弘敷爲異日者受遺勘難之器焉彼

擇官而進爭途而趨者公視之益蔑如矣公行矣不佞願學焉而未聞道也正欲以言質之公而請言爲僕馬先者余生繼中繼中受公教育恩最深遂授簡而書之

邑侯徐明宇考績序

徐侯之令武進蓋三年矣且上計報成於司功氏凡所經部使者察舉賢能不啻數十輩皆以侯爲最而署以異等之績郡博士諸生相率造不佞而願有請也不佞以病免里居與侯室邇人遠非公事未嘗一再見然而以心知匪以迹昵卽微郡博士諸生請宜有言焉以不佞之職者史也亦願有言焉以侯之惠茲邑者深也蓋獨侯之惠茲邑哉而茲邑之恥非侯莫與洗矣無論昔之令茲邑而奏聲績歷華膺者比比也卽今之秉鈞持衡統百官者其筮仕不自茲邑始乎頃一二或以簠簋損名或以鞭箠叢戾遂以孟門太行視之而曰茲邑難甚爲茲邑恥也嗟嗟邑豈難哉人自難耳不然邑猶然故也侯治之何易易乃爾夫譚邑之難者曰武進



故劇邑又附郡操璽書憲節而鈐轄者自撫巡而下凡幾郡之統  
率者自二千石而下凡幾月成歲會耳標目移固不必羣口調而  
眾意之俱厭也則事上之難邑當水陸衝爲南北孔道舟車交錯  
者如織候吏迓於東餞於西而東西之宜迓宜餞者踵復接矣晨  
夕朝謁廚傳供具稍疏缺或致瑕釁則寅賓之難邑縉紳大夫士  
冠蓋相望親之則疑以爲比遠之則疑以爲倨面諛背違夫安得  
人人而悅之則論交之難邑之生齒繁夥俗健訟而民工於捍鬪  
月受牒者以三日投牒而愬者以千百聽讞一不當則陽欺陰嘗  
之糾錯而不可解歲徵輸鉅萬不緩而病催科卽迫而傷撫字其  
他徵徭力役足以涉嫌鼓怨者不與焉則得民之難邑所隸掾曹  
胥徒以刀筆句稽代其耕者若干人其奸利若狙之捷其弊孔若  
狡兔之營其智以若干人伺一人之間窟伏機藏非神明莫燭也  
則馭吏之難夫萃茲五難信邑之難於理也而侯顧易之蓋侯材  
合於誠器先於識故視民如傷削牘如馳發幽隱如照而理勞應

劇不啻若刃游而矢決之乃猶不竭其智不殫其能日寬惠拊循  
以慈於眾而喜怒不形聲色不事殆龔少卿黃次公之流亞與而  
其所最勵者清白之操不屑以一介自污供帳無所費問餽無所  
受卽獄成以鍰贖者察其貧則具文而貰之而無所徵斂眎卻魚  
拔葵之節何如也夫惟廉故信於上而上之署侯考者無異詞惟  
廉故信於下而下之被侯澤者無悖德惟廉故信於賓客而賓客  
之聞侯風者無缺望惟廉故信於胥史而胥史之服侯威者無遺  
議惟廉故信於大夫士而大夫士揚侯之休聲者無違心此正侯  
之所爲易而且以侯一人一旦爲茲邑洗難名茲邑其有厚幸乎  
士爲民之表而是非之公徵於黷序不佞故於郡博士諸生之請  
而論著其易於理之本焉雖然邑則易矣侯則有不敢易者三載  
考績虞廷馭世之典上考下也三年有成仲尼經世之志自考也  
上之考下也以法君子之自考也以心侯之績茂矣聲隆矣而侯  
之矢於心者得無有欲施而未能與雖施而未究者乎得無有知



利之當倡而未盡興害之當祛而未盡革者乎得無有仁恩既浹  
惠德有孚而匹夫匹婦不得所侯視之若痾瘵者乎此侯之自考  
而其心固不能一息寧也持是心以往異日者召而爲臺省晉而  
爲公卿卽三事九列以澤四海而永百世之聞焉茲邑其結轍地  
爾獨無難於爲令也歟哉不佞從太史氏後當操鉛槧以俟而侯  
且與今之秉鈞持衡統百官者後先輝映爲茲邑媿稱矣秉鈞持  
衡者太宰楊公推擇侯以庇其故所治之遺黎者也

又

東南財賦地爲郡凡六而吾常郡當其地什之二郡爲邑凡五而  
吾武進邑當郡什之三錢穀餽備徭役調發歲會職貢之輸於水  
衡計帑者鉅萬茲非縣官所恃以寄國脈者哉十數載以來察相  
經邦墨吏縮綬烹鮮東溼尚操切之術眎之爲腴區爲利藪公需  
私斂搜括錙銖殆盡今廟堂寬和田里僅稍稍寧息而又災沴流  
行洪波巨浸屢歲屢大祲民其魚鼈矣畸窮者半菽併日而食而

素所稱饒羨之家更迫於誅求驛騷苛責驚擊不奪不厭十室九  
困實無所蓋藏譬之病瘵者猶然鬚眉猶然坐作而精衛久銷血  
氣內耗非治以盧扁而投之參朮何能起疲羸而安全之徐侯筮  
仕令吾邑以陽和嗣寒沍之後迄今且滿三載矣宅心長厚奉職  
廉平視民之疾苦甚於身之痾瘵所以拊循安集出溝壑之瘠而  
衽席之者布德施惠悉意殫精至巨蠹大豪散於法者無所操舍  
胥吏列解而居抱牘而進無所爲奸利不敢爲大聲馮氣刻覈鉤  
距以邀名亦不敢爲程能亟功丰容色澤以飾名而冰蘖之操毫  
芒無所點蓋其砥節樹閑若貞女之不有金夫也潛運弘敷務與  
民休養生息則若慈母之保赤子也而又逶迤然不遑朝暮恐有  
所闕失靡矜詡自功之色爲煦摩馴習之思飭已於箴登民於理  
三載如一日焉畸窮者猶得秉耒耜於畎畝而饒羨之家亦得安  
枕帖席臥皆侯之賜也乃今歲事復問之水濱矣然則侯之心豈  
以三載之勞而能一日寧哉卽侯治行聲績日盛月隆按部者尉



薦之章聞於朝亡慮數十牘行且內徵超等吾邑何能終借侯乎  
第瘡痍未復饑饉荐臻卽一日亦斯民更生之辰也侯之爲德於  
茲邑深矣然愈久而愈益深爾邑中諸大夫將相率造侯之堂以  
上考報成爲賀而屬不佞致詞不佞橐筆於著作之廷紀載其職  
也則舉侯政之大者又推侯心之無已者而論於諸大夫焉諸大  
夫曰語吏之循徵諸民情語人之賢徵諸士論子所舉侯之政足  
稱循矣子所推侯之心足稱賢矣吾儕從士列而爲謳歌謠頌固  
宜代民言者也民情之得爲難士論之孚爲尤難而子思民言治  
民信友則本之誠矣侯之理窮幽徹蒞達炬列之光導卻批窾裕  
刃游之地人以是稱侯之政而不知侯之才達於政侯之心則原  
於誠也始無計功躐譽之圖終無怠成歧徙之念內有約己束身  
之守外有持平導和之風侯之心無已而吾邑士民徼侯之惠亦  
無已故治民而民以心戴之信友而士以心服之愈久而爲德者  
愈益深也夫農之望雨猶望歲也時而名之曰甘霖時而名之曰

霍威造化之大人猶有所憾而侯之德顧無閒於士民之心非誠  
以通之乎不然日坐堂皇上操頤頰擊指腕心志耳目與士民甚  
邇何能揜於聲音笑貌而不誠未有能動也民情士論是烏可強  
邀覲避驟中輕投者哉以是知侯之誠豫之於學問推之於政事  
而驗之於治民信友之間者也夫稱侯之循之賢而本之誠也卽  
以之爲謳歌謠頌庶幾哉可以當侯矣吾邑雖不能終借侯今且  
爲吾邑民丐旦夕之命於侯也子其操觚而書諸簡以代民之言  
司理張中寰考績序

張公成進士以庚辰迄今丙戌七年矣筮仕理官先真定郡繼吾  
郡合計之始得歷三載部使者署最績書上考將謁司功氏而奏  
之闕下勳庸式序譽命登等此告成陟明之會也公所隸五邑長  
若徐侯某等謀以言贈公而屬之不佞中行謂嘗握鉛槧於著作  
紀載之庭揚厲盛媿以詔來茲其職也不佞謝不敏不獲已請言  
五邑長所以德公意乎國家張官置吏試材賢於郡邑以又安元



元卒之徵而入爲臺省供奉之臣者非今之理官縣令哉然其道實相成也非以相軋也而二者恆尠合矣語有之王良造父稱善御者也藉令王良操左革造父持右革則共轡不能成駕田連成竅稱善鼓琴者也藉令田連鼓上絃成竅檝下絃則共調不能諧聲言相成之不可已也初理官佐一郡獄耳而頃歲則恆爲部使者耳目驅輶乘傳亦巡歷諸郡自刑律案牘洎考課殿最文學錢穀句稽期會大小纖鉅靡不關聞故邑長之眎理官猶之部使者也而理官之自眎亦猶之部使者也自眎尊則威嚴易厲人之眎之也尊則疑貳或生比周相容情終扞格瑕釁偶集心竊猜嫌部使者有所游揚則曰某爲之根柢也部使者有所彈射則曰某爲之媒孽也卽部使者意自有所予奪孰不歸德怨於理官哉兩見疑而交相伎焉始嘗吐肺肝盟金石久則起投石而卒爲按劍者有之矣是烏可語相成之道哉公仁人也祇畏醇深恂恂然若不出諸口其治獄聽訟繩其自相暴者以安其相養者法所麗曰文

無害而已不以摘發爲明不以搏擊爲威而樸茂長厚之澤旁皇周浹無不誠感悅服者彼危激震耀鬻長伐異赫然於聲光意氣蓋外強中乾而餘風遺韻視公則索然銷矣至於五邑長之於公也愈久愈益孚手足心膂無闕隔也玄黃采素相輝炳也若王良造父之共御以成駕田連成竅之共鼓以諧聲也公行矣聖天子簡修遂良之詔不啻三五申令庶幾乎郡邑循良吏得一人焉以風四方則張公且爲臺省供奉而五邑長名實殷隆亦將彙征序進於廟廊之上矣不佞嘗從廟廊覩世之比肩就列者上之必有合於君與相之心而後得達其志下之必有合於大夫士與民之心而後得行其道上不合則雖抱折檻厝薪之忠而見以爲齟齬下不合則雖稱吹篴奏塤之迹而見以爲秦越嗟乎廟廊尤尠合之地哉今以五邑長者而待同寮必能合於上之心而樹和衷之範以公之待五邑長者而待同寮必能合於下之心而導和德之風其有不合者亦尠矣此綦隆上理之盛不佞所忻忻焉冀且



見會堂集十  
暮遇者公與五邑長尚共懋之哉若夫公之治行時積歲茂公之賢聲日炳月騰更僕未易數也且具在上司功氏籍中

邑侯梁景泉擢戶曹郎序

蜀梁侯以丙戌進士筮令江浦旋以才能移令吾晉陵前後在事逾五年監司部使露章薦凡數十牘主爵者當遴選臺省業已推擇侯且疏名籍奏矣會二千石摘發某子甲苞苴之奸因索疵追咎於往昔縱舍者深文微詞見坐以爲過侯故受檄奉令有所稟仰弗得專非其罪也遂不得與召居亡何晉秩戶曹郎以行邑之大夫士詣不佞言曰何侯之不臺省乎而不佞則有說焉夫臺省無專職以諫爲職者也持阜囊白簡伏蒲引裾苟利社稷死生以之此其願也不幸則忠而疑直而斥數而斯辱然則居其官不愧於其職亦甚難矣是故嘿嘿容容恆多尸素或毛舉雷同條列款陳以塞責又或借吻伺色佐津途指使以博權坐曠歲月立躋顯榮貽臺省之羞耳侯之不臺省無足爲憾良可言賀矣侯之爲令

也宅心長厚奉職廉平不爲大聲馮氣刻覈鉤距以邀名亦不爲程能亟功丰容色澤以飾名而布德施惠薄罰緩征務與民休息真若恫瘝之在身者歲異禮上急徵發下鮮蓋藏所以拊循安集者出溝壑之瘠而衽席之胥史列廨而居抱牘而進謹受約束弗得爲奸利及其久也初無斬聞蠶譽之圖卒無怠成跂徒之念內有約已束身之守外有持平導和之風恬然安之若素其官以終身焉上所督過或弗便於下堅持之曰吾寧紕數載之勞毋貽一邑之患而下所要求卽有藉於上若罔聞者侯之政更僕未易數然而非其本也以不佞耳目所睹記今之時能吏什九廉吏什一卽有一焉必其自喜名者也不然必其初矯節者非其質廉也侯之廉率其質而冰蘖焉毫芒弗點終始罔移無所爲亦無所強斯真廉者也夫周官以六計弊羣吏曰廉善廉能廉敬廉正廉法廉辨夫六德皆生於廉廉固治之本也廉固侯之所以善於治之本歟飭己於箴登民於理歷五年如一日又何計時之淹速官之



涼炙哉且不佞稽諸載籍祖宗朝六卿之屬均設並重而臺省者  
虛與之以權實輕與之以秩滿九載始得晉部曹郎吏迨其後也  
上之人視爲私途擇人而授下之人視爲奇貨擇官而進上擇人  
則伺察過詳而耳目愈淆下擇官則逢迎滋巧而心志愈漓凡所  
以求其得保其不失而率貽臺省之羞弗皇卹矣殊可慨也今侯  
不以臺省進寧詎侯安之不佞固爲侯賀矣藉令侯以臺省進將  
效職乎抑倖位乎倖位則必不求其得效職則又必不能保其不  
失侯亦何有於臺省哉今司農當匱乏劑量之時蒿目苦心侯行  
矣持籌佐計畢智殫忠上念國需而有所供歟則思約下念民瘼  
而有所徵歟則思寬中念漏卮弊竇蠅集鼠竄而有所稽覈歟則  
思去泰去甚侯之事也其功豈必出臺省下乎東南爲財賦地沮  
洳下土凋瘵頻年侯所擊目而恫於心者也歲會職貢之輸於水  
衡計帑者鉅萬暑雨祁寒閭閻疾苦凡可以扣赤墀而加惠蒼生  
亦侯之事也其言又豈必出臺省中乎不佞寧詎爲侯賀且爲侯

深有望矣頃者上懋簡忠賢爰立輔弼與海內更始主爵者又且  
破拘攣拔淹抑繩貪譴墨而欲察舉一廉吏於千百之中亟顯異  
之以佐維新之理若侯者非千百之一乎誠宜蒙上賞躋要津以  
風示有位當必有所以顯異侯者雖然侯固恬然安之若素其官  
焉爲曹郎猶之爲邑宰也眎彼爭途而趨逢世而合者可與較尺  
寸而徼旦夕之利哉卽從容而都公卿之位垂竹帛之勳永有聞  
於千百世寧在旦夕邑之大夫士唯唯曰辯哉子之言吾儕謂侯  
不以臺省進也竊少憾焉今則爽然釋矣請書祖帳用代驪詞

趙別駕擢昌平州守序

漢興元鳳神雀閒紀潁川弘農懸魚馴雉之績而京兆馮翊獨趙  
廣漢較著蓋馮翊故帝城股肱而京兆在輦轂下匪得精悍膚敏  
之士弗理也乃廣漢一意奉法絜令遂希蹤三輔馳聲九牧至今  
誦良吏云我明興兩都並建在北則天險制胡漁陽障塞黃花紫  
荆皆稱要害而昌平爲京師右腋山陵左臂實居庸門戶重兵屯



馬南則豐芑舊基財賦重地三吳四大郡徵發灌輸爲衝津巖邑不獨稱帝城股肱且稱天府腹心矣而時移俗漓奸僞萌起好訐健訟匿租逋徭至句稽簿書廚傳供張日旁午不暇給邇又東西交警赤白羽旦夜相屬北虞虜南虞倭畿輔根本之地戒嚴特甚當斯時吏斯土匪得精悍膚敏之士曷克濟乎乃今得趙大夫足稱良矣大夫忠信愷弟坦直冲夷温然長者而飲冰茹蘗又嚮乎不滓也卽古稱懸魚馴雉庶幾近之才謂通明幹局宏達應事接物略不動聲色而片詞隻語悉中肯綮監司部使者無不廉大夫才晉陵令闕則攝晉陵荆溪令闕則攝荆溪澄江令闕則攝澄江甚至遞闕遞攝檐帷干旄若踐更五邑而五邑之士民莫不願趙大夫留一日恨不能分大夫身而四三所也嘉績異政未可更僕數而最著者攝晉陵會學使者論秀往論秀嗜進不已干請無厭稍弗愜輒驟而譁舉邑若狂卽茂宰視爲懼府大夫申明約束矢秉公誠而於寒峻淹抑多所甄拔士論翕然寂無譁者東夷訶遠

海諸郡邑繕堵崇墉爲儲胥屏翰計大夫又以才見推城晉陵晝夜劬勩百雉閒卽一甌一甃目營尺寸心計盈縮役竣不日費省無算巖巖秩秩足稱金湯爲吾郡建不朽之基矣芻粟兌輓數百萬漕艘至往往藉口軍需區釜不式幾溢正供魚肉百姓稍裁以法恃驕悍脫巾而呼大夫以攝篆督兌事調劑參互不激不隨卒不爽期會而帖然服也至其徵賦賦集治獄獄平察吏則吏畏神君撫民則民懷慈母大夫之才可爲兼之矣天閑之駟朝秣越而夕刷燕似飛之湛盧水斷蛟而陸剽兕又將何所施而弗效乎茲以治行高等擢守昌平夫昌平隸京兆視吾郡隸畱都更密邇主爵者爲天子畿輔根本慮務得精悍膚敏若大夫者勝其任亦猶馮翊之藉廣漢而欲治南則大夫倅而南欲治北則大夫守而北翼戴兩都保障百里大夫之任益難且鉅哉而不佞則謂大夫之治吾郡難而治昌平易也夫大夫故多才特倅耳上之稟成郡伯吾抑而不見其才則難爲倅吾不愛其才而盡見之則難爲郡伯



斯承上難也且大夫以貢起家分符半刺坐堂皇上而屬邑長皆賢科高第積資著望之人北面事之吾侑而稍崇其體則難爲邑長吾不愛其體而稍抑之則難爲倅斯接下難也直指使持斧埋輪所轄僅四郡糾察之罔甚密歲遣歲代而留臺之行部者又歲至有所殿最則吹毛束溼而丞倅稍不自振拔多遭彈射則稱職難也有此三難卽負卓抱偉靡由自見而況衝津巖邑如前所稱徵發灌輸什百它郡大夫既能以精悍膚敏之才應之又幸爲之伯者若二千石錢公同寅虛懷能盡用大夫之才屬邑長皆一時名流能奔走奉大夫功令惟恐後而部使者亦能察舉大夫於品格途限之外則不佞所謂難者大夫直易視之矣又何復難昌平爲也昌平隸京兆雖軍伍錯雜戎馬倥傯而簿書財賦不足當吳中什之一民風士習攬摛奸僞亦未必當吳中什之三去京師甚近名聞譽望朝施夕暨於輦轂之下且綰符專城權可自致政可自裁大夫以已試之效臥治之坐策之已耳猶之造父之駕輕車

騁康莊庖丁之操善刀中經首固知其致千里無留行解數十牛有餘刃也蓋大夫精悍膚敏類趙廣漢而忠信愷弟之德不啻過之異日紀良吏者漢稱趙馮翊我明稱趙昌平永有聞於百世而躋華厯膺進之三事九列豈足爲大夫豔哉予不佞敬因五邑長之請而爲之論著若此不佞典在筆札謬司載述揭休貽徽是在不佞而察舉大夫於品格途限之外越資超等爲國家登崇俊乂則在主爵者矣

王別駕考績序

郡縣自守令而下佐以尉倅丞簿監司臨之部使者糾察之罔至密也部使者及瓜而代必露章馳檄明示殿最歲與羣吏更始使賢者有所勸而不肖者無所容然而部使者所轄他省臬之爲郡縣者不啻數十爲守若令與夫尉倅丞簿者亦不啻數十百人其間賢者固多而不肖者亦未必無則上之人所爲殿最察於數十百人之中間舉一二以示風厲猶得存持綱解網之仁而下之人



亦不見有吹毛束溼之苦乃若江以南則不然江以南三吳最稱煩劇而以郡隸京兆者僅四以邑屬郡者僅十有八其爲守若令者皆積資著望者也不然必少年高第者也又不然或奧援捷足者也而其爲尉倅丞簿者亦皆兢兢奉法循理非必有恣睢貪冒闕茸不事事者總之亦不過數十人然監司部使者臨制糾察於上而留臺之奉璽書持斧行部至旁午無虛晷歲必遣代代則有所殿最而其所爲殿最者又不過舉其數十人低昂之而要之數十人之中其賢者常多不肖者常少夫賢者常多則其舉賢者常見遺於數之外不肖者常少則其刺不肖者常取盈於數之中所謂取盈於數者既不可加於積資著望少年高第與夫奧援捷足者則必吹毛束溼揆括彈射之於尉倅丞簿之間至文致微卻撫拾細事以塞責嗟嗟值斯時吏斯土而又居斯職也不能一朝居況三年哉蓋予今有感於別駕王公云公淳龐樸茂樂易子諒有所施措因俗隨宜推心置腹赤子蒼生而嫗煦噢咻之聽訟折獄

不爲鉤距不煩華楚色管情推出一二語各得其意而去至其操潔履方飲冰茹蘗則又凜乎難犯矚然不繼也公職輸將於大司農凡擿發夙弊裁節冗供罷一切科斂僕馬之費者數十百金著爲例會雲陽令闕檄公攝雲陽旣晉陵令闕又檄公攝晉陵公以儒術緣飾吏治再署衝疲又當饑饉法不貲而民親令不苛而事核試艱理勞批窾導卻恢恢乎運斤游刃有餘地以其閒召鄉三老暨邑諸生爲談說古孝弟節義事旌揚振作卽巷婦鄉黎靡不爲之興起者士慶明師民懷慈母至建祠肖像而戶頌尸祝之茲當報政奏最之期合郡奔走攀留皇皇焉惟恐何武之去而寇君之不復借也膏澤下究名實旣孚此豈可以丰容色澤強徼而倖致之哉夫公文明內蓄誠篤中涵不爲精悍巧捷沽名市譽初或悶悶無奇而卒之章章於理也蓋歷三載如一日焉部使者且夕得代欲藉手還報上察舉數十人中治行爲第一或不能先公矣公其爲我三吳四郡一洗郡倅丞簿之難而使賢者益知所勸乎



是公之嘉惠垂範於來茲者且無疆也異日者躋崇陟膺樹茂策宏直操左券云爾予不佞不能文因伏蒿萊久得之士民之情見聞甚習必不至阿所好也故爲之論著焉以爲公賀又以爲繼公者勸而王文學同寅爲公門牆士遂受言操觚而書之簡

梁聞菴別駕奏最馳榮序

蓋聞之就列陳力奉其所當盡之職於君而名實以孚此蓋臣之上績也馳榮徵寵致其所難必之遇於親而顯揚以遂此孝子之至情也情得則感深感深則績懋而子臣之道繇之以愈光矣東粵梁公佐吾郡三年政成譽起士頌之若師帥民戴之若父母監司部使者察舉公治行爲江南郡丞異等露章薦者五移檄獎者十有八署上考奏畱視事乃司功氏具令甲以聞天子超然降辭尊寵褒嘉之夫藩臬郡邑之吏被璽書龍章之錫而因爵其所生較輦轂侍從臣爲難秩不滿不得薦不及格不得或爲微文故事所束縛輒又不得士大夫有紀綱奔走於四方至大位竟老而父

母卒不沾一命者公初爲陽朔令秩滿矣薦及格矣以徙官遂不得蒙恩今也在事積資久而後得之郡縉紳父老相與咨嗟欣豔舉手加額以爲賀而諸生某某造不佞授簡徵詞不佞語之曰君臣父子之際其分有可盡而其心則無所徵者也方東井先生敦倫扶紀不侵爲然諾其設義方必先行誼至顏孝弟詩書語於堂亦爲儒爲賢之訓當如是邪豈預徵子之榮其親乎公視身迪履起家服官奉先生之教以周旋夙夜匪懈亦爲子爲臣之分當如是耳又豈預徵君之施及其親乎乃父教之忠君教之孝而公因忠盡孝則移孝以爲忠蓋心雖無所徵而績且愈益懋焉毘陵故劇郡稱守難而佐守爲尤難諸屬縣皆巖邑稱令難而攝令爲尤難何者專與分殊權久與暫異勢也公佐守攝令隨施輒效抱汪洋之度而不屑爲媵阿具開敏之才而不務爲驚悍懷乳哺之仁而不任爲姑息蓄博雅之學而不肆爲彫蔓明金矢之條而不習爲深文苛法日坐堂皇上削牘如馳發幽隱如照而剖疑解夢如



游刃不事鉤距不動聲色而老胥猾掾屏息縮舌毋敢吐一語諸所辦治襄贊二千石之功居多至於勵冰蘖之操無殊韋布退食燕處蕭然泊如侍者兩平頭奴耳梁谿令闕則攝梁谿暨陽令闕則攝暨陽晉陵令闕則又攝晉陵及長吏入計一時諸郡邑爭願得梁公曰安得借公身而四三所也又曰奚不卽擢公眞二千石而保障我也夫粉飾黽勉可以躡聲躋膺而不可強之輿論羣情卽士民之心公亦何所徼哉然士民之於公若不能一日去者竊嘗謀之不佞矣不佞則援耳目所覩記事爲里父老稱說云若輩不能捨公猶公之不能捨吾士民也無煩何武之思當效寇恂之借自別駕而少府則王公典自少府而牧伯則邊公有猷自牧伯而治兵使而開府中丞則湯公賓溫公景葵凡此皆吾鄉故例主爵者儻垂意東南根本之邦乎當以吾鄉之故例處公厯轉其階專任其地如漢賜金增秩毋遷徙焉則廟堂推擇之明桑梓怙恃之望也公勉矣公不難於佐郡不難於攝令而況其權專其勢久

者乎而況爵崇責重所統轄厝注者其權益專其勢益久者乎蓋公一日在三吳三吳萬生靈庇焉異日者天子之尊寵褒嘉若七命八命九命也者推恩於父母於祖父母於曾祖父母竹帛旂常之書正未涯量則公之爲蓋臣爲孝子足以建不朽貽無疆今固其權輿云爾諸生識之不佞卽伏在蒿萊尚能從舍中兒竹馬賡甘棠之歌以俟

司理閔翼墟考績序

粵稽古王制訓有邦土者以式敬由獄獄成告於王歲終而報三年而讞其成故惟良折獄作元命而長王國繫刑是係其任亦重矣今之爲理者實受嘉師而司刑於邦土者也記曰刑者成也一成而不可變書亦有之獄成而孚輸而孚然則獄其易成乎理之在郡持三尺文聽於棘之下匪精悍膚敏之材弗任卽材優矣或寡操未必能修姱節而節之修者又多刻礪少恩非以簠簋損名卽以鞭箠興刺豈郡之不譽於理邪惟其材之用一乘之爲利而



家肥一倚之爲威而國削此之折獄特府怨而階之厲耳縱又致之以麗於罰將甲乙其可否朝暮而四三焉烏在其爲成也矧乎乎哉儻其以成讞於王奏三年之績乎四境之心而用副一人之德意者亦難矣今閔公之理吾常也歷一考其所屬諸臺使監司露章以薦飛檄以尉獎者數十牘悉署公異等茲上計於司功氏當爲治行第一上或賜書增秩以終惠予桑梓乎不則特詔內徵爲臺省躋膺陟要不再考而列崇班矣郡中諸大夫謀所以爲公賀者而徵言於予以予從載述之司典在筆札闡懿以揚徽史職也又以予休沐久越在草莽微公惠獲棲息於衡門泌水閒而里謠輿誦聞於野者更諗也夫徵之史則信謀諸野則公子何敢辭又何敢爲佞竊惟公佐郡以理也不甚難哉郡輔京兆爲江南之衝津劇道民故習游冶工於捭闔攬秘訟言繁興若蠶起蝟集平亭聽斷儻操一切束溼之則持綱解網之謂何吾惟法之聽而難乎其爲民卽不然而稍寬之爲姑息則巨猾元慙竟成吞舟之漏

伏窟之營吾惟民之聽而難乎其爲法上之秉璽書憲節以轄者凡幾閒或示之嚮俾其馘馘於法以佐熙指將巧詆深文以附會之則又舉吾法惟上之聽而益難乎其爲民郡所隸掾曹胥徒以句稽代其耕者若而人其捷若狙其弊孔若狡兔陰伺而陽嘗之豪黠憑之以爲奸則又舉斯民惟下之人是聽而益難乎其爲法信乎郡之難於理也理之稱難者謂詘於材耳然而世非乏材也或其材爲苞苴之濫觴而浚之以生乎或其材爲刑名之嚆矢而淫焉以逞乎則谿壑其身而因以秦越其民也雖威嚴致治顯融著聲此其材何以稱焉公楚材也公之材以廉爲質而行之以恕者也則人所難而弗克任者當承蠲易之若礪發若刃游無所施而不中窾綮也蓋公負奇秉潔含淳葆真諸所厝注咸殫赤下之據案折獄兩造未備單詞錯陳公爲坐策立剖之不泥故牘不馮上指不惑居閒不落吏竇而發幽譴隱真如神明又不爲械匿鉤深箝攝齧投之術色警情推出一二語各厭其意而去且藹藹于



于霽威而飲人以和令人欣然若更生焉久之赭衣空圜其踊委地矣若其清白砥操不屑以纖介自染供帳不煩問餽悉屏而巡舫征軺之行雖傳郵有常給卻弗納又何廉也惟廉生公而恕所以成其公惟公生明而材所以運其明誠有凜若冰雪之標而不託於矯節藹若陽和之煦而匪緣於市恩迅若風行雷掣之嚴而又罔失之淩物以敕法而法平以折民而民服以奉上馭下而上下交孚卽微至鄉黎巷婦靡不巷譚戶祝之是烏可以華容色澤強微倖致者哉蓋仁恕之明驗而廉實爲之質焉虞廷敬五刑終之以恤周官定六計先之以廉而太史氏之傳循良其於公儀休之賢它無所表見而兢兢於卻魚拔葵之節厥旨微矣公今告其獄之成於上矣凡郡之爲理者計無最於公儻晉而爲社稷耳目股肱之臣公之節愈茂業愈光出其材以奉法子民而長王國則今特權輿云爾旂常樹烈竹帛書勳靈詎諸大夫桑梓之慶也予不佞尚當操觚執簡以俟

郡博涂應川擢南雍助教序

嘗謂我聖天子嘉惠元元廣勵學官之意曷嘗不兼至而均切哉故懋簡守令妙選師儒典亦並稱難慎焉迨後科目重而士由科目進者解褐縮符爲守令稱民父母矣而師儒之任如今之學博士者其廢其置謂無關於得失之數姑以待夫倦於學困於政者爲偃休之遽廬而人亦以冗員長品視之豈以守令者制一方操三尺威足以怵惕權足以奔走而持文墨論議上下於章甫逢掖之間周旋於俎豆絃歌之列者焉能爲有無不足爲輕重邪予竊謂政教無異理從政之與設教匪異人任也古稱師保未嘗分職命官而敷典和則思艱圖易並屬司徒領其事世豈有視身範士如標立影隨顧獨不能出身加民如風行草偃者乎名實之不覈材品之不察而用舍無據廢置靡常如是而欲士興行民安業聿觀古昔化行俗美之盛道何繇哉予蓋有感於郡博士涂公云涂公以明經成進士高第試宰武康左遷司吾郡教事積資累績今



晉官助教成均矣公之爲政武康也予所不及知竊觀其教吾郡而知其良於政也公之教吾郡僅兩閱歲耳而諸生之尊之也如嚴君親之也如慈母今公之行有日而諸生之戀戀於公惘然若失其恃怙也公何以得此哉蓋聞公之教諸生雍然讓也藹然和也又肅然其有度也餼廩之發必以其時日庶幾其佐諸生之急也脯脩之贄杜不令面以爲它博士先曰庶幾其成一日之雅也至其談說經義攷問學業則惵惵焉無隱乎爾也公之所以教吾郡者如此予所及知則公之所以治武康者可以得其概矣其教之雍然藹如也知公之政必能和以近民其教之肅然也知公之政必能莊以蒞民其餼廩以時脯脩必卻也知公之政必能潔已奉公導利以貽之民其談說經義攷問學業惵惵無隱也又知公之政能以文學緣飾吏治而不以一切之法繩民公亦何所不能於武康而以冗員長品淹公於庠校之間邪計吏者亦豈嘗覈名實察材品知公之長於教而獨短於政邪矧公之在吾郡也司教

者什三攝政者什七錫山令闕則檄公攝錫山澄江令闕則檄公攝澄江靖江令闕則又檄公攝靖江公雖任師儒乎未嘗一日不爲令也以公之爲令也若不足而其爲師也則有餘公之爲師也實有餘而其爲師兼爲令也又無不足此亦可以覈公之實而察公之品矣且公由師一方進而師天下則公由宰一邑又進而宰天下蓋有他術乎哉異日者陟膺躋華握樞秉憲爲生靈造福士類貽庥如古所稱教養有賴師保無窮旂常竹帛之烈公將延伫以俟之矣予獨怪夫世之人不覈名實不察才品以俯仰私愛憎以愛憎私毀譽以毀譽亂名實乍賢乍佞倏降倏升使天下長材異能之士逡巡偃蹇不得展布以終其職者抑眾矣豈獨一武康又豈獨一涂公也此予所以有感於公而因之累欷太息者也公行矣公之僚友雷陽林先生輩造予請所以贈公者故爲之論著若此儻計吏者聞之而加意綜覈其難其慎以仰佐聖天子嘉惠廣勵之意則治教兼長若涂公者當亟於推擇矣



邑博左望南擢武昌教諭序

往予不佞賜環起家濫竽成均與洪陽張先生分席造士樹軌絜令爲畫一之法毋虐瑯獨毋畏高明諸士始而疑旣而服卒而瞿然化也居無何張先生以少詹事予以春坊諭德執經侍上講幄則深愧師模未端士習未盡變而成教於國者未能終也則又益歎作人之化久而後洽必積時累歲浹髓淪肌未可以旦夕計也昔子夏授經西河之上諸生趨而受業者卽家家焉因而成市陽道州爲司業七年遷刺史諸生詣闕請留者數百人此固其範端表正經明道尊乃所稱誨不倦者實以久故予不佞無足擬道州而有能傳西河之業且久而誨不倦者豈不師道立而善人多乎今得吾邑博士左先生矣先生司教吾邑者已七年不可謂不久而其範端表正經明道尊諸生悅而從之監司部使者器之縉紳大夫士交重之亦愈久而愈洽矣乃予不佞數奉教於先生而竊窺先生之深也先生以壯歲上公車學有淵源所爲文則田百氏

之藪而漁獵之而道義之氣見於眉睫與彼窮途末景竊升斗者不啻徑庭也今晉武昌教諭行有日矣諸生羣然造不佞而請也曰吾師乎吾師乎温温而恭也款款而厚也惘惘悞悞而誠也逡巡若不勝衣而訥訥如不出口也蓋望而知其爲君子哉若人乎此先生之所目而見也至其有所誨迪也剔腎剝腸惟恐其有隱也又惟恐其若或傷之也獲片善揚之惟恐其不竟也有不善誨之又惟恐其不革也束脩之贄一切置不問下帷講藝又洋洋纒纒無不令人虛往實歸頤解心折也此先生之所耳而聞也諸弟子幸而得先生又幸而得先生七年安於其家坐而受業奉西河之尊而又兼道州之久諸弟子烏能一日舍先生哉子曰唯唯否否寓內所稱大方必曰吳楚吳蓋文學奧區楚亦宅方離烜故楚產稱材楚書寶善必有明經學道之士爭嚮往而胥教誨者諸弟子又烏能以一邑私先生哉先生樂育英材旣收南方之菁華爲公門桃李而又推其不倦之誨造就楚士則汝墳江漢之間又必



有雲連徒洲之材爲國家薪樞之用譽髦彌盛師道大行成均六館之席方且虛以待先生卽楚下邑亦烏能以三年淹先生哉矧諸弟子能佩服先生之教無替厥修則百世猶與千里如對又何必蚤暮先生之側而周旋警欬始稱師哉諸弟子其可以自釋矣顧予有感於諸弟子之戀戀於先生而先生之得此聲於人人也獨以久而愈洽則予不佞所不能成教於國者已親見於吾邑而觀厥成於先生師道由此而立善人由此而多不獨吾邑之光抑亦斯文之幸也寧不更可以自釋乎哉先生江西人與洪陽張先生生同鄉學同術試以予言質之張先生將戚然當於心也先生有子曰良相英年奇稟以先生命執贄摳衣從予游與予兒暨及門諸生糊名校執而予兒又皆先生宮牆士也易子而教蓋稱世世講矣則予之言又非赧然於未同也遂授諸生簡而書之以代祖帳之驪歌

李吉軒年丈令陽城序

嘗讀書至成周之命君陳也曰惟爾令德孝恭惟孝友于兄弟克施有政夫政豈易施也哉施於廟廊則有禮樂道化紀綱典則之柄慶賞刑威因革建置之權施於郡邑則有錢穀兵農獄訟財賦簿書期會之煩撫循禁戢安定還集之責大而萬幾之理之所由出小而一方之命之所由寄苟非其智足以剖幾析微材足以理繁剝劇力足以負大荷艱有弗容以易能者而君陳之能施於政也則僅於孝友令德驗之予於是而知古昔隆盛時上之所以建官置吏與下之所以奉職供位者必宜於家乃可推於國而施於達者卽其養於窮者也或者謂國家異地窮達殊時是故德與政斯岐而二之矣歲辛未以業書舉進士同出河汾王老師門下者十九人旣蒙識拔旋荷陶鎔悉循循然勉服教誨共期淬礪無貽門牆羞而惟吉軒李君爲最賢始就之溫夷和郁其色則怡如也旣扣之深潛純篤其衷則淵如也久與之益醇謹雅飭無失容無情色煦然若春溫襲人其意氣則融如也及其里中人入都下者



述李君家行鄉評謂孝弟曲盡於庭闈愛敬誠孚於族黨至於親身飭躬循理蹈義則又介然貞尺寸之守厲清白之操未嘗以纖毫自點也殆庶幾乎孝恭之令德歟則其施於政也將不動聲色無事嚴苛而精神之所鼓舞器識之所涵停惻怛懇至愷悌慈祥推其宜於家者達其養於窮者觀厥成焉當使百姓興行四境同風沐循良之惠享寧謐之休忻焉日遷於善遜於倫而不知所以爲之者彼徒恃其智與材力而務爲鉤距防檢與民相角逐非不可以興事起功其究也卒乃乾強而寡味竭索而無餘光何也德與政岐而二之也故曰德惟善政蓋未有善政而不本於德亦未有令德而不可以施於政者也矧陽城屬晉方域志稱其俗儉而用禮淳而好義固非若下都爲遷殷所居凌德悖道之民也以凌德悖道之民且移風式訓而用禮好義之俗其不難於格心興行也可知矣李君往矣豈有具孝恭之德而弗克施寬和之政者哉他日奏最報成躋崇陟要且將以其施於郡邑者施於廟廊敬

典敷化樹績宣猷果不負吾師今日之識拔陶鎔予於君乎厚望焉君之行也同門士宜有言以贈予惟令德善政書之言也君之所誦習者也以其所誦習者告之其亦明經飭治之意也夫

劉太巖年兄令安邑序

辛未舉進士進士出王師門下者十九人旋以甲第名序謁銓曹凡授外者則徵言於居內者以志別也情也奉王師之教而循次祇役焉以均勞也亦情也乃太巖劉君令安邑之贈言宜出李吉軒氏吉軒氏顧轉屬予不知予之不文也然予方給筆札典詞翰又不得以不文辭卽以劉君所生之地與今所治之邑爲劉君告可乎夫劉君生安邑安邑隸鄒魯方域古聖賢之鄉也况茲往治者晉之地又古帝王之都也予嘗考傳紀稱晉俗恭儉禮讓深而好謀和而不怒堯舜之流風餘意至今存焉因想見當時之臣鄰岳牧卽今所謂藩臬守令職稽其所以宣上澤而施之民者亦不過御之以寬臨之以簡遂熙然與民相忘於無事是故康衢擊壤



自道其耕鑿作息之樂而卒不知其所以致之者及孔門論政曰  
居上以寬行簡以敬然則寬也簡也政之本也猶近民者之所先  
務也惟今之治之者恃其精悍強毅之才過爲周防勵勵之術尚  
嚴酷崇煩苛紛紛焉鉤距敲朴束縛期會日夜與民相角逐而民  
不知所出也於是變聽易視飾詐長奸而今之民或非古之民矣  
劉君固碩大長厚人也又生於鄒魯沐浴教化數數從父兄長老  
述古昔聖賢事其所秉與其所習悉非彼猥薄輕剽者流往治安  
邑民明禮敷惠擴愛惇仁出其碩大長厚者而爲易簡寬和之政  
毋深文毋峻威以戕民身體毋繁言毋多事以亂民耳目毋逆僞  
毋索情以移民心志行且返淳龐之俗收循良之功俾堯舜之流  
風餘意自一方達之四境而安邑民亦或有耕鑿作息詠康衢歌  
擊壤者乎未可知也嘻斯民也卽堯舜之遺黎也今天子執符御  
極秉德綏文四夷賓服百嘉忻鬯上有堯舜在而宣猷展采者復  
佐之以寬和奔走於郡縣閒斯與唐虞之臣鄰岳牧奚逕庭也劉

君其勿以予言爲迂且謾哉他日報成績列上考太史氏傳守令  
之撫綏惠愛者曰某某聖賢之徒無負於帝王之世也且爲君操  
觚執冊以俟之矣

余承溪年兄令海寧序

今年春南昌余承溪氏襲溪氏兩兄弟並舉進士而承溪氏則與  
予爲同門生云同門故有參候往來交際餽遺觴幣事百務繁縟  
眾志四三非練達敏決才弗克任也乃承溪氏身當之紛劇立辦  
約束可遵凡所籌畫悉中事機雖錙銖尺寸瑣細零星必躬親較  
度計算詳明既率眾舉事復恂恂如不欲見其能居其功焉同門  
生無不仰成藉庇於承溪氏者銓衡重民命簡牧職出承溪氏尹  
海寧海寧爲臨安郡隸邑古越地其俗鄙嗇其術鉤深其習輕悍  
其敝也樂爭而尚訟自曩昔島夷擾害地瘠民虛茲稍稍稱難矣  
然承溪氏往無難也予固逆睹其績而考厥成也嘗讀兩漢傳循  
良以黃霸爲稱首霸無焜赫聲譽如趙廣漢輩而當時賜車蓋下



詔褒嘉至於今頌之蓋令者近民者也率務體格尚嚴苛鮮寬和之度乏綜理之能視事事若不屑經營者故鹵莽尸曠養尊居逸侈文矯節持祿位積歲時惟悠悠焉跂徒官而釋負也無惑乎數循良者指不一二屈也霸治郡卽鷄豚穀馬米鹽煩碎之務莫不竭精殫衷焉若某所木某亭豬且隨問隨道之況其大者歟承溪氏視身飭教勤政恤民凡事之可行與職之所得行者當且無怠朝無惰夕卽可以違道躡名市美干進表暴於人之聞且見者弗爲也慎斯術以尹海寧則固無難者何也簿書錢穀刑獄徭賦叢委紛雜皆尹之事尹之職而賢者智者強者弱者愚不肖者億兆人也悉環向觀聽焉其與今之參候往來交際餽遺觴幣事所謂百務繁縟眾志四三者迹異而機則同也出其練達敏決才則旣辦於此矣其有不濟於彼者乎則旣孚於友矣其有不宜於民者乎其竭精殫衷當與霸同而恂恂如退讓不見能不居功無焜赫聲譽亦將視趙廣漢輩殊科矣它日秩益崇事益集責且益重矢

志匪躬爲國家肩鉅任大外則宣猷內則展采垂功名光竹帛予於承溪氏可預必也奚啻此海寧之政逆睹其績而考厥成已哉予不佞謹書之以相承溪氏行并質之吾儕同門生如此

孫南川年兄令雄縣序

陰陽家以支干生剋星辰經緯推人祿位名壽之數其說舊矣然有同者有異者有大同者有迥異者要未足盡信也歲辛未春官舉進士予得隨山右孫君後問齒序以列行坐同生庚子年又同月與日與時因各道其履歷出處偕登甲榜中復偕出龍洲王師門下眾訝之曰可謂之同矣旣乃予內叨中祕選而孫君外授有司職眾復訝之曰是不可謂之異乎予則曰不然國家設官置吏有文學之臣有政事之臣以文學進者趨承禁近人或以爲榮而不知其事雖約其稱職也實難以政事用者敷歷中外人或以爲勞而不知其勢雖繁其行志也恆易土方爲諸生業文時見其邑之爲令者撫循其人民經理其塵野平反其冤滯朝發令而夕布



惠也不則人民流離塵野蕪落冤滯沈積非銜霍訶伺以賈譽卽  
媿媿猥瑣以謀身其貽患而播毒也深且速則嘗竊歎之矣曰吾  
安得試一邑自效乎獲自效卽一邑不以三公易也何也爲其職  
近民而政與才易達也然政貴紆徐而不迫才宜蘊蓄而不炫誠  
恒淵涵當自有和平易簡之績而彼淺衷狹量揚已誇人鮮不至  
於搜剔矜詡者山右古晉地晉之俗尚質實厭誇詐有淳樸風而  
孫君渾厚木彊恂恂如絕無脂韋浮沈態況雄爲畿輔邑其民又  
非猾薄輕剽者比也孫君往無庸別求昨王師召門下士環席聽  
教君其不聞乎言之而必可行也則言之行之而必可成也則行  
之斯二語也自古稱懿哲紀循良孰能外之孫君者渾厚木彊人  
也不煩詞以飾聽不輕發以喪功必能服教誨著勲業爲門牆光  
吾儕與有榮焉今天子破資格羅英賢顛倒鼓舞方且於州邑守  
令中擢臺臣翰史以示優異君他日報成績承珠寵先試一邑繼  
躋三公政事文學君其兼之矣嘻予當其約者予愧焉而知君之

任其煩者之無負也予不能副其難稱者予懼焉而知君之必能  
辦其易行者之有成也若夫祿位名壽之異同豈吾儕所置喙而  
容心者哉

吳崑麓教諭長垣序

毘陵崑麓先生懷琛吐奇以文章鳴於時殊采邁倫高風蓋世蜚  
聲耀華於士林菽苑中自同里至殊方誦其言想見其人無問識  
與不識莫不傾慕而嚮往之私相謂曰崑麓先生云丙午舉於鄉  
迄辛未謁選得長垣學教諭無問識與不識莫不咨嗟而嘆憤之  
又私相語曰崑麓先生乃亦不售而小試云予聞之心志不通己  
之責也名譽不聞友之罪也心志旣通名譽旣聞而有司不以舉  
有司者之過也今崑麓菽達矣於己無責聲宏矣於友無罪其取  
巍第登膺仕直振落發蒙耳而卒邇迴至此豈亦有司者之過歟  
然而丙辰己未操文衡者特加鑒別將裒然爲明經舉首而一以  
不終場罷一以譚時事切直罷若庚戌癸丑戊辰辛未悉以憂病



不入試則崑麓之遑迴至此者非齊門之竽我不彼合亦非荆山之璞彼不我知實數之奇也天也於有司乎何尤天之生才也不偶而才之邁時也恆難才者天之所靳況以才而名當世者尤時之所忌若崑麓者雄才絕調卓越儕輩芳譽令聞流傳海宇則天之所靳者既得之時之所忌者復有之其沈淪拂鬱而卒遑迴至此也固宜雖然才者天也隨所值而能用其才者人也名者外也必有實以副其名者內也君子求諸內以盡人未嘗徇乎外以責之天也長垣古名邑密邇畿甸崑麓往視身軌物執經問難振起之陶成之其精神所措注器識所涵停固自有默喻潛孚者昔陽城居晉之鄙晉之鄙薰其德而善良者幾千人王通講道河汾河汾之教雍如也崑麓之才若名豈在二子下而長垣之爲晉鄙河汾也亦幸矣慎毋曰干將必蛟犀乃割鹽車非騏驥可服遂韜芒斂鍔俛首窘步爲也今天子搜羅英俊顛倒毫傑不論資循格崑麓當不使久淹黷序閒卽由此揚休光樹懿績其才益顯而其名

益流且遠焉噫無乃非崑麓之意也歟哉於其行酌之酒侑之以

歌歌曰

薊門煙雨兮春色闌之子翩翩兮劍光寒逸氣橫空兮佩紉芝蘭華囊裁句兮色燦琅玕鳳棲枳棘兮蛟且蟠達人觀兮遺寓可安康莊驥足兮豈得終淹何以贈子兮願加餐

張北泉榮授冠帶序

燕趙古稱多慷慨節俠士而吾鄉之徽郡亦東南之燕趙云蓋其人務爲修名植節樂善好施扶危持顛可恃以緩急而不以存亡利害回面易心廩廩乎慷慨節俠之風焉乃張翁北泉氏生於徽而居於燕趙者也其意氣卓犖不侵爲然諾可以稱賢豪矣寧獨其性生哉亦其習所成者然也予自戊辰歲偕計上公車譚菽之暇挾文友以閒游於酒人與張翁邂逅邸里遂出囊中裝張筵布樂益置酒傾蓋爲懽觀其狀樸雅魁梧儻蕩不羣類古朱家季心者流子固目擊而心存之旣予以辛未歲登第儲材祕館迄丁丑



歲復起家濫竽詞林而張翁者猶隱身賈市閒歲時或偶一過從而聲迹顧稍疏曠矣及長星示祲大倫幾斃子以狂昧伏闕上書忤當事者意指詣廷中受杖杖畢編民出都猶有爲子郊外僦舍者冀稍得從容理醫藥而緹騎邏卒挾當事者之怒而迫之行數隕贖既絕復甦而偵伺追逐於途者肩摩踵相繼也血肉淋漓神魂瞑眩一日六十里走路河日已昃無從問居停主舁夫舁子置之大市通衢中悉散去會有天幸適當張翁之肆翁戟手倚門問知爲予也灑然泣數行下改容舉手曰有故人文憲在亟爲邀之入治寢室食具爲調攝計甚力居有頃而緹騎邏卒將坐以爲黨枝蔓而甘心焉翁則意益悲憐予而稍幾微見於顏色猶故爲覆匿子覺之復它徙僅免翁於禍而翁之名業已上金吾所嗟乎亦危矣所稱扶危持顛可恃以緩急而不以存亡利害回面易心者非翁其人哉翁爽朗不羈行誼甚篤久居燕趙閒操奇贏逐什一之息以自殖卽與策成敗講說今古無不纚纚足聽聞者怒馬鮮

衣時時從胡姬當壚解佩擊筑歌烏烏也居然賢豪而又嘒平慕爲名高也者好折節納交與士大夫游此其中豈啾啾卑卑而黃馘槁首於蕭門蓬牖之下者哉今皇帝誕嗣覃恩賜民間高年有德者爵一級以示優崇耆碩之意翁爲閭里父老所推讓應詔受冠帶則旣被上寵靈亦足以酬德風世矣屬予從田閒起廢賜環復塵侍從以萬死一生之軀得再見翁於逆旅握手相慰勞各相訝容鬢漸改若隔前生然樂觀翁之壽考康榮也因論著予之交知始末爲翁賀并告語來茲令眾庶見以爲敦信扶義者勸匪溢詞私詡而故爲之游揚也異日者紀慷慨節俠之士且將與朱家季心並傳而貽令聞矣

賜餘堂集卷七



